

萬 有 文 庫

第一集一千種

王 雲 五 主 編

清 詩 別 裁

(三)

沈 德 潛 選



商 務 印 書 館 發 行

萬有文庫

第一集一千種

總編者

王雲五

商務印書館發行

上海圖書館藏書




A541 212 0004 0701B

清詩別裁

(三)

沈德潛選



國學基本叢書

清詩別裁

卷十八

陳鵬年字北溟。湖廣湘潭人。康熙辛未進士。官河道總督。諡恪勤。著有滄洲詩集。

新春雜感次韻和中山

鐵瓮城邊路。金焦江上山。蛟螭蟠地軸。豺虎踞天關。皎日羣陰散。春風十畝閒。煙雲儼圖畫。蠟屐好躋攀。

京江雜詩

傑閣俯城陰。闌干每一臨。曲阿秦郡縣。北府宋園林。山色分吳楚。江流自古今。春風滿天地。無限望鄉心。

送靜庵僧之五臺結夏

五月正炎熱。山寒不可勝。好將雙赤腳。去踏萬年冰。虎石階前伏。龍雲盃底興。欲隨飛錫住。松雪路層層。

江干

愁雲毒霧鎖江干。院落沉沉晝景寒。貔虎千重森鐵瓮。穹霄何日下金竿。迢遙肺石呼難徹。寂寞丹心淚

已乾。蟻蝨一身天萬里。仍依北極望長安。忠愛之忱。時時流露。故終免於難。

與許謹齋都諫夜話

琪樹琳宮鎖寂寥。逢君燒燭坐寒宵。三春華髮棲江表。五夜丹心戀聖朝。禁闥似聞憐讜直。湖山自合老漁樵。鯉魚風裏桃花水。共聽南徐早晚潮。

移寓城南草堂紀興

北堂遙隔楚雲西。遠近浮槎理亦齊。豈有園官供菜把。仍催稚子樹雞栖。寄奴井在泉堪汲。丁卯橋荒路不迷。比似成都留杜老。居人指是浣花溪。此在京江時移寓玩其詩意若欲終老於此者然

冬日感懷

河淮重寄寵旌旄。方略頻傳霄漢高。中夜扁舟偕舂鍤。經年匹馬狎波濤。廟堂正切宣防計。簿領仍懸撫字勞。漸看海疆今沃壤。桑田兒女獻春醪。此為從事河工而作乃當日事也下二章追念前事

清時稽古獨優崇。詔許諸儒集禁中。花發上林春窈窕。雪晴阿閣日曛曛。直廬夜檢青藜照。講幄朝呈白虎通。痛定湘纍慙報國。阜囊無補但雕蟲。此懷武英殿修書而作

平生夢落五湖邊。竹馬重來事黯然。獨賜歡聲方動地。滯淫秋水又浮天。東南財賦無籌策。士女嬉遊有歲年。春樹萬家煙霧裏。白公隄上每流連。此懷治吳舊事而作公先為郡守後畧分藩故有竹馬重來之語

黃叔琳字崑圃直隸宛平人康熙辛未賜進士第三人官至吏部侍郎○先生年十九登第後庚午辛未諸舉人進士兩詣其第稱後同年讌會誠熙朝盛事云

柏林寺觀李晉王畫像歌

沙陀懷古趨僧舍。駐馬柏林還看畫。素綃拂拭生輝光。神威凜凜須眉張。紅袍玉帶結束好。唐季英雄一目眇。當時角立有朱三百戰。干戈人易老。國讐未復留遺恨。破碎山河安足問。莊明帶劍左右立。錦囊盛矢受遺訓。誰歟寫照妙入神。李家父子俱天人。鷹揚虎視空一世。經營慘澹傳其真。千載留貽歸淨域。世無別本須珍惜。捲圖四壁起英風。想象沙場萬人敵。寫出晉王英氣勃勃錦囊三箭宛然在目非此詩不稱此題

送孫文博之雲南省觀

此去行歌陟岵詩。短長亭外柳如絲。雨過山驛雞啼竹。風送江程狄挂枝。花下迎親依曉署。尊前憶弟夢春池。可能裁得相思錦。六六紅鱗寄莫遲。

高孝本字大立浙江嘉興人康熙辛未進士知涇縣績溪著有固哉叟詩

沒字碑

山巔樹石表。雷雨終不歇。捫讀了無字。傳是秦皇碑。東封銘功伐。曷詔丞相斯。或云藏金策。石函外覆之。亭亭霄漢間。觀者徒然疑。祖龍昔多詐。茲意諒可知。六籍既已燔。焉用文辭爲。將以愚黔首。徒令萬古嗤。沒字碑向無實指此以焚書愚黔首意實之應爲定論

登華山

萬古神靈嶽。三峰鎮雍州。首陽曾北裂。星宿此東流。臺駐軒皇躡。天垂白帝旒。行攜九節杖。長嘯訪丹邱。

誰開千尺峽。斷處若相連。豈有丹梯接。惟憑鐵綆懸。猿攀巖倒上。鼠伏穴傍穿。自度車箱谷。飛昇傲列仙。
劉君東郊述登華之險全憑鐵索鐵索以上復用倒攀旁穿詩中兩聯真寫得盡

直到神仙窟。陰陰紫翠濃。希夷雲際臥。毛女樹邊逢。二十八潭水。五千餘仞峰。煙霞都踏徧。欲跨兩茅龍。

贈王山史先生

紫氣行看近。重重嶺上雲。山尊秦二華。名重漢三君。獨鶴亭初到。如鸞嘯乍聞。欲依張楫市。可許一塵分。

鹿忠節公祠鹿太常善繼

自是胸藏十萬兵。提戈出塞事無成。廟堂不惜封疆壞。門戶惟知水火爭。辛苦四年隨相國。倉皇一死殉危城。白楊風急祠前樹。猶作金戈鐵馬聲。

姚弘緒字起陶江南華亭人康熙辛未進士官翰林院編修著有招隱廬詩

送閻荊州終養歸中州

驪歌聽罷惜離羣。折柳春城倚晚曛。日下重君能愛日。雲間愧我尙瞻雲。霞觴味並金莖賜。綵袖香從玉殿分。聖主恩深親未老。好承庭訓答明君。
三四自然雅切不入於佻

程文正字范村江南江都人康熙辛未進士官工部主事

采石李翰林墓

蒼蒼松柏繞層岑。謝眺青山葬翰林。天子呼來猶得謗。世人欲殺亦知音。煙迷墓杏漁樵路。月照樓空江海心。鸚鵡鷓鴣杯杓好。死生有約酒星沉。若世人不欲殺。是以尋常待之矣。語極警。極快。若黃九煙見之。必采入驚大集中。

錢王廟

霸業分星占斗牛。當年氣蓋海山秋。三千客自知羅隱。四十州空問貫休。鐵箭尙藏遺廟在。錦衣誰似故鄉遊。殘碑有字還堪讀。玉局鴻文筆力遒。三四本事作對。天然名警。

姚士陞

字別峯。江南桐城人。康熙癸酉舉人。著有空明閣集。

月夜泊慈水

舟泊聞宵柝。鄉心正鬱陶。岸蟲秋老急。江月夜深高。兒女懸雙淚。年華送二毛。嗟余悲失所。蹤跡獨勞勞。

送五弟

自注。時欲遊蕭山。

宦遊記汝懸弧日。一瞬滄桑十八年。早歲負薪廉吏後。重來衣葛故人前。出門含淚離慈母。長路衝寒值雪天。好認荒祠拜先子。江郎橋畔古壇邊。別峯考作令蕭山其弟生長署中。故有重來衣葛之語。

有懷

但分離處卽天涯。若個離家不憶家。自笑欲歸歸未得。也將歸信卜燈花。

顧圖河

字書宣。江南江都人。康熙甲戌。賜進士第二人。官翰林院編修。著有雄雉齋集。○太史韻語。都從性靈流出。無一言依傍。鄙意深喜。但所得詩只二卷。未見全帙。從前與令嗣善。不及一

借今令嗣已成
古人可惜也。

攝生

保國釋外懼。攝生留小疾。朽索馭羸馬。徐行百無失。中疎固其衛。獲少靳其出。割慾如守疆。謹身如縛律。不讀黃老書。淵冰宜戰栗。自恃強健。每易傷生。留小疾。正以攝生也。固其衛。靳其出。得老氏精蘊。

任運

善走須得途。邪徑不可行。善博須得盧。不關人力成。達人期任運。世路誇趨營。百慮輸一忘。百巧輸一誠。不見信天翁。亦得全其生。慮輸於忘。任運也。巧輸於誠。任運中有工夫在。更說得密。

息交

君子如春風。可愛不可竭。小人如酒顏。但得暫時熱。急弦莫浪彈。一彈弦一絕。市交莫浪交。中路難固結。惟當同心人。可與論金鐵。狀小人之交。喻新而確。連上二章。皆閱歷有實得語。

諸葛銅鼓

武侯未築祁山壘。先出偏師渡瀘水。人言孟獲不足擒。股掌玩之徒戲耳。豈知北伐用南夷。正欲中原掃讐恥。棘人笮馬供鞭驅。羅鬼烏蠻皆效死。至今銅鼓散山谷。崗戶流傳尙誇侈。精銅其質革其音。想見援枹兵四起。烏虵龍虎倏離合。戎機萬變人難擬。曾傳八陣有遺蹟。更說旗臺餘故址。此鼓千年尙宛存。血

戰消磨土花紫。君不聞定軍山下陰雨中。山鳴雷動聲隆隆。埋鼓鎮蠻功未畢。反旗走敵恨無窮。公之平南夷正

爲北伐計也。議論正大。寫銅鼓處亦有聲。

斷硯歌爲姜西溟先輩賦硯爲家梁汾舍人擊碎

姜侯硯小纔如掌。玉膩金清世無兩。隴廩發采宜毫爽。酒半傳觀各誇賞。舍人怒起奪之急。嫚罵何堪一錢直。奮槌頓似玻璃拆。滿座失聲留不得。物之成毀有由然。舍人辯口方便便。君不見姜侯醉作草聖狂而顛。怒猊跏趺龍蜿蜒。又不見姜侯著書卷幾千。抵突彪固追談遷。脫手便有風雷纏。廟堂頗復急此賢。諸公百僚壓其巔。祿米不救飢窘煎。焉用此石空鑽研。羈窮白首默自憐。嗚呼。胡琴摔破不復絃。唾壺口缺那更全。姜侯乃煎鱗角鳳背之膠。重綴聯玉蜍吐水調松煙。摩挲自謂石可田。石鄉可遊吾老焉。借舍人口中極抒憤懣不平。歸到姜侯恬然自安。尤見身分。若無此結。易流於麓。

天平山

山遊窮日返。絕勝數天平。偉石皆人立。欹崖忽鳥驚。僧龕雲共住。樵路鹿兼行。耳畔猶虛響。淙淙落澗聲。

呂履恆

字元素。河南新安人。康熙甲戌進士。官至戶部侍郎。著有夢月巖集。○少司農時。言詩者多欲尊宋祧唐。而作者志趣不但不落唐以下。并蘄追六代以上。而從之。可云特立獨行者矣。

今後人之詩。尙能篤信家學。

祖越寺至羅漢洞

空山寂無聲。鐘磬自生響。宛轉松石間。忽來雲鳥上。筋骨未遑安。耳目已豁朗。巖腹正中穿。出入隨俯仰。混沌誰開鑿。玲瓏非意想。仰視縹緲峰。天表撐一掌。其上有飛觀。安能度袤廣。自非餐霞人。邈然不可往。

出入隨俯仰五字。

寫盡穿洞神理。

關門行自注新安一名鐵門

哀陳公也。公諱顯元。楚之蘄州人。崇禎壬午。令新安。以息民爲治。時洛郡失守。屬城邑皆墮。公率民登鐵門砦。日夜守陴。不爲動。賊檄公。公碎其檄。大罵。賊怒。并力攻之。砦啓。無少長皆屠。公走且呼曰。糾民守死者。縣令也。宜殺某。勿苦我民。賊不顧。公持其刃。呼益急。遂殲焉。其子某亦遇難。遺民三十六人。爲負土築墳。予聞諸父老云。

澗水奔山齧石根。逆流百折趨鐵門。鐵門山上壘。培在居民曰是陳公屯。瓦礫崩翻燒黔黑。荒塚草白天黃昏。猶傳壬午世。反側函谷關。潰無完邑。我公陟巘。闢巉石。率民堅守。勿降賊。賊移檄文。謂公語。彈丸區區。何自苦。公揮礮石。擊賊軍。雙皆俱裂。豸狗鼠。黃巾萬衆。并牛力。飛鏃滿眼。天地黑。累卵難支。巢樹傾。蒼顛黃口。遭剗磔。更張空拳。無所懼。齧齧血頸。僵不仆。同時哲嗣。亦罹殃。遺民負土營雙墓。吁嗟乎。天柱地維。昔崩摧。金城鐵甕。空崔嵬。北門鎖鑰。墮燕薊。上東門亦軍延開。迎降倒戈。滿眼是公。獨守死。何雄哉。春來杜宇。猶啼血。瓦棺不朽。常山舌。落落青松三尺堆。常照嵩峰萬古月。

早發褒城

旅客聞雞早。征車發驛亭。江城搖落月。石棧出寒星。林啓前村白。天迴遠岫青。七盤關下水。幽咽不堪聽。

梁州

蜀道天難上。梁州路已遙。岷嶓蟠北戒。江漢導南條。落日七盤嶺。晴天萬里橋。獨留懷古意。歌哭未能銷。

留別漢南諸子

白起城邊草。年年怨別離。漢王臺上月。夜夜照相思。歧路自茲去。故人何處期。涔淫數行淚。東盡漢江湄。
茲取其格不在語言之工。

棧中

九折征鞍一敝裘。壯遊心曲在梁州。山當子午縱橫處。水落褒斜日夜流。秦氏餘威碑字滅。漢家殘燒石痕留。昔年義舍勞尋問。衰草寒煙見旅愁。
前七子中。近李北地。

潼關用崆峒原韻弔孫司馬

漢京形勝枕雄關。指顧山川一掌間。地險半開函谷月。天青唯見首陽山。中官催戰來何疾。司馬揮戈去不還。萬古黃河流血淚。春風慘澹旅人顏。
弔孫傳庭也。傳庭幾滅寇。因天雨催戰。而敗。傳庭死而明亡矣。一結深惋痛之。

金川門詠史

金川北望日黃昏。聞道燕師入此門。不見古公傳季歷。祇知太甲是湯孫。風雷豈爲鴟鵂變。江漢難招杜宇魂。南渡降旗何面目。西山省恨舊乾坤。議論正音響高此種詩用全力而成。

孫大帝廟

仲謀才志擬難兄。江左開基事竟成。讐國稱臣緣底急。同盟歸妹卻相傾。南邦文武材何在。東鄂江山蹟已更。惟有遺宮傳避暑。古苔荒草對孤城。降曹丕而謀西蜀何顏見桓王於地下耶。愚嘗有句云彼亦豚犬流烏足稱英雄。

荊州懷古

嘗思痛飲讀離騷。萬古傷心在二毛。風雅以還兼正變。懷襄之際獨憂勞。同官已妬能文寵。弟子猶傳和曲高。此日九原難可作。東門隱隱見蓬蒿。頷聯寫盡屈子生平。

嚴子陵祠

自注祠在鞏縣。

霜落秋城木葉舟。客星祠畔肅衣冠。故人無意驕同臥。天子何能屈一官。嚴瀨江山空浩渺。原陵松柏自高寒。東都多少知名士。不及冥鴻一羽翰。

山海關

天際重關虎豹扃。前瞻雲樹尙冥冥。山餘落日千峯紫。海瀉遙空一氣青。漢塞烽煙亭壁壞。秦城膏血土花腥。漫吟碣石東臨句。絕代雄才敢乞靈。

許由塚

青山頂上一孤邱。俯視陶唐十二州。偶使人間知姓字。遂教潁水瀉清流。

荆山自注懷遠即卞和采玉處有抱璞巖

玉蘊山輝自有期。匹夫銜璧罪何辭。那知太璞元來貴。不在連城互易時。見玉之貴不在既剖後也。爲比德於玉者。增長聲價。今之抱璞者。急欲術奇於人。何哉。

陳璋字鍾庭。江南長洲人。康熙甲戌進士。官至翰林學士。著有東冶集。○學士係左之先生令嗣韻語克承家學。卽應制詩亦不膚浮。其本領可知矣。

閩山雜詠

初識南甌路。灘船匝月程。江留螺女迹。臺記越王名。地氣三春冷。天時半日晴。誰呼行不得。江上鷓鴣聲。
屬國滄溟外。雄圖壓巨鰲。城隅防鼠雀。市上賣弓刀。旗鼓雙峰雨。樓船八月濤。將軍今坐鎮。冠蓋路相高。
萬井山環抱。南圖亦壯哉。槎從天漢上。門傍海雲開。烏石藏幽寺。青榕蔭古臺。到今傳壁荔。壇坵願追陪。
七月己未恭接誥命

少作貧家婦。歸寧更不歸。九京加翟菲。六月感牛衣。自注前室王氏。歸余纔半載。旋有歷下之行。遂成永訣。故鏡照顏慘。宵鐙入夢稀。此生同穴誓。何日重相依。

過張桓侯故居

漢鼎三分日。桓侯戰伐高。心猶輕馬趙。氣已奪孫曹。鹵莽生何惜。精靈死亦豪。英風留涿鹿。不翦舊蓬蒿。
不墳故實。自是桓侯。移壯繆不得。

秋獵應制

羽林按部下天閭。大漠風高兩翼張。獵火燒原秋草黑。陣雲圍磧暮山黃。太平不廢三驅盛。神武能調七萃良。應有非熊占吉夢。遊畋自古陋長楊。

滄洲兄席上詠冰

客醉宜供醒酒冰。水晶盤內露寒稜。直疑夏月常堆雪。不待秋風始掃蠅。裁作花紋看頃刻。削成山勢笑憑陵。多君心地清如許。好爲人間散鬱蒸。
兩聯俱構句勝。予前奉敕和御製詠冰原韻。中云蠶種應知幻。山容未許憑遙遙。印合。

西出居庸關

西出雄關路屈盤。風雲重接舊征鞍。山如屏合窺天小。水作虹流入耳寒。萬里女牆連雁塞。百年兵甲洗桑乾。太平氣象無中外。鎮朔臺高立馬看。

閩灘竹枝詞

船如紙薄不經風。三扇低遮箬葉篷。萬丈龍潭千尺浪。也堪愁煞鐵梢公。
閩諺有紙船鐵梢公之語。

虎踞龍蟠似此無。風雷怒挾一舟孤。千堆亂石排刀劍。直作南陽八陣圖。

張逸少字天門。江南丹徒人。康顯甲戌進士。官至侍講學士。

北征凱旋詩

獨斷行天討。親征下詔書。六師誰敢敵。萬里摠長驅。列缺轟雷礮。橫參耀隼旟。鈎陳環紫極。肅肅護儲胥。變化鳥虵陣。橫縱虎豹韜。風生羣馬嘯。日落大旗高。御仗森金甲。軍鋒淬寶刀。勝兵嚴壁壘。誰敢卸征袍。聖澤如時雨。軍中盡感恩。犀衣頒七校。駿騎給千屯。令自秋霜肅。綸同春日溫。衆心連指臂。飲馬黑河源。神兵天上落。迅疾下蘭臯。螳臂當車轍。洪爐燎羽毛。妻孥俱自盡。醜類敢潛逃。已奏犁庭績。應將弓矢囊。

地中鳴鼓角。天上落將軍。已爲勝兵。況天子自將從天而下乎。一氣相生。無一懈筆。六章中尤推神勇。

俘謀邀寬典。恩先赦脅從。軍門齊款縛。聖度自包容。日逐誠難赦。昆邪亦可封。因知沙漠外。頰首望顛顛。掃穴傳方略。豐碑勒武功。亦曾資衆策。只自斷宸衷。戰伐夷頭曼。威名儼有熊。歸來頒賞賚。燕饗賦彤弓。

親征至凱旋。六章已備。章法句法字法。無弗老成。應推能手。

高其倬字章之。奉天鐵嶺人。康熙甲戌進士。官至戶部尙書。謚文良。著有味和堂集。

行役曉發

飛鳥翔遙林。銜哺戀故枝。人生重離別。況我親衰時。升堂告行役。暗淚腸中垂。未言向何處。先說還家期。慈親起送我。語好顏色悽。愛我不便哭。願我平安歸。家貧萬事乏。供饋倚病妻。嫁衣典已盡。不復餘襜幃。

男兒羞低顏。舍子將語誰。在家同一愁。出門成兩悲。傷心最何物。雙輪八馬蹄。今日行門前。明日行天涯。塞水鳴咽流。木葉高下飛。天晴尚愁人。風雨秋淒淒。舍至情無以成詩。先寫慈親之慈。次寫閨中之賢。萬事倚託。字字從心坎流出。與東野遊子吟可以並讀。

古北口

九邊雄寰中。古北乃其一。北顧闕居庸。南境抵遼碣。屹然介其間。長垣兀積鐵。高冒峯巒巔。低竟蛟龍窟。晴空展虹霓。海勢現城闕。千里不可窮。隨山遠曲折。城頭一抔土。黎庶九州血。作俑趙與秦。流弊及明末。貂璫秉國成。書生搃戎律。志擬封狼胥。兵不踰房鬪。颯沓西風來。萬騎射南月。騰凌在俄頃。若蹴蚍蜉堞。深源竟喪師。無忌空抱節。可憐邊沙中。青燐照白骨。城同夏鼎傾。事與秋煙滅。齷齪何足論。階厲病前哲。不見張韓公。築城門不設。從來守邊術。能戰守可說。更有必勝方。千古同一轍。赤子付龔韓。白麻命蕭葛。奄人乘成。豎儒總戎。撤撤佛佛。驅赤子爲白骨矣。未見能戰方許能守而要歸。於循吏之愛民賢臣之執政誠拔本塞源之見也。此種正論。可以勒諸金石。

曉行

蚤行無定時。愁客苦夜永。出門望明河。月在西峯頂。木葉落衣上。馬蹄踏人影。荒雞樹上啼。秋星露中冷。情愜耳目幽。身倦道途迥。擘碯聞車聲。更上東南嶺。四更山吐月。殘夜水明樓。讀者如親見其景。出門望明河二語亦然。

薊州新城

于役季冬月。東入漁陽城。城圯五十載。奉詔新經營。塘堞一云具。築作工遂停。胡不事宏麗。役物勞皇情。

此州實險要。世界方昇平。長馭控八極。內地固所輕。昔當明之季。置鎮藩神京。高起兩重郭。遍徵九州丁。城中貯芻粟。城上羅旗旌。薊門大帥任。鄭重屬老成。高議百僚會。推轂千人英。且復命丙魏。不啻求韓彭。陛辭涕洟瀾。密詔言丁寧。志鳴伊吾劍。意洗魚海兵。長計一蹉失。塞馬仍縱橫。連營一日潰。列嶂同時崩。塵來白日匿。燒猛蒼天頽。九門戒樓櫓。六府嚴關扃。平安一星火。重比千金瓊。傳呼達禁闥。夜寢始不驚。外召勤王師。內辦遷都行。下詔責專閫。幕府空搶攘。擁兵不敢救。閉壁如聾盲。偵敵已出境。追騎甫及垆。殺人取其元。受賞都堂廳。纍纍鞍上級。一一田間氓。更奏塞外勛。肯恥城下盟。懦帥肆欺謾。勅敵生門庭。既以殺其軀。患亦貽朝廷。嗚呼厲有階。夫誰滋亂萌。或云右文士。誤國由書生。或云吝邊餉。饑卒難力爭。南史與董狐。百喙同一聲。敢獨曰不然。奄寺實彗熒。監軍專將柄。司禮爲阿衡。衆賄水輸海。百度禾生螟。撈筭殺壯士。羅織戕名卿。剛鯁靡子遺。媵媵忌忠誠。肯效鷲鳥擊。轉畏走狗烹。潢池弄兵者。竟射承天闕。緬維開創初。明祖垂家型。內官止四品。洒掃供使令。外事付卿貳。著戒在宸屏。孰畀鐵牌毀。坐見九鼎傾。惜哉興戎首。未正司寇刑。我皇法殷鑒。典制原六經。寺人無官階。置員有定程。衣冠帶履外。越者誅竄并。皇皇一王法。萬世其勿更。願獻五百字。勒作城隅銘。軍政之壞。至殺百姓以獻級。大帥猛於盜賊矣。而其賊蜂起。而宗社隨以隕焉。明祖初制。誰實毀之。至於此極也。末歸美本朝典制。禁輯寺人。真可垂法萬世。○攘音疇。前漢賈誼傳。國制搶攘。師古讀爲僇。疇亂貌也。

碧雲寺

崔巍碧雲寺。壽安山南陬。前貌衆龍象。後植千松楸。于經首作俑。魏豎復效尤。規制駭心目。宏麗無匹儔。近屏羅翠嶂。遠勢交迴洲。石室窈中空。繚垣屹外週。鏤階鳳雛襪。琢壁龍虬鏤。僭侈陋陵闕。豈止逾王侯。當其繕構際。乾坤困徵搜。攻石千仞岡。輓材萬里舟。蒼生莽奔竄。四海輸琛賂。卿相稱義兒。穢名豐碑留。刑餘胡敢然。童昏寄垂旒。紵臂奪之柄。蠱腹心舌喉。鉗鎖殺喬固。軒墀延共兜。上擅天賞罰。下快私恩讎。敵張寇盜熾。木蠹禾生蠹。罪雖淪一族。禍乃延九州。高廟血祀斬。泗鳳戕松楸。思陵葬無所。麥飯矧可求。昌平寒食日。春慘風颺颺。民家敗紙錢。吹挂陵樹頭。窮奇舊衣冠。乃得歸巖幽。百年有餘恨。烈士涕橫流。偉哉張侍御。一洗異代羞。仆碑剗名字。伐冢爲平疇。茲事良義舉。我更借箸籌。聖賢律既往。褒罰語不浮。善固揭百世。惡亦昭千秋。誅姦賴直筆。不繫塚去留。上世戮鯨鯢。封骨高嶠嶠。請肆彼遺骸。存此招魂邱。用之作京觀。事異理亦侔。覆轍留眼前。後車庶迴輟。殷墟歌離黍。鑒之者有周。作詩述胸臆。以俟采風輶。

張祁門請削魏閣墓事。諸名家詩多有之。詳盡無如此篇。竟可作魏閣傳讀。○徐善泠然志。謂忠賢戮屍後。未聞墓葬。或甲申國破後。其黨爲之王敬哉。又謂天啓三年。忠賢拓于經墓。立塚於後。二說不同。豈營墓於天啓中。而葬於甲申後耶。

與熊敏思登蟠龍山頂望都城值大風有感呈敏思

城中拄頰看西山。千峯歷歷橫眉端。山頭倚杖望城市。萬雉鱗鱗在足底。左有潞水右太行。桑乾流合東南方。王氣中開千萬禩。上應北斗興明堂。瓊樓十二門九閣。王侯甲第麗青春。大風忽起白晝昏。俯視一

氣不可分。唯見參天蒼蒼之綠樹。蔽空翳翳之浮雲。浮雲綠樹朝復暮。英雄豎子俱成塵。君不見石甕山中耶律墓。碧雲寺後于經墳。連雲樓觀已傾圮。滿山松柏摧爲薪。天邊紅日不肯回。頭上白髮仍相催。攀龍附鳳有時輩。餐腥啄腐非吾儕。與君無何日飲酒。買山著書歸去來。登高望遠每暢高情。況於帝王之飛動之氣行之。此章又近太白。

秋宵

離抱何時釋。秋宵特地長。夢迴仍遠塞。月好是殊方。蠟淚紅垂地。蛩聲寒近牀。遙憐多病後。吟罷正迴腸。

寄內

溼雲低似幕。永日坐如年。風雨方如此。歸期愈渺然。深愁通日夕。遠夢共山川。無計憐貧病。親衰賴汝賢。

和許子遜中秋風雨後看月原韻

風雨初更歇。涼蟾已在天。涔涔終不溼。炯炯只孤懸。髮映千莖白。秋逢兩度圓。三吳烽燧靜。絃管自年年。

過長平驛感坑卒事有作

丹水橋邊落日明。頭顱山畔晚煙生。十年碧血無遺燐。幾簇黃沙有廢城。陰密復冤酬上黨。新安坑卒祖長平。紛紛豎子真兒戲。齒冷西來阮步兵。

劍門

兩崖對起削雲根。邸閣全傾佛寺存。千古衰興幾蠻觸。一龕鐘鼓自朝昏。無人戰鬼啼清晝。不夜於菟到驛門。蜀道荒涼身萬里。不聞鈴雨亦消魂。

修法海字淵若。滿洲人。康熙甲戌進士。官至兵部侍郎。著有悔翁集。

詠鶴

丹頂由來異。玄裳自少文。生成雲水性。偶與鳳鸞羣。翹足憐孤影。乘軒恥俗氛。長鳴因警露。豈爲九天聞。
通體自寫懷抱。風骨獨高。

送查悔餘還鄉兼寄賈奠坤

生平文字友。引疾得休官。老去身須惜。歸來夢亦安。江風吹浪急。山雨逐人寒。惟有憐同調。長嗟離別難。憶昨青雲侶。偏承恩渥殊。出同陪羽獵。入共侍蓬壺。老境憐分散。天涯各一隅。秦郵如過棹。爲我問珠湖。
周起渭字漁璜。貴州貴陽人。康熙甲戌進士。官詹事府詹事。○貴州向日未聞詩人。又因天遠無從蒐羅。故祇采漁璜前輩。又未得全稿。所收從略。俟異日更徵求之。

武陵爲人寫北窗高臥圖

陶公臥北窗。夢寐無令人。豈惟無今人。頽然非此身。何處無北窗。臥者少真淳。胸中失佳趣。几榻俱埃塵。吾子雖今人。宛然葛天民。攜枕入華胥。遂卜柴桑鄰。蕭條掩三逕。松菊相與春。可知夢醒間。莊蝶孰爲真。

偶然南風來。吹墮漉酒巾。

避風赤壁登蘇公亭放歌

今日江頭風勢苦。黑雲從風散爲雨。波聲撼場郝子城。濤頭逕射白龜渚。猶似周郎萬騎橫江來。千艘撇
擗聞驚雷。咫尺南北不可辨。際天煙燄紛成堆。舟人繫纜垂楊陌。忽見峭壁鑿天地崩坼。髯蘇一去青山
閑。老子今朝散輕策。崔嵬亭子江之濱。壁上二賦猶鮮新。人間風月不可駐。天上來此閑仙人。秀骨疎髯
脫囹圄。詩不能茹酒不吐。吹脣沸地羣狐狂。遣作江山文字主。東坡黃桑手自種。廢壘蓬蒿耜親舉。平生
食飽愛閒行。浣壁汗牆到氓戶。武昌樊口丹楓稠。載酒還作凌雲遊。清波白月在人世。素心孤鶴橫天浮。
忽憶美人思魏闕。自驚流落天南州。我拜遺像空山陬。巖桂慘澹枝相樛。悲風入座髯颯颯。大江茫茫東
注愁。二惇二蔡俱蟬蛻。唯公大節今古留。當年欬吐驚龍蚪。洞簫鳴咽聞中流。長嘯一聲煙潦收。如此江
山如此客。縱無詞賦堪千秋。思公不見余空返。楚塞風和白石晚。柳外人家竹籬短。明月正照黃泥坂。二惇

二蔡羣狐跳跟。適使坡公爲江山風月主人。小人之謀。無往不福君子也。中段渾括赤壁二賦。筆筆凌空。

南隄踏青因留觀音寺小斂

選勝雖無獨樂園。出城半里卽山樊。雨餘朝麓嵐光別。人比春禽笑語溫。花霧陰時迷遠浦。柳煙開處見
漁村。憑君莫話金山約。玉帶因緣恐斷魂。

山陰舟中

越山巖壑鎖煙霞。此日輕舟泛若耶。紅雨棹邊迷遠近。綠蘿陰裏見桑麻。啼鶯過水仍棲樹。乳燕銜泥半帶花。試訪剡中幽絕地。不知何處戴逵家。柳烟開處見漁村。乳燕銜泥半帶花。宋子虛集中時有此種佳句。

焦袁熹

字廣期。江南華亭人。康熙丙子舉人。著有此木軒詩。

雜詩

四氣自潛運。陰陽互來往。春風何必多。碧草日夜長。一樹生空庭。婆娑不堪賞。舊業靡遺餘。生意久天枉。天心非不仁。物性固難強。睇彼桃李顏。徒倚增悵惘。

經生歌

蹄涔之水不生淪漣。覆簣之山那有雲煙。章句微細必無豪賢。可哀哉。說經鏗鏗。乃畢吾之餘生。見死守不能有爲也。此章與體。

蒺藜

爰有蒺藜樹之中庭。日月幾何。維葉青青。青青之葉不可採擷。凌彼嘉卉。自以爲傑。念汝非種。亦天所生。憐而勿鋤。乃傷我於行。嗚呼。疇昔之日。有一溉之德。不以爲德。肆爲殘賊。蒺藜蒺藜。誰其樹之。於汝勿尤。但焉自思。加惠小人而小人反欲傷之。乃絕無怨尤。而咎已無知人之明。究之過於仁。不失爲君子之過也。此章比體。

秋蟲

切切訴何事。無人知汝心。正繁燈欲死。乍斷月應沉。申旦誰能那。悲秋自不禁。癡人偷向壁。側耳一相尋。
他人用在中間者。此用作起手。便覺突兀。此法得之少陵。

謝方琦

字應雲。江南宜興人。康熙丙子舉人。著有東墅集。

雨中送客

北風驅寒雲。蕭蕭亂松雨。前山忽杳冥。不辨溪頭樹。漁父邨外歸。牧人煙中語。翩翩東來鳥。悲鳴尋故侶。惆悵別情人。挂帆何處所。

雪後送殷介持歸膠城

朔風蕭蕭林竹折。曉來門外千山雪。有客淹留陽羨城。愁聽旅館雞聲咽。仲文儒雅舊知名。漂泊江湖百感生。故園東歸歲云暮。斷冰寒月他鄉路。村橋早發行人稀。凍浦舟橫不敢渡。朱門重裘被僮僕。文章不救窮途哭。短衣衝雪君毋悲。寒士何當謝荒谷。君不見少陵廣廈空高歌。江上秋風捲茅屋。
雪後所送客。自是不得志。人於其歸也。以杜老之秋風茅屋比之。村橋早發一聯。寫雪後如畫。

送友人之楚

殘雪梅花月滿庭。送君移棹訪湘靈。幾行歸雁雲邊斷。無數寒山江上青。罨畫一尊虛載酒。武昌孤劍又

侵星平生漫說無同調。好向三閭弔獨醒。

春閨詞

林外子規啼。數聲窗欲曙。憐妾最傷春。語語催春去。子規似解人意。其實春去之感。過于傷春。仍是敗人意也。最近崔顥崔輔國小詩。

何

梅字雪芳福建寧人康熙丙子舉人官建陽教諭

望接筍峯不得上

入洞疑無路。虛無接筍梢。鈎梯仙鬼半。鐵索死生交。人影猱升木。僧寮鶴架巢。那能乘羽化。絕頂共誅茅。

險語破鬼膽

三山歸舟

雜詠之一

閩溪不可上。上若上青天。纜向峯頭繫。舟從石罅穿。晴空排虎刺。急瀨吐蛟涎。賦命真窮薄。頻年往復旋。

沈

育字配蒼浙江嘉善人康熙丙子舉人官永寧知縣

臯陶祠

虞廷推執法。才子產高陽。主德寬三宥。臣心慎五章。訐謨同禹益。姦宄服蠻荒。遺廟楊侯國。青松近北邙。

慎五章較東坡殺之三爲得體

郭有道墓

東漢多賢達。人倫君最優。士林爭折角。仙侶羨同舟。品在君宗上。名超清濁流。中郎碑不見。論定足千秋。
郭有道人品在南北部諸君之上。五六語品評愜當。

雞頭關

雞頭山勢迥。人馬半空旋。風御千盤磴。雲遮一握天。猿聲深樹外。鳥道夕陽邊。漸喜關南去。悠悠入漢川。

謁董江都祠墓

興慶池南下。馬陵廣川魂。魄古祠憑。旁搜典籍。秦灰後。首應賢良漢。詔興一代師。儒崇道義。諸王子弟斂。驕矜可憐。年少長沙傅。太息徒勞。淚滿膺。崇道義。卽所云正誼不謀利。明道不計功也。下以能服驕王言。二語已該廣川生平。

王

焜字大生。江南嘉定人。長洲籍。康熙丙子舉人。官丹徒教諭。著有考槃集。

短歌行

親交莫絕。秉燭莫滅。來日孔懷。如何易別。營營百年。萬慮難捐。在樂滋憂。當歌慨然。人生如蠶。食桑於野。桑少防飢。桑多防瀉。繭成自殉。竟何爲者。我欲終此曲。揮淚不能長。白頭莫照鏡。照鏡悲流光。在樂滋憂。樂中有憂。孟子充虞路問。章可證也。繭成自殉。蠶猶有功於世。人之飽利而死者。并遠不如蠶矣。警勸世人不少。

贈蜀使

尊酒此時別。猿聲他夜同。江連白帝郭。月照漢王宮。蜀棧孤軺外。彭門積霧中。使旌隨雁盡。留夢繞蠶叢。

虎邱二姜先生祠

掖垣抗疏觸天威。拜杖淋漓血染衣。遠戍孤臣終守節。罷官難弟竟無歸。宣州藁葬依靈爽。茂苑荒祠隱翠微。下馬行人奠椒醑。千秋孤竹並光輝。他人弔二姜祠者。但表給諫。而行人闕焉。此兼及行人之去官避難。乃見周密。

許

遂字揚雲。廣東番禺人。康熙丙子舉人。官清河知縣。

山月

不知誰抱鏡。挂在白雲岑。萬壑照成雪。梅花寒一林。美人此遙夜。千里結愁心。解帶松風下。霜華流素琴。格高氣清。如出屈翁山手。向閱揚雲稿。獨賞此篇。近見廣南選本亦然。詩取可傳。不在多也。

周士彬

字介文。江南婁縣人。康熙丙子副榜。著有山舟詩。

蟲災艱食賦以遣意

力稼冀有秋。螟螽害糜芑。非無負郭田。突煙寒不起。攜錢鬪土芋。矻矻雲山裏。盈筐遂忘疲。持歸餉妻子。杜陵勞拾橡。柴桑欣採苡。身悴神常怡。先民安素履。啾啾林杪禽。飽葢聲歡喜。何人抱窮愁。戚戚成愚鄙。撫琴寫素懷。松月明窗几。天憐樂飢人。豐年行轉矣。於艱食時。傳出樂境。胸中本有樂也。

營巢燕

雙燕銜泥葺巢壘。飛去飛來掠煙水。巢成抱卵意苦辛。忍飢終日伏巢裏。哺養新雛四五子。衝風冒雨尋

魚蟻燕雛羽弱飛難起。母燕呢喃翔復止。一朝相引向天飛。子去母歸誰顧視。獨有前林慈乳烏銜恩反哺情無已。此等詩可教孝。

揚州

青樓歌舞勝杭蘇。花月神仙摠一途。騎鶴腰纏爭艷羨。無人解道董江都。咏揚州詩者多及陳隋遺事。獨拈出董江都令人耳目一醒。

嚴虞惇

字寶成。江南常熟人。康熙丁丑。賜進士第二人。官至太僕少卿。著有嚴太僕集。○太僕六經皆有述作。而讀詩質疑二十卷。尤有功詩學。古今體詩略爲寄興。然亦不苟同於人。

咸陽懷古

六王畢後霸圖空。三百離宮一炬中。八水淒清秋色早。九巖巖窠夕陽紅。車迴博浪沙中客。舟引蓬萊海上風。自料驪山萬年計。豈知遺恨在樵童。博浪一擊。雄威盡奪。神山難到。妄想空存。祖龍自思。亦有黯然色沮。啞然失笑者也。遺恨樵童。用牧羊兒失火之事。

奉和東山對月有懷之作

十年一夢鬢垂絲。禪榻茶煙事最宜。正是空江明月夜。相逢尊酒落花時。傷心暮雨還朝雨。瞥眼桃枝更柳枝。身似荷珠原不著。從今學道未嫌遲。三四忘乎對偶之跡。神到時有之。

秋宵讌集酒闌漫興得孃字

客裏經秋祇自傷。況逢明月倍淒涼。悲歌燕市尋屠狗。寥落江潭解佩纓。天上已歸秦弄玉。人間重見杜韋娘。酒闌曲罷渾無寐。疑是維摩證道場。

姜宸英字西溟浙江慈谿人康熙丁丑賜進士第三人官翰林院編修著有葦間詩集

徐健菴編修筵上觀洗象

長安六月三伏始。主人門對御河水。御河流水聲潺潺。玉泉奔赴城西灣。是日都人看洗象。立馬萬騎車千輛。曼延蹴踘羅岸旁。吹角鳴鉦沸川上。滿堂賓客何從容。棋局未了酒不空。日中報道象奴出。至尊朝罷明光宮。魑形詭貌三十六。一一騎就深潭浴。雲起乍疑龍蜿蜒。湍迴更與人翻覆。須臾小吏前推排。將軍拔營羣象回。就中一象行躑躅。齒毛脫落顏摧頽。長者謂余豈解事。此物經今不知歲。聞說先朝萬歷初。貢車遠自扶南至。中更四帝時太平。一朝闖賊殘神京。忍死不食三品料。俯首淚下聲哀鳴。滄桑變換忽塵夢。勉強逐隊留殘生。茫茫舊事君莫說。勸君且飲杯中物。流寇破京師過象房羣象哀鳴淚下比於唐之舞馬此日所存者其一也滄桑之變

哭魏叔子二首

鸞江哀輓一時聞。惜別他年悵離羣。天末無因能致醉。夜臺誰與共論文。江山寂寂歸魂斷。葭菼淒淒去路分。尚有蔡邕書籍在。獨隨秋草伴孤墳。

苦節誰云不可貞。翠微山共首山清。更無安道能求死。只有韓康解避名。遠媿文章當紵縞。不教官爵累銘旌。臨風一慟江天豁。未覺前賢畏後生。已未鴻博叔子徵召不至故有韓康避名句

一春強半是春愁。淺白長紅付亂流。剩有垂楊吹不斷。絲絲綰恨上高樓。

卷十九

汪士鋐

字文升。江南吳縣人。康熙丁丑會元。官右春坊中允。著有秋泉居士集。

陳滄洲太守出瘞鶴銘於江中以搨本見示作歌記之

焦山山崖瘞鶴銘。雷擊墜江江冥冥。一旦水底出至寶。神物焜耀含精靈。此碑書家最珍惜。欲搨恐犯蛟龍腥。致令贖本遍天下。刻畫嫫母誇娉婷。或傳此是右軍跡。逸少二字疑足徵。或云弘景或顧況。未覩真跡憑圖經。滄洲使君好古士。搜奇抉怪心無寧。竭來江邊問遺碣。太息墨寶存空亭。時當窮冬江水涸。巖洗刮平沙汀。或側或仆露奇字。磊落散布如天星。命工舁石置江岸。殘筆剩畫稀留形。重依舊石定方位。安排字跡還儀型。屹如陰崖立華屋。恍然峭壁開新硯。字體寬綽近古隸。鋒稜雖剗光晶瑩。睇視山中宰相筆。齊梁風格我所憑。何年埋沒忽露洩。水府倏忽仍邱陵。吾吳太守素神異。驅使直可到六丁。狼貪虎噬且弗避。麾斥水怪如蝮蛇。世間寶物久必顯。雲日肯被煙塵暝。扶傾固待巨人手。此舉便已喧驚霆。遠道寄我喜創見。從今摹畫希精能。此石此銘不再得。毋使日夜椎搨無留停。

插秧圖

車軋軋。水活活。誰家田翁勤種田。插秧田中量疎密。呼童課僕運秧馬。俯首泥行股無骸。今日車水滿。明日祝秧活。不知何日秀且穎。築場刈禾賦秬秠。大兒讀書如養苗。勿忘勿助不敢擾。小兒讀書心孔開。惟恐鹵莽與滅裂。主人有田復有兒。書味酒香滿一室。呼童留客和田歌。田家之樂樂如何。寫田家樂事。令人神往。但恐兒

子讀書不免漸失眞朴奈何。

徐

發字袞侯。江南長洲人。康熙丁丑進士。官戶部主事。

早春

新月如鈎挂碧空。六街遊眺興無窮。隔牆歌管娛殘夜。出窖名花媚好風。珍惜飛鳴憐病鶴。消除矜躁仗枯桐。盍簪招取同心友。把酒應多酌次公。出窖花。所謂唐花也。三春花一時並開。夏季花則不能矣。

春分日和韻

一半春光付柳條。可憐天氣是今朝。尋芳每踏蒼苔路。夢別重經紅板橋。零落梅花人共老。淒其燈火酒全消。遙知鄉國清明近。水漲橫塘隱畫橈。

陳

菴字玉文。江南吳江人。康熙丁丑進士。官桐廬知縣。著有雪川詩藁。○清如鏡淨如拭。意味稍澆。而眞氣獨存。賢於餽釘爲博。纖佻爲工者。

臨終詩二首留別諸同志辛卯中秋後二日

兩曜無停機。委運固其理。修短良不齊。誰復能逃此。俗士戀其生。涕泣對妻子。達士輕其生。鳶蟻均一視。二者皆棄天。有識所深鄙。君子則不然。奉之以終始。生有所以生。死有所以死。吾聞諸曾子。至死而後已。俗士貪生。人知其非。老莊達生。共推爲高矣。此見兩者均非。一歸於存。順沒寧。纔是吾儒正學。

我有同心人。道義相友師。頻年喪逝多。存者復別離。卽今將去客。欲別無由辭。丈夫會有志。豈爲兒女私。所恨在世日。孤負箴與規。臨風一長歎。願爲諸君期。百里半九十。一簣功莫虧。鑒戒不在遠。請君視此詩。前章自矢。此章規友。見一息尙存。不可忘臨深履薄之功也。說理不腐。況得於臨終時。足徵平日敬身之功。

發南陵

一路寒泉送客程。離亭回首隔山城。秋從黃葉聲中老。人向青山缺處行。幾片閒雲供畫本。一林落日待詩成。來時記得留題處。尙有殘尊慰客情。

挽姜西溟

晚入承明數未奇。那知鑄錯不堪追。文章舊價欣方慰。辛苦初心悔已遲。遺恨一時頭腹尾。空傳三絕畫書詩。生芻一束無從唁。獨向西風淚暗垂。

夢中

東流無復水重回。欲斷危腸暗自摧。見燕引雛還墮淚。聽鳩呼婦不勝哀。春風隴上新寒食。夜雨堂前舊

鏡臺子母重泉相見否。夢中還望寄聲來。先賦悼亡後痛喪明觸緒與悲令讀者彌增伉儷嗣續之重。

讀相如傳

移病文園臥歲餘。同時眞恨失相如。所忠枉遣求遺藁。不記當年諫獵書。相如可重特在諫獵一書詞賦其未也作者不肯埋沒古人。

山行

山行風暖落花輕。雨過田間野水鳴。自笑微官如布穀。年年三月勸春耕。

宋聚業字嘉升江南長洲人康熙丁丑進士官吏部文選司郎中著有南園詩藁

宿沅江驛樓時秋分夕

沅水三更月。燕山萬里雲。夢隨天共遠。人與序俱分。風景殊蠻落。音書斷雁羣。可堪秋節半。蘭畹正清芬。

題南陽旅壁

眞人白水生文叔。名士青山臥武侯。水自奔騰趨漢口。山猶層疊枕城頭。時來一夕收銅馬。事去經年運

木牛。歎息興亡千載上。荒村野廟摠悠悠。三四承山水言之五六又承文叔武侯言之格律一新

同呂侍御元素過新鄭侍御有妹隨壻在官予兄弟五人天各一方感而賦此

憐余兄弟各西東。一處離情五處同。音問久疎雲樹外。笑言暫接夢魂中。根浮春水漂萍葉。影亂秋風叫

雁鴻。今日停驂新鄭道。羨君兄妹樂融融。通首皆感弟兄分散而侍御兄妹相聚只於結處一點作法甚變

鄂爾泰

字毅庵。奉天人。康熙己卯舉人。官至大學士。謚文端。○文端開藩吳中。以古學造士。今南邦黎獻集。彬彬如也。掌翰院時。亦以立品董率後進。生平不欲以詩自鳴。而意格自高。鎔冶騷

選者轉末能或先。

聽姜客彈琴

初春多佳日。旭影照高林。曉煙斂木末。暖意浮衣襟。檐前有嘉樹。枝上有鳴禽。道人太古士。幽旨寄瑤琴。元聲隨指下。和氣散輕陰。無須泛瀛海。已見成連心。聽者各有得。豈必求知音。

贈方望溪

六經治世非土苴。相期津逮闕垠涯。抉經之心不易得。詞林文苑徒紛拏。博物但解辨鼯鼠。搜神或詫名騶牙。心井偪塞航斷港。銀海掉眩生狂花。此曹正坐讀書誤。遺棄根本搜枿芽。桐城望溪我老友。學崇中正防奇袤。說經鏗鏗究終始。尤於三禮咀其華。曲臺增刪繁就簡。正義參訂蓬扶麻。羣書穿穴尋聖奧。下簾每聽鼓三搗。方今重輪陛下聖。五緯順序曜帝車。致君堯舜誠有術。許身稷契非矜誇。天地人祀各適職。往諧秩宗帝女嘉。惟寅惟清恭朝夕。詔兼書局窮羅爬。吾衰舊聞苦荒落。妄冀邃密商量加。間送一難輒許可。瓊琚乃報投木瓜。姚姒上游下閩洛。青鏡恐蝕妖蝦蟆。豈邀名譽嗣聖德。寧望荒遠登義媧。所貴經學適時用。瞑坐曜若翻金鴉。委蛇退食時過我。劇談恆淪頭網茶。脩閒依然兩學士。相視一笑無喧譁。張蒼伏勝暨轅固。經儒往往臻耆遐。朝廷會行乞言禮。洗爵君且掛流霞。望溪說經簡而能當詩中稱揚。無溢分語。軒昂磊落音節極高。

昭陵石馬歌恭和御製元韻

行天維龍御飛霞。行地維馬周天涯。開張卓立須駕馭。豈獨巡遊西海騰渥洼。千金市駿世希有。美名徒挂涓人口。自來房駟無虛生。六轡乘時應乾九。聖朝啓運戰與農。乘耒調馬彎雕弓。文皇雙馬特超絕。駒駉駉駉堪齊蹤。艱難馬上得天下。累洽重熙集純嘏。叶至今斲石傍昭陵。始信人間有神馬。雲臺烟閣銘功宗。策勛此馬將毋同。在天之靈憑陟降。嘶隨列缺追豐隆。吾皇鼓車方記里。萬仞塞垣銷壁壘。金鼇長見鞏如山。石馬何由汗如水。留都展禮朝翰屏。鸞旗照影遼河清。待翻樂府歌天馬。佇看馬負圖出龍祥徵。太宗文皇有神馬二。皆乘之破敵建功者。後斲石像於昭陵。御製作歌。文端敬和。

恭和御製永定河元韻

無定河名古。南流自北京。恍疑天上落。不肯地中行。無事智方大。窮源委可并。禹謨原可繼。永永慶功成。不肯地中行。故名無定。師神禹行所無事之知。以治之。則無定者定矣。末句點題。通體俱醒。

謁楊忠愍公祠

司馬分曹日。批鱗再見時。求仁原自主。得死更何辭。十罪彈文在。千秋正氣垂。祇今瞻廟貌。頑懦有餘悲。

九日海天閣

秋氣鬱佳哉。秋鴻歸去來。百年元是客。萬里獨登臺。黃葉寺前雨。茱萸江上杯。海天寥闊際。何處是蓬萊。

贈學使中丞法淵若

已教干莫息鋒鋌。轍遍江南衆所瞻。除卻詩篇何有癖。獨於山水不能廉。瘴烟蠻樹棠陰在。絳帳春風畫戟兼。今日相逢共尊酒。形骸脫略兩無嫌。

滇中回宿易隆詩示送行者

踏雪飛鴻任此身。戟轅回首已前因。從知三萬六千日。半是東西南北人。悵別羣僚紛涕泣。遄歸一老念尊親。平蠻坊底休煩思。記取天涯若比鄰。三萬六千對東西南北。本老杜尋常七十而變化之。彼板對者不能解此。

閩中述懷東同事諸君子

寂靜春闈春意深。模糊老眼怯春陰。四千四百有奇卷。二十二人同此心。屏絕不休求正士。別裁苗軋得元音。三條燭燼前塵夢。坐對奎堂思不禁。不休哉。宋楊億事。萬軋。宋楊劉體。

將出都赴滇卻寄吳中王子重吳漪堂夏曉堂徐學人諸老友

尺書裁罷又重拈。細字旁添手自緘。此去滇陽真萬里。夢魂不易到江南。

經略北軍弔戰歿諸將佐

蟲沙猿鶴總堪哀。持節籌邊嘉峪關樓名塞上來。聞道將軍期馬革。幾人真箇裹屍回。可憐無定河邊骨。猶是春閨夢裏人。爲從軍者

言之。此爲將帥言之。彌可悲也。議開邊者尙敬而聽之。

張

遠字超然福建人康熙己卯解元著有無悶堂集○超然旅寓常熟久困舉場發解時其年已老以老名士終賢於方干身後成名矣詩格大段疎朗異於局束如轅下駒者

下建溪諸灘

無諸拓閩疆山川賈餘霸亂石鬪雷霆終古不可罷輕航一鳥疾碎泝千轉下前舟歛然沒初見各驚詫須臾出白浪迴旋去如射生命寄柁師與石爭一罅在險魂屢飛過後舌頻咋造物產湖海至此窮變化若匪衆盤渦閩溪高可瀉仙霞插霄漢天險此其亞所有縱橫徒一丸每頻借吾聞天下雄以德不以詐閩中如井底未足供叱咤安得常治平絃歌出桑柘極形諸灘之險若可憑藉而歸於以德不以詐煌煌上遠望如舟沒浪中忽然復出三入三出倏達海門矣篇中前舟歛然沒數語真工於形容

開籠行

秦景天自連江籠鷓鴣寄曹秋岳先生先生作開籠行予嗣響焉

鼇江之山削蒼玉鼇江之水浮深綠石榴花發春茫茫鷓鴣無數啼山麓一聲兩聲紛如泣落日銜山聲漸急其中有客思江南怪爾曾云行不得羅入籠中寄遠人不傷其羽傷其神深林叢草那可問卻看燕雀心酸辛聰明文采古所戒生人生物同至仁開籠放入青霄去還爾悠悠自在身聰明文采古所戒句一篇主意季漢之禰生唐初之四傑皆以文采累也

題黃山山人墨竹

結體欲密勢欲舒。節圓葉老如草書。吳興已往不可作。此君顧影空扶疎。黃山山人澹於菊。胸有千竿萬竿竹。倏然落筆電與雷。縱橫幻誕何奇哉。墨汁三升酒一斗。颯颯晴空風雨來。蟄蛻出螻劍出匣。天矯老龍卸龍甲。共道一日不可無。頗恨古人無我法。機材揮盡世莫知。撐腸拄肚徒爾爲。伯時畫馬入馬腹。但恐山人變竹枝。筆下有兔起鶻落之勢。神肖東坡。

鷓鴣巢爲童子所破

十載風塵客。棲棲旅食難。以予搖落意。羨爾一枝安。力盡曉曉語。集成响响歡。豈期輕薄子。偷眼已相看。病起憐雙鷓。依依向我悲。巢傾寧問卵。身在竟安之。天地饒鷹隼。江湖足鼓鼙。羈棲隨飲啄。且莫怨羣兒。

歲暮寄懷故園親友

一年一萬一千里。馬足車輪舴艋舟。自笑此身渾似葉。不知於世復何求。磨牛處處循陳迹。籠鳥依依憶故丘。正是羊城梅放日。瘴雲霾雨獨登樓。何等起法。開寶以後罕見此筆墨。

閩中雜感

奕葉承恩異姓王。龍從宮殿擬汾陽。三年鼙鼓驚天地。當日清簫引鳳皇。藍水一丸爭鼠穴。仙霞千騎失羊腸。蓮花峯下荒墳月。慚愧他家白馬郎。清簫引鳳指聯婚天室言。

還至延平遙望先墓有作

登樓遙望墓門秋。辛苦經年尙劍州。豈有弟兄依隴畝。祇憑風雨護松楸。來從豺虎行邊路。去逐鯨鯢腹裏舟。四十無成還浪迹。雲山何處可回頭。

送沙子羽之日本

壽安山迥敞雲烟。邪馬臺高四面天。縹緲似遊星漢外。依稀直到日輪邊。乘桴昔日傷尼父。蹈海今誰是仲連。見說遺經在茲土。卻將吾道問東偏。相傳徐福求仙不返。挾未焚書時諸經去。故日本國至今猶存古本。尙書歐陽公令殿不許傳中國。舉世何曾識古文。即指此也。

魏

坤字禹平。浙江嘉善人。康熙己卯舉人。著有倚晴閣集。○禹平係忠節公後人。少負才名。交滿宇內。而遇合獨難。詩體研摩宋人。各從所好也。所錄五章。皆才情發越之作。

寄居蟲

人生如瓜牛。長負軀殼累。何況外緣假。妄思得久寄。茲物生海堦。乃具周身智。常共水族遊。愛此一螺翠。延緣遂遷入。宛轉據其內。腥涎吐清波。微風納涼吹。揚鬣遇釣師。觸急輒驚避。兩兩收霜鉗。虛中得靜閱。晏然稱寓公。久亦漸忘僞。如以物附物。是一卽非二。而我辭鄉國。歲歲困旅次。結屋少定蹤。對之發深喟。暇或箋蟲魚。爲汝別種類。狀難狀。瑣事居然爾雅。未歎息已。之無家。隨所感觸。詩人往往有之。

登黃鶴樓

江聲已吞大別口。束之不住復東走。怒濤萬頃天風號。沙岸日斜鼉欲吼。一葉翦過烟波灣。登樓憑徧十

二欄忽飛涼雨濺衣濕。白浪高於黃鵠山。山川滿眼來蕭索。吟鬢互垂且孤酌。青蓮畢竟非仙才。崔顥題詩不敢作。醉擬橫將鐵篴吹。歸向仙人借黃鶴。何等自負

送少司馬楊以齋先生予告終養歸里次悔餘韻

行詣誰從末俗論。陳情今見袞衣人。喜當海宇銷兵日。許乞林泉將母身。得失不須分出處。去留總是戀君親。馬蹄篤速行何亟。肯待河流泮早春。

慈仁寺有粥孤雁者四明萬季野購畜於庭作羈雁詩邀予賦之

不趁涼雲結陣飛。羈孤似爾欲何依。彌天增繳雖知避。滿地江湖卻慙違。空守殊鄉驚歲晚。難招舊侶待春歸。臨風無限回翔意。獨立閒庭對落暉。

田橫島

蹈海誰能帝漢高。同時一死等鴻毛。只憐五百忠魂散。不及鷗夷有怒濤。五百人同死而精靈混沒殊恨事也熟題須尋出新意庶免雷同

汪

釋字東山。江南常熟人。康熙庚辰。賜進士第一人。官翰林院修撰。著有秋影樓詩。○殿撰於臚矣。詩切磋於邵陵。然邵陵真而近俚。殿撰則骨秀天成。稟諸性生。友朋莫易。

新草

原上離離草。春來一雨生。寸心燒不死。萬里碧無情。油壁輕輕度。花驄款款行。六朝佳麗地。愁煞夕陽明。

秋砧

萬戶清飈動。疎砧特地哀。杵隨涼葉下。響帶早鴻來。長信秋偏早。漁陽獵未回。無衣應不少。刀尺漫相催。

用意全在一結。

梅花樓訪月溪上人

撼屋西風起白蘋。紙窗木榻靜無塵。斜陽影裏看歸鳥。落葉聲中著病身。丈室只容清淨侶。禪門今見讀書人。慚予又作長安客。夢斷山塘二月春。

予方外友樾亭能讀書盈篋樾亭沒而所接皆俗僧矣讀第六語不禁有觸第月溪未知果能讀書否也

望岱

矯首原從萬仞論。千年漢時上公尊。崢嶸直上疑無路。呼吸通天尚有門。獨立巖巖真氣象。滿前疊疊盡兒孫。閒雲莫戀山頭住。四海蒼生正望恩。

此殿撰計偕時望岱而作隱然以第一人自命結意欲霖雨蒼生原非忘世也後假歸不出旋至奄忽豈登第時或有徵兆耶

秋柳次韻

短長亭畔暗銷魂。無復絲絲映綠門。千縷冷風餘倦態。滿梢清露尙啼痕。蕭蕭去馬斜陽路。點點歸鴉落葉村。獨立寒潭倍惆悵。婆娑生意不堪論。

頸聯取題之神咏物詩須得此事外遠致

寄庭仙

五年心事共誰論。惜別胥江。日色昏。水底須眉終有相。雪中指爪已無痕。秋風鱸膾江南味。春雨梅花處士魂。畢竟家山貧亦好。知君亦厭孟嘗門。初看似諷庭仙歸老。實則全寫自己襟抱也。玩末句爽然東山之不出。已決於此。

首夏同青門雪航以寧允恭叔度讌集秋水閣卽事限韻

憑高風物欲凌秋。門外平湖碧似油。暝色已歸鴉背外。斜陽猶戀柳梢頭。疎疎遠岫屏間畫。點點輕帆鏡裏鷗。不盡蕭條東澗水。至今嗚咽爲誰流。

秦始皇

方丈瀛洲杳莫攀。金銀宮闕湧煙鬟。桃源自是人間世。卻遣童男問海山。總說求仙之妄。卻道來自別。

項羽

一炬咸陽火未殘。楚人真是沐猴冠。英雄豈學書生算。也作還鄉畫錦看。書生見解。一筆掃盡。

老聃天寶中尊爲
玄元皇帝

仙李蟠根天上栽。玄元皇帝廟崔嵬。神仙不作兒孫計。一任張巡慟哭來。巡慟哭玄元皇帝廟起兵。而竟不一救。笑唐代附會神仙之妄也。

柳枝詞

一種風流得自持。水村天與好腰支。月殘風曉無窮意。說與桃花揔不知。

田家樂

短籬矮屋板橋西。十畝桑陰接稻畦。滿眼兒孫滿簷日。飯香時節午雞啼。田家至樂。早朝時節。候雞啼者。焉能識此。

張廷玉

字衡臣。江南桐城人。康熙庚辰進士。官至大學士。謚文和。

雜興

月虧方就盈。陽盡斯來復。靜觀天地機。迴旋似輪軸。盛滿易爲災。謙沖恆受福。所以賢哲流。秉心若虛谷。名高氣益卑。位顯心彌肅。大智詢芻蕘。殊勛謝輿服。常思重載車。不爲再實木。以茲保初終。何憂易傾覆。吾願讀書人。休同晏子僕。高而不危。親切言之。此公生平持守處。

我聞昔人言。苛政猛如虎。又誦魏風篇。碩鼠況貪取。嗟哉牧民人。煌煌綰珪組。乃以父母稱。而爲衆所苦。騶虞有仁心。麟趾中規矩。藹然太和氣。千載如可覩。君子慎所擇。休與毒獸伍。此爲墨吏酷吏勗也。有父母其人。願眞見。

飄風不終朝。驟雨不終日。三復老子言。可知立身術。譬彼草木微。春華秋始實。氣候苟不完。纍纍安可必。寄語功名人。進取休太疾。早榮亦早枯。易得還易失。默識乘除機。處滿須防溢。此戒進取之速。早發還先

也。蒼松

題漁樂圖

秋江渺渺無津涯。江邊漁父船爲家。往返何知路遠近。一帆明月依蘆花。清晨舉網西風裏。網得長魚滿船喜。兒能炊火婦烹鮮。鄰叟還貽新醞美。陸魯望。張志和。朝朝詩思在烟波。吾曹不解工吟詠。醉唱羲皇網罟歌。羲皇網罟歌不傳。元次山補之。漁人能唱猶謂不解工吟詠耶。

山中暮歸

林端鴉陣橫。烟外樵歌起。疲驢緩緩行。斜陽在溪水。妙在添不得一語。

楊汝毅

字石湖。江南懷寧人。康熙庚辰進士。官至左都御史。

雜詩

神龍蟄深淵。杳冥人莫測。玄豹隱南山。澤膚甘不食。造化本無端。歸藏始生息。氣盛物所尤。名高德之賊。卓哉先民言。士必先器識。

北行偶述

皚皚村樹白。曖曖朝陽昇。瘦馬立猶僵。西風警如箭。飛塵染素衣。嚴霜改顏面。村酒濁如泔。沙土和羹飯。向北物價增。去鄉身命賤。回首故山遙。但見南飛雁。

舟中懷長孫超恆時新任藁城令

汝始分符去。吾纔買棹歸。縱然違祖膝。猶喜近親闈。法立奸胥畏。心清案牘稀。此方經巨浸。軫恤念民依。

聞錢彭源卒於蒼溪詩以哭之

燭暗窗昏夜黯然。驚聞巴蜀訃音傳。一官薄俸蠶叢外。萬里全家鳥道邊。但有清名堪壽世。更無靈藥可延年。傷心堂北孀親老。哭向秋風暮雨天。

陸

師字麟度浙江歸安人康熙庚辰進士官至兗寧道著有玉屏山樵吟

雜感

朝聽衙鼓搗。暮聽櫪馬嘶。夜長不成寐。憂來無端倪。老親遲暮景。荒庭守蒿藜。雪髯添幾莖。麥飯進幾匙。白雲天東南。可望不可躋。

入夏苦霖雨。兩河歲少登。吾邦岡阜多。頗以豐稔稱。皇天憐瘠土。長官曾何能。哀彼中澤鴻。嘹唳號寒冰。子母各翻飛。何鄉可依憑。此任河南新安縣時作

之官真州述懷

昨歸自東垣。結廬屏山住。書史尋夙好。長日儘可度。親亡焉用祿。涕泗誓諸墓。此意愧未堅。又被微名誤。綺羅紛五色。鳴機自織素。縱然違時趨。努力守故步。

物生號有萬。心性冰炭異。蟬蛸吸露華。蜚蠊甘穢膩。若使易地謀。卻走兩不嗜。擾擾岐路間。東西各行意。儒者重敬官。市估乃競利。

邗溝自隋唐。昔稱繁庶地。宴享窮珍羞。吉凶踰典制。巷有衣錦人。家無終歲備。權衡奢儉間。張弛有治義。採風美唐魏。古人豈無意。庶幾去其甚。聊洒俗吏愧。至今人第誇揚州富饒。不知業鹽筴幾家外。貧困猶他處也。權衡奢儉而欲去其太甚。卽此見良吏用心。爲士不學道。所得皆支流。爲民不服耕。逐末非良謀。彼都中聲利。迷罔何當瘳。一髮挽千鈞。力薄知未周。我舌敢辭敏。我行敢告休。力田與孝弟。勗哉景前脩。

雜詠

獨坐空堂中。時隱南郭几。悠然萬慮消。止水清見底。無端一物交。條爾兩念起。因兩遂生萬。梵紘不可紀。靜定動亦定。烏用著些子。鑑空而衡平。君當會斯理。周子云。主靜立極。不獨靜時當靜。卽萬感雜投時。心中自有主。不亂紛也。詩中所云。豈拘守聲律者所能。

禱雨自劾

祝融乘權號令酷。赤日黃埃助炎熇。稗禾枯焦似束薪。澗溪涸竭行成陸。哀哉斯民瓶罍空。婦歎兒號盈白屋。已走羣望薦牲璧。未見天公鞭蟄伏。天降災祲非偶然。毋乃感召由司牧。一官衣食寄閭閻。何忍鞭箠等犬犢。本心未喪戒摧戕。於民無恩僅無毒。黃昏縱謝四知金。白日虛糜五斗粟。我今自分無寸長。官方久矣宜褫逐。安得暘雨時。若民無飢。挂冠高隱弁山麓。

騎牛曲

牛背兒童自放歌。頭頭注澗復踰坡。問渠何法牛馴擾。鞭撻無驚芻牧多。牧民之道。盡末一語。

許迎年字毅士江南江都人康熙庚辰進士官中書舍人著有槐墅詩鈔○詩品如靈和楊柳初日芙蓉晚唐中最近溫岐情韻勝也配徐淑則互相酌唱風格略同藝林比之秦嘉夫婦因並之及

新竹

乍與僧參玉版禪。旋看解籜裊新烟。斑龍驚蟄多爭地。翠鳳修翎欲上天。鳥坐叢枝歌睨睨。月搖虛幌影連娟。此君相對殊瀟灑。不厭秋聲攪夜眠。

萊陽二姜先生祠

黃門高節著萊陽。伯仲風裁在抗章。請劍上方思斬佞。荷戈南國竟投荒。危言足破狐狸膽。浩氣堪增史冊光。海湧峯頭祠廟在。谿毛特爲薦馨香。風裁。裁字平仄。二音。唐賢用。

和淑則園居病起作

一病經春瘦可憐。幾時不到曲闌前。花殘幽砌堆紅雪。鶯坐垂楊破綠烟。輕暝未成連日雨。薄寒猶怯晚春天。方池新漲遊魚樂。興寄濠梁秋水篇。

楊守

字次也。浙江海鹽人。康熙庚辰進士官榆林知府。

啞嘛酒歌

楊花吹雪滿地鋪。杏花一片紅模糊。榆錢簸風風力軟。芳林處處聞啼鴣。青旗斜漾茅屋底。天然好景誰

臨摹我留此地一事無。太平之世爲羈孤。東鄰西舍相招呼。般兄張丈與俱動。醪錢買醉黃公壚。麥缸鵝
黃新釀熟。味醇氣郁過醞醑。彭亨翠甌如鶉觚。細管尺五裁霜蘆。低頭吸同渴羌飲。一口欲盡鴛鴦湖。榆
水名。白波倒捲東海沸。渴虹下注西江枯。碧筩不用彎象鼻。龍頭屢瀉蛟盤珠。須臾餅馨疊亦恥。春意盎盎
浮肌膚。劉伶大笑阮籍哭。直欲躍入壺公壺。吾皇聖德蠲逋租。吏胥不擾民歡娛。今年更覺酒味好。百錢
一斗應須酤。盲娼醜似東家媠。琵琶箏阮聲調粗。有時呼來彈一曲。和汝拊缶歌烏烏。青天作幕地爲席。
醉倒不用旁人扶。樂哉邊氓生計足。白羊孳乳驢將駒。賣刀買犢勸耕鋤。女無遠嫁男不奴。含哺鼓腹忘
帝力。歲歲里社如賜酺。安得龍眠白描手。畫作擊壤堯民圖。風土詩。傳出太平無
事景象。乃不徒作。

徐昂發

字大臨。江南崑山人。長洲籍。康熙庚辰進
士。官翰林院編修。著有畏壘山人詩集。

雁門關

昨升繫舟山。試望雁門塞。截業陣雲黑。勢與元岳配。及茲赴谷口。跼步入煙靄。曲曲山根盤。層層蒼壁對。
嵐光自摩蕩。巖壑遞明晦。古雪滋陰崖。新泉下奔瀨。猿猱一線路。迥出飛鳥背。側磴上空曲。攀危凌地籟。
始知經陟高。足底羣峯會。玄冥操斗柄。制此天北戒。插漢立雄關。蕃畿隔內外。東掠鳳皇城。西極菖蒲海。
呼吸萬里通。形勝兵家最。信乃天下蔽。詎惟三晉隘。時清關門開。畊田鑄矛鏃。不見沙土中。箭鏃餘腥在。

過彭蠡湖

水落晴沙高。鶴鳴霜野冷。我來越彭蠡。及此秋光迥。林岫遠參錯。洲澱互陵巨。魚龍氣不驕。鵝鷓散游泳。川塗翫迴轉。欵疾孤帆影。洪流既歸壑。巨藪失溟滓。乃知造化根。終焉返虛靜。沿溯過連圻。蒼然見西嶺。曖曖斜陽中。悠悠動漁艇。異人不可求。松門企清景。天下萬動歸根於。辭不過借溯指出。

漱玉亭

合沓巖厓窄。風雨松顛聲。雙瀑從西來。飛出九疊屏。羣峯忽搖蕩。右界銀河傾。孤亭攬要妙。恍惚光怪呈。天清霹靂鬪。日抱虹蜺生。飛瀑濺積素。上散爲雲英。奔漱澗壑間。萬玉相鏗鏘。遠山已十里。餘響騰空青。惜哉古球石。獨向山中鳴。坡公作以自得勝。此作以矜鍊勝。惟不相襲。故相逼。

鳳尾岡望海

側磴緣秋毫。連巖眩明晦。蹠踣逾積阻。曠望霄宇大。鳳翥振華尾。下視九州隘。我來躡其顛。若陟靈羽背。一身與雲輕。迥出天地外。巒嶺何隱軫。草樹紛映曖。彷彿魚龍沸。萬里滄溟匯。神山恍可接。灝氣吞南戒。一身與雲輕二句。極狀憑高眺遠。下寫望海。不必盡力形容。別於觀海也。若出時下才人手。浪費筆墨矣。

觀打魚戲爲鷓鷯歌

鷓鷯鷓鷯巢高木。張口吐雛連五六。矚矚碧眼玻璃明。稜稜長喙鈎鋌曲。野人椽網橫覆車。鰭沙兩翮不

得舒鹿角腥涎養馴熟。朱繩繫頸來捕魚。潮波吞天一葉舞。野人指撝若部伍。鷓鴣穿浪疾如風。水面迴篙掉飛艣。戲鯉游魴驚失次。拏髻磔尾萬魚遊。翻身入水追亡逋。擗鼓船頭助聲勢。大魚鱗脫紅肌摧。小魚半死盈艙堆。鷓鴣鼓翼鳴得意。貪殘嗜殺神所猜。野人捩柁斜陽墜。論鬪賣魚謀一醉。鮮鱠遙看藿葉香。輕刀細剝春葱脆。鷓鴣鷓鴣垂頭斂翅上橫木。一寸鱗鬣不入腹。

相見灣詞自注在贛州南二十里章江中

人厭溪灣遲。我愛溪灣遊。三暮三朝見百回。相思那及長相見。

揚州

木鵝沉處錦颿斜。隋氏離宮接暮霞。辱井有魂悲玉樹。仙都無夢餉金蛇。裙縵禹穴千年繭。鏡擁迷樓萬朶花。莫向吳公臺上望。江南江北摠無家。從義山地下若逢陳後主二語而申言之。一加點染。遂若別開面目。

淮陰侯釣臺

木落荒原水氣昏。英雄漁釣跡猶存。蒯通不售三分策。漂母長留一飯恩。人歎老臣知國士。天哀女子殺王孫。藏弓烹狗由來事。只合終身淮上村。

城南二首次宋五嘉升韻

漢室曹瞞是獵梟。獠兒年少欲橫挑。刀圍玉帳觴公瑾。花簇珠屏舞大喬。水上神書纔息燄。牀頭明鏡旋

生妖。蟠龍門外牛羊墓。麩麥黏天似雪飄。此咏吳桓王也。英氣勃勃千載如生。

東風倚棹木蘭舫。舊事淮張剩野蒿。人弔夕陽花作雨。鳥啼初月水平橋。江陵故老憐蕭銑。隴首荒宮記

隗囂。亡國有魂歸不得。驅狼衝海漫呼號。此咏張士誠也。比以蕭銑隗囂恰如分量。

集秀野草堂醉後作

飛揚意氣未磨礪。五岳峻嶒方寸中。草木尙生無患子。男兒那作可憐蟲。逢花酌酒爲愁飲。結柳逶巡歎

學窮。至竟文章成底事。莫臨遼海哭秋風。無患子見本草古今注。謂此樹可以殺鬼關疫。即菩提子也。企

夢婆之類。

查嗣琛字德尹。浙江海寧人。康熙庚辰進士。官翰林院侍講。著有查浦詩鈔。

賈太傅祠

陳書痛比秦庭哭。作賦情同楚奏哀。已遣長沙憂不返。如何宣室召空回。身逢明主猶嗟命。天奪中年亦忌才。此日題詩還下拜。也如君弔屈原來。

過白沙嶺寄同年張硯齋

積翠浮空不見峯。羣峯俱擁萬株松。怪來小驛重關路。忽與千巖萬壑逢。丹壁斜飛千尺練。白雲遙送一聲鐘。龍眠居士如相識。畫我山莊第幾重。

徐永宣字學人江南武進人康熙庚辰進士著有茶坪詩稿○茶坪天爵自貴不就

潤州

江山誰第一最是潤州城。山上南朝寺。江頭北府兵。三春添黛色。萬古一濤聲。閱盡東西客。勞勞役利名。

舟行卽事用香山韻

秋深酷愛水雲空。興到五湖東復東。船泊荻花全白處。酒沾楓葉半紅中。貴人翁仲蕪荒草。浮世賓鴻逐斷蓬。何似素心晨夕共。詩籤茗椀得相同。三四語令穰畫卷中每有之予泊船時往往遇此而不能言彌用自媿

竹垞先生留宿楓橋慧慶寺夜話追悼陸文孫自注陸與先生同里善音律流寓常州卒於粵東

朔風號怒紙窗前。憶舊僧房感逝川。鄉曲公憐楊狗監。天涯吾悼李龜年。雪深院落落妻無絮。葉擁階除突少煙。此夜楓青燈黑影。鼓寒霜重不成眠。通體意在文孫故於竹垞從略第三語傷竹垞之濳落下俱言文孫之貧而沒也結意黯然傷神

宋建中靖國辛巳七月二十八日爲東坡先生騎箕之辰先生乞居常州卒於孫氏寓館其地去

余家不數十武舊蹟猶存歲值辛巳云先生六百年矣感今追昔邀同學諸子於是日肇祀先

生用眉山二字成詩二章致敬恭思慕之意云

鑿羽難遷月下枝。文殊問疾倍支離。夢縈竹屋風前樹。心繞觚稜雨後葵。已分孤臣傷骨鯁。可禁衆女嫉蛾眉。憐才只有宣仁語。千載追尋五夜悲。東坡先生生平轍軻惟宣仁太后能知其才并諒其忠愛宣仁祖落東坡連竄以至於死矣此詩特爲表出

白雲深處碧波環。詩讖無端落此間。回首古橋衰柳斷。傷心小院野花殷。魂歸月黑疑僮耳。鶻沒天低憶故山。直接岷江溪水是。瓣香裊裊淚潺潺。六百年後辛巳。此意亦宜一見。

秋日訪朱錫鬯先生

沈尤村僻絕塵寰。千个篔簹水一灣。學道著書無箇事。滿庭黃葉對秋山。先生清節一語。寫景中傳出。令讀者如或遇之。此種微妙。難為

外人道也。

蔡 堡 字甘泉。江南江寧人。康熙庚辰進士。官甌寧知縣。

蠓磯孫夫人廟

魂傷巴蜀雪消時。歲歲東風哭子規。近水芳春花易落。沉沙終古石難移。悲銜白帝生睽隔。恨切蒼梧死別離。環珮不歸清夜杳。月明無主照荒祠。如此英女。而所遭不辰。家國兩有遺恨。視乃兄之降曹。真可媿也。漁洋斷句後。應推是篇。

送卓子任之大梁

中原天接大河長。駐馬夷門又夕陽。客路半生心似雪。風人未老鬢先霜。屠沽事業傳公子。詞賦聲名重孝王。此去梁園千里外。不因懷古自悲涼。

陳沂震 字起雷。江南吳江人。康熙庚辰進士。官給事中。

雲安

策蹇來投止。荒廬繞棘叢。看人惟野蕨。撼壁有狂風。店鬼村村聚。牂羊戶戶同。救災長吏職。無術起哀鴻。
寫災荒景象如繪。結意自道無術。諒然仁者之言。

費洪學

字巽來。江南吳江人。康熙庚辰進士。官博野知縣。

登滕王閣

岩嶢傑構勢凌空。憑眺山川氣象雄。彭蠡潮聲轉天外。豫章山色落杯中。才人逸唱秋烟渺。帝子遺墟夕照紅。一閣堪憐幾興廢。江頭爲問釣魚翁。

劉師恕

字秘書。江南寶應人。康熙庚辰進士。官至直隸總督。

護花

花開笑春風。卻被風吹落。自無堅貞性。但怨風輕薄。賴有護花幡。衆芳得所託。恐此亦偶然。莫便矜灼灼。
見秉性貴貞。不藉擁護也。

臥龍岡武侯祠

祠堂舊是栖遲地。門外曾停三顧車。自信君臣並魚水。不教莘渭擅耕漁。大星墮地終炎祚。古柏參天傍草廬。魏殿吳宮俱泯滅。荒岡猶峙劫灰餘。
從杜詩化出。而泯其痕。

卷二十

秦文超

字偉士。湖南長沙人。康熙壬午舉人。著有涵村詩集。

過漂母祠

清淮水漲岸添痕。望裏長隄古廟存。一飯偶然憐餓者。千金何必重王孫。母能忘報真高誼。漢不酬功實寡恩。我亦江湖垂釣客。經過聊爲薦芳蓀。

黃

任。字莘田。福建永福人。康熙壬午舉人。官四會知縣。

暑雨後坐月

雨洗月逾潔。氣寒光轉幽。露螢不自夜。風樹已先秋。烹茗籟遙起。拂琴泉暗流。清宵形對影。身世兩虛舟。
學溫李詩者。偏得此清絕之作。從溫李入。不從溫李出也。

讀楚辭作

無端哀怨入秋多。讀罷離騷喚奈何。明月竹枝湘浦夕。西風木落洞庭波。美人環珮惟蘭杜。公子衣裳在芰荷。千古靈均有高弟。江潭能唱大招歌。

題畫

桃花灼灼水潺潺。隔斷千山與萬山。生怕漁郎漏消息。不梳一片到人間。

水折山紆路欲窮。何曾破浪駕長風。高峯猿嘯重雲裏。絕壑舟行亂石中。宦迹羈愁川上下。詩翁遺事灑西東。雲安麴米今何有。寂寞誰憐酒盞空。此川中作令時詩。下一首同。

巴東

征人日夜逐征鴻。乍過川中入楚中。版籍已知邦國異。人民仍覺語音同。五年三峽風波路。萬里孤舟老病翁。誰信書生遇天幸。平安八口出巴東。

白雪樓

自古衣冠笑楚優。文章聲價付悠悠。人間豈解陽春曲。此地猶存白雪樓。山色千尋常聳翠。泉源萬斛自飛流。乾坤清氣依然在。更向何人筆底收。甲李滄溟見後世有攻伐之無繼續之者。連下首皆學使時詩。

試院卽事

畫戟森嚴晝漏遲。凝香燕寢日斜時。柝聲繞院人聲寂。滿箔春蠶正吐絲。

途中

白雲如絮擁蒼山。膚寸能彌六合間。卻怪紛紛頻出岫。不會行雨竟空還。

許

涓字凌洲浙江嘉善人。康熙庚辰進士。官湖南石門知縣。此予座主竹君師考也。勤卹荒政。民受其賜。石門至今俎豆之。

雙溪坪勘災

西湖雜書

珍重遊人入畫圖。亭臺繡錯似茵鋪。宋家萬里中原土。換得錢塘十頃湖。卽胡澹菴所云小朝廷意。高宗不復父讐。隱然言下。

珠襦玉匣出昭陵。杜宇斜陽不可聽。千樹桃花萬條柳。六橋無地種冬青。感楊璉真伽發六陵事。西湖詩流連光景者多。此較有關係。

彭城道中

天子依然歸故鄉。大風歌罷轉蒼茫。當時何不憐功狗。留取韓彭守四方。泗上亭長。何詞以答。

陳睿思字匡九。江南長洲人。康熙壬午舉人。○予前結壽南詩課。招匡九入。每詩成。衆人屈服。謂文惜。莊公有後。茲選中三朝要典。丁將軍故劍二篇。皆課題也。才命相妨。中道殞謝。士林咸爲惋惜。

贈張永夫

盧全家貧無長物。一婢一奴屋數間。先生之貧異於是。破竈頽墮寒無烟。途窮厭見俗眼白。餓死不食嗟來食。驕兒不襪腳凍皴。老妻無食面鰲黑。一間茅屋四壁空。雨淋日炙號長風。蠨蛸入戶蒼鼠立。夜寒僵臥牛衣中。屯蹶否塞貧且病。憂思感憤明其衷。險語突兀泣神鬼。奇氣磊落撐蒼穹。豪家婢僕何昌丰。睢盱俳笑老秃翁。白日晦昧吾道窮。此輩何足填心胸。喘月之牛負塗豕。紛紛輕薄應如此。君不見季次原憲留清名。斯人今日常不死。極形其窮。而以險語奇氣表其必傳。永夫可慰於地下。

觀丁將軍故劍

丁公小永孫子棻。崎嶇歷落非庸人。興酣對客拔劍舞。飛電睽睽風軒軒。坐客觀者喜且愕。丁生材武超人羣。生云小子何足算。公等未見先將軍。將軍自少性敢決。翹關負米空千鈞。生平武事略可數。鈞戟劍稍刀槍。就中劍舞尤第一。上馬下馬皆如神。白猿遁逃不敢進。青龍髣髴纏其身。余聞自恨生已晚。不得身與將軍親。將軍更有遺事否。余爲傾耳君具陳。生云昔時有草竊。嘯聚海島如雲屯。醢人之骨食人肉。元戎束手徒逡巡。吾祖仗劍往殺賊。髑髏帶血梟轅門。賊中豈少強健者。直前捕斬猶狐狫。後來賊平受上賞。皆由一劍成功勛。只今吾祖已沒世。英風猛氣猶生存。此劍時時吐光怪。匣裏龍嘯清宵聞。同人拔鞘決眼覷。殷紅戰血痕疑新。昔聞隴西世受射。將軍之後應生君。君今好文不好武。性嗜奇古師皇墳。自言今者特偶耳。兒戲恐使他人噴。勸君只合繩祖武。毋徒健筆扛龍文。古來武人畫麟閣。文士老死荒江濱。君不見賤子學書不學劍。途窮慟哭空酸辛。只寫入先將軍一語便已出衆。以下聲控縱送無不如古。必時露奇警句。乃不薄弱。篇中髑髏帶血梟轅門。殷紅戰血痕疑新。皆奇警句也。得此通篇振起。

王氏丹

字方若。江南寶應人。康熙癸未。賜進士第一。人官翰林院修撰。著有樓村集。

蕭尺木凌歊臺圖

高堂素壁雲氣生。莽蒼一燈秋山明。矗空巖業勢千丈。飛流樹頂如聞聲。借問此景從何得。凌歊臺畔青崢嶸。大江東去抱姑孰。天門竦立牛渚橫。崇臺拔地接星絡。湘雲巴雪相逢迎。寄奴賣屨作天子。日營八

極憑江城。燕秦電掃自豪喜。三千歌舞隨霓旌。至今英雄久灰滅。漠然山高而水清。鍾山有客癖樵。彷彿坐揮墨。藩升斗傾。不爲永初繪巡幸。臥遊自欲酬生平。橋頭策杖者誰子。幅巾瀟灑攜秋英。毋乃義熙老處士。獨依松菊歌閒情。謝宅已荒桓井廢。斷碑苔蝕留空名。何當野立下幽聽。慈姥夜戛琅玕鳴。我來讀畫三歎息。萬年之計徒屏營。涼宵對此且痛飲。西風颯颯燈熒熒。

睢陽廟二首

曾披唐史遺傳烈。百戰孤城蹟不磨。犄角力堪殲寇盜。殞身功已障山河。名先李郭懸青簡。血並南雷染碧莎。此日楹間修一拜。陣雲邊月想悲歌。睢陽一城若非張許死守則睢陽早破而江淮力不支矣使李郭得成恢復功者張許力也殞身功已障山河一語具有論史識之

繡幔煙沉鐵面寒。衝冠餘怒尙桓桓。戴天定不偕阿榮。斫地還應滅賀蘭。自注鐵鑄賀蘭進明跪階下爲觀者捶擊止存半軀萬古歲時尊俎豆。九幽靈爽託筵簋。卽今燈火傾城市。彩繪旌旗徹夜看。

于忠肅公墓

自拚熱血灑高穹。隻手扶天日月中。帝位安危操上策。外藩影響戮孤忠。苔封石馬三春雨。烟暝巢烏萬木風。相望鄂王精爽在。靈旗蕭颯暮山空。咏古貴于簡要土木奪門二語中俱已寫盡見作者鍛鍊之功

南中書事

禹甸埴墳殊廣大。蠻方節鉞漫紛紜。欲披角鯉池邊草。旋攪都鵝洞裏雲。孔僅算緡原始禍。盧循入海豈能軍。詔書一紙烽煙靜。重見侏離拜聖君。

蔣廷錫

字揚孫。江南常熟人。康熙癸未進士。官至大學士。謚文肅。著有青桐軒秋風片雲諸集。

續古詩

松蘿良有托。葛蔓亦有依。丘中一貧士。四海無所歸。日飲澗中水。朝採山上薇。天寒水結冰。年深薇漸稀。浩吟悲哉行。君子其庶幾。遊魚躍池樂。苑馬騰櫪肥。豈知鴻鵠志。不逐燕雀飛。

題小顛墨竹

畫竹不如真竹真。枝葉易似難得神。風晴雨露皆有意。子瞻與可無其人。去歲闢地栽新竹。枝葉離披覆茅屋。竹梢枯勁竿清瘦。久久可以醫吾俗。昨夜雨過月上時。壁上掩映青青枝。張子對之無一語。淋漓潑墨發異思。淡煙輕霧筆底生。枝枝盡帶風雨聲。移向乾明寺中挂。壁石好撰張顛名。

表忠觀

流離五季徧干戈。草竊英雄奇遇多。一角國分唐土地。百年廟共宋山河。凌烟閣上功臣像。衣錦營中駟馬歌。爲問販鹽爲盜日。仲謀曾許較如何。頴聯已舉其大。

看梅

橫列春山翠帳開。幾株相映白皚皚。輕烟未散月上。放鶴亭邊雪欲來。高格

張自超字彞歎江南高淳人康熙癸未進士○彞歎知己非用世人不就選謁生平達於經學詩亦從經學中出

詠懷

阮生何鄙固。往往泣途窮。途豈有窮時。毋乃太熱中。學道無獨識。舉足迷西東。太虛亦寥闊。顧弗容其躬。能貴不能賤。遂爲物所攻。時論于儒者。謂貧爲素風。搖落感剝蒂。飄漾如飛蓬。願爲達觀者。與世開鴻濛。途豈有窮時喚醒急躁人多少貧賤能移之人即富貴能淫之人也達觀者尙未足以知之

秋懷

大道自坦夷。于中生荆棘。廓清有古人。所貴無遺力。堯舜至今存。孔孟教不熄。世運或遷移。日月亦食昴。遞非聖賢心。剝猶天地德。霜風洗長林。羣木涵新色。廓清異端正以章明聖教堯舜至今存由孔孟之教不熄也誰謂詩不足以載道耶

桑

老桑古怪大成圍。秋風落葉著地飛。腹空皮裂榦拳曲。霜雪歷盡生意微。左邊柔條猶自好。解向東方弄晴暉。我生骨瘦常苦寒。繭絲賴汝成冬衣。願汝百年不戕賊。春日三眠蠶可食。即作者自狀其

平生

掃塵行

掃塵練日臘三七。細竹長竿風捲疾。歲歲荒村守敝廬。家家淨掃迎新吉。掃遍瓦椽及四圍。甌中之塵凝不飛。朝來坐曝茅簷下。垢面相逢仍苦飢。甌中生塵。舊語也。加凝不飛三字。便覺貧況可掬。卽此想見。彝歎清風。

何焯

字岷瞻。江南長洲人。康熙癸未特賜進士。官翰林院庶吉士。卒後。賜侍講學士。

同友過堯峯。免水禪院訪過庵長老。

道人種松罷。免水開禪關。微塵吹不到。白雲相與閒。偶尋林外約。引我過前山。倚杖看奇石。徘徊殊未還。

送友之長沙

憐君獨向此江潯。把手河橋淚不禁。匹馬西風千里別。一盃濁酒百年心。雲開湘水橫孤鴈。日落荆門起暮砧。舊是賈生遷謫地。可應弔古動哀吟。

吳廷楨

字山掄。江南長洲人。康熙癸未特賜進士。官翰林院學士。著有南村詩。

試兒行爲天標令子賦

璇源照夜凝冰壺。老蚌就掌生明珠。翠眉玉頰瞳點漆。人間又見徐卿雛。去年湯餅會衆客。鬱葱佳氣方充闔。走邀溫嶠辨英物。耳畔髣髴聞啼呼。今來周晬露頭角。矯矯自與羣兒殊。豪鷹崩劣毛骨異。敢以凡鳥題門樞。雲屏翠幙好遮護。抱持保姆顏數腴。圖史百物羅左右。滿堂坐展紅氍毹。排窗穴壁競覘鸞。親戚笑問兒何須。徑前握管隨手抹。似尋字畫摹之無。諸餘玩好不挂眼。豈羨取印提戈殳。迺翁雅素耽詞

翰吮毫。舐墨勤。吟唔。兒生墮地有同嗜。端能讀父盈車書。草牘方當等曼倩。臨書且爲留官奴。幾人有兒得寧馨。萬金之產良非誣。我歸責子坐歎息。提孩便已趨殊塗。朋來雖有四男子。森如立竹僵墻隅。懶惰搥不好紙筆。召令吐記常含糊。正應坐我老伏櫪。頤後駒齒皆頑鶩。韓子不免簡教示。陶公終是分賢愚。詩成聊復使之寫。得不媿汗沾肌膚。生兒當如李亞子。爾曹碌碌何爲乎。逐層引出。正如春蠶吐絲。七古所必用也。此以撇爲用。便不覺其陳陳。

石田畫廬山高

石田老人筆有神。匡廬面目爲寫真。瑩礪高峯駝臥。蜿蜒懸瀑蛟龍蹲。更叱巨靈運神斧。削出坡陀似懸乳。哀猿下飲難攀條。寒鳥歸飛愁墮羽。萬古盤渦轉輪轂。三疊水簾珠萬斛。遊人總向畫圖看。依稀認得康王谷。何年來遊支短筇。筇輿芒屨相過從。會當洗耳萬山頂。高揖五老看鑪峯。

觀潮

閩闔長風吹海立。馮夷怒挾天吳入。層層駕浪薄秋旻。涼波如沸魚龍泣。海門匹練遙飛來。龜山赭山青崔嵬。罔象橫衝兩崖束。巨靈直擘中流開。劃然分奔吼餘怒。霆擊雷轟碎天鼓。日車傾昃羲和愁。疾掩陽烏避吞吐。是日陰晦。倏忽奔騰萬馬寧。鷗夷蹴踏來窈冥。雪山摧翻鼇脊瘦。冰柱迸裂蛟涎腥。俄聞春岸喧雲碓。旋見跳波散珠珮。驚濤蕩瀟天低昂。亂石乍訇山破碎。潮頭一落百丈強。迎潮之子凌蒼茫。千桅乍隱

鷗起沒。一葉忽浮鳧拍張。目精眩轉毛灑淅。我生江鄉。惜未識。吁嗟。向若郵然驚。倒瀉長江盪胸臆。水犀強弩千雕翎。欲尋斷鏃揚遺靈。釣臺西峙灘漲急。海天瀕洞孤煙青。此詠廣陵潮也。一路排山倒海而來。未幅烟波無際。蓋潮至富陽而怒平矣。

天妃廟

斷堰鎖崔嵬。奔流下石隈。勢吞淮甸盡。聲撼海門開。水氣晴吹雨。天風夕送雷。扣舷驚險絕。誰是濟川才。

淮浦夏日雜感

濁浪南奔萬馬雄。清淮如線失春容。天連碧海盤霜鶴。水拍金隄轉雪龍。四載禹功今未遠。一丸蟻穴古難封。杞憂卻怕天饒笑。且與平治磊塊胸。

曉望華嶽

曙爽西來嶽勢尊。削成天外射初暎。寒松翠滴仙人掌。晴雪光浮玉女盆。氣肅金晶橫地軸。路尋箭筈倚雲根。懸知絕頂通呼吸。直吹排空謁帝閭。

函谷關

丸泥塞險恃崇墉。表裏山河百二重。城晚角聲通晉塞。關寒樹色鎖秦封。驚心逋客聽雞度。矯首真人跨犢逢。西去嶽蓮迎面起。雲開立馬許從容。連前一篇。雄整稱題。猶見王李遺格。

吳瞻淇字漪堂江南歙縣人康熙癸未進士官翰林院庶吉士○
瀟堂先生不以詩鳴而天然溫厚如其為人所養醇也

發富陽夜次嚴瀨

忽見桐江樹回頭失富春。中天一片月千古兩高人。自注嚴子陵祠世亂宜晞髮時平亦潔身。清風迎客

棹欲為滌征塵。五六語分承臯羽子陵潔身每在危亂之邦時平

三答家兄

留滯周南客相思春草餘。夢來乘夜月詩好代家書。父有千秋業兒慙兩地居。何時耦耕罷商略注蟲魚。

章藻功字豈績浙江錢塘人康熙癸未進士

晚遊西湖

雲漏晴光一縷斜紛紛歸逐七香車。山中影散樵薪客隄外帘收賣酒家。乍捲村烟橫遠岫暗移篝火點

平沙可容爛醉湖頭宿。夢轉三更玩物華。通體不脫一曉字

查慎行字夏重浙江海鹽人康熙癸未進士官翰林院編修著有敬業堂集○施注蘇詩行世久矣

敬業補所未及兼多駁正緣無力未及鐫行所為詩得力於蘇意無弗申辭無弗達或以少

秋感

渡淮橘成枳一變性終失。不聞返故土枳又化為橘。人生百年中孰是保初質。就衰水赴壑駐景戈挽日。

幾見白頭翁。鬢霜復如漆。見變善爲惡。不能復返爲善。卽未有小人而仁者意。所以防失足也。下又推廣言之。○若果於迴車。仍可返蹠爲舜。此又當活看。

開口觀醫魚者

牖河一線才如溝。戢戢魚聚針千頭。其中巨者長二寸。領隊已足稱豪酋。爾生亦覺太局促。漂漚散沫沉復浮。不知世有海江闊。長養何異蒙拘囚。居民活計乃在此。勞不撒網逸不鈎。竹竿綳罾密作眼。駕以一葉無篷舟。朝來暮去尋丈內。細細黏取銀花稠。庖廚卻緣瑣碎棄。曝向風日乾初收。微鱸但供飼狸用。性命肯爲纖毫留。吾聞王政雖無澤梁禁。鯤鯨尙有洿池遊。人窮微物必盡取。此事隱繫蒼生憂。一錢亦徵入市稅。末世往往多窮搜。

王文成紀功碑

明朝制科號得士。吾鄉前輩尤絕倫。于公王公後先出。往往艱大投其身。朝廷坐收養士報。倉卒定變皆儒臣。正德己卯夏六月。逆濠犯順江湖濱。公然舉兵思向闕。三郡一閩生祿塵。皖口駸駸勢將下。留都岌岌恐震鄰。是時海宇正清晏。武備缺略久不振。公方持節撫南贛。似可觀變徐遄述。同讐大義憤所切。守土敢限越與秦。出師必待九重詔。是謂以賊遺君親。飛書插羽聲罪討。攻所不備真如神。自從擣巢及執醜。通計時日纔兼旬。軍門戎首已面縛。天子鞅鞅方南巡。石頭城南獻馘罷。待命行及明年春。周公東征尙跋蹙。形跡詎可拘忠純。盈廷宵小古亦有。忌者愈衆節愈伸。初心祇期濟國事。豈必畫像圖麒麟。茲山

勒銘蓋有故。深刻歲月題。庚辰紀功非。夸乃紀實書。法逾勁辭溫。醇首從伐叛。敘始末。繼舉神武歸丹宸。天方嘉靖我邦國。誰其紀者臣守仁。隨征官屬例得列。惜哉名姓今俱湮。讀書臺傍一片石。百四十字磨崖新。逸事吾聞長老說。弘治一榜凡三人。後來立朝適共事。數本前定非無因。胡發其姦孫殉難。公乃一手回千鈞。自注弘治五年吾浙鄉榜公與胡公世寧孫公燧同舉其年場中見三巨人煌煌助業本德性傳爲異事及宸濠之變胡首發其姦孫以巡撫死難三人共此事亦一奇也出遇世會開經綸。質語百世可無惑。似此理學寧非真。後來輕薄好詆毀。撼樹不過欺愚民。如公表見猶未免。此外何以加冠巾。手磨碑碣發長嘯。白日皎皎懸秋旻。就禽宸濠始末詳言之表出一榜三異人事見事屬前定非偶然也末以紛紜詆毀比之蚍蜉撼樹用以問執小儒之口。

中秋夜洞庭湖對月

長風驅雲幾千里。雲氣蓬蓬天冒水。風收雲散波忽平。倒轉青天作湖底。初看落日沉波紅。素月欲升天斂容。舟人回首盡東望。吞吐故在馮夷宮。須臾忽自波心上。鏡面橫開十餘丈。月光射水水射天。一派空明互迴盪。此時驪龍潛已深。目眩不敢銜珠吟。巨魚無知作騰蹕。鱗甲閃爍翻黃金。人間此境知難必。快意翻從偶然得。遙聞漁父唱歌來。始覺中秋是今夕。

高斯億爲余畫竹以詩報之

畫竹原從草書出。眼中孰是張芝筆。高生善書久絕倫。餘技兼爲竹寫真。自言亦用狂草法。頗覺遊戲能

通神無諸城中少修竹。客舍連旬苦炎毒。賴君妙手補化工。爲我一揮終十幅。幅終擲筆風雨來。野人疎爽心顏開。須臾雨止墨光濕。潤入紙背生蒼苔。老龍蛻骨瘦崛強。翠鳳掉尾紛毳毳。魄雄氣大腕力壯。盡掃篠簜皆凡材。忽然幻作鐵鈎鎖。自注：江南李圭作竹。自根至梢極小者一一鈎勒成。謂之鐵鈎鎖。自云：惟柳公權有此筆法。世有誠懸應識我。渭川千畝胸鬱蟠。放縱精微無不可。文湖州脈繼者難。後來獨推王孟端。人間多畫風中柳。自注：東坡題文與可墨竹詩。那將春風中柳。珍重蕭郎十五竿。前後以草書作關鎖。章法不懈。

與顧梁汾舍人次閣學韓公韻

不是微之定牧之。紫薇亭擅舍人辭。十年未就歸田賦。衆口猶傳赴洛詩。往事相關碁已散。秋風纔到鬢先知。怪來東閣留賓地。難遣深情是酒卮。

景州董子祠

西風殘照廣川城。董相祠邊感慨生。官秩稍增秦博士。文章獨闢漢西京。醇儒豈以科名重。英主無如經術輕。卻笑武皇親制策。牧羊牧豕盡公卿。牧豕牧羊。卽爛羊頭。釐下養之先聲也。轉自崇經術者開之。故奇。○牧羊猶僞經術。此因牧羊而連及之。

度仙霞關題天雨菴壁

虎嘯猿啼萬壑哀。北風吹雨過山來。人從井底盤旋上。天向關門豁達開。地險昔曾資劇賊。時平誰敢說雄才。煎茶好領閒僧意。知是芒屨到幾回。

黔陽雜詩

玉斧銅標界有無。苴蘭城外函儲胥。田橫客已辭窮島。樂毅功難敵謗書。官濫羊頭爭獻鏡。謀新鼠穴可乘車。英雄穉子論誰是。廣武登臨歎有餘。

送陸蓬叟之井陘

不道西遊爾許難。萬峯高下渡桑乾。亂鴉雪緊荒城暮。叢雁天低斷角寒。燕市莫尋當日伴。井州且作故鄉看。到時尺素煩馳寄。及與梅花報歲闌。

擬玉泉山大閱二十韻

地闢丹稜泚。天開裂帛湖。連岡環北極。列曜拱中樞。鞬驛銷氛氣。風雲蓄睿謨。不忘神武略。獨握帝王符。吉日將差馬。先期已祭纒。桓桓齊步伐。肅肅選車徒。野曠金鉦轉。沙平玉帳鋪。一人躬靺鞨。九校勇馳驅。鵝鶴知兵法。龍虵入陣圖。雪光明組練。寒律勁雕弧。憶昨三犂候。親征萬里逾。行間走英衛。麾下拔孫吳。撻伐聲靈在。韜鈴將相俱。詩人賡虎拜。士氣動山呼。振旅時方暇。回鑾日未晡。殊威宣遼土。同軌坦經涂。典禮因時舉。櫓槍掃跡無。武功雖再續。文德久覃敷。用邊昭無外。周防戒不虞。煌煌太平業。磐石鞏皇都。

敘明大閱。下將萬里三犂。振起頓覺神骨俱適。作長律解得此法。自無平直之患。

登蕪湖浮圖

落帽家山記幾巡。弟兄南北各傷神。茱萸明日重陽酒。五處登高各一人。白注：時家次谷在粵，荆州在燕。德尹在黔，惟韜荒家居。故云。

曹操疑塚

分香賣履獨傷神。歌吹聲中總帳陳。到底不知埋骨地。卻教臺上望何人。或云：發盡七十二塚。或云：埋骨未易窺測也。此卽以望西陵。語調笑之。曹瞞應亦齒冷。

題蔡方麓修撰早朝圖

水晶簾捲月如鉤。侍史妝成盡下樓。比似早朝還較早。不教君起看梳頭。

陳至言

字青厓。浙江蕭山人。康熙癸未進士。著有青苑堂集。

春遊同吳六應辰張四星陳金大以賓韓十三渙文暨家魏公兄登壓烏山蘭若醉中慈上人索賦

湖光如練山如拳。青天倒削波心蓮。何年飛下小蓬島。驅山不用秦王鞭。山前山後桃花路。不上湖船那能渡。滿船載得踏春人。荇帶荷錢春欲暮。茅庵誰結山之阿。青竹江籬古薜蘿。徑穿曲磴飛紅雨。門對平湖捲白波。白波捲不開。紅雨飛不定。湖風忽起亂鴉啼。白雲流水瀉成鏡。座中韓生忽大叫。對花無酒花亦笑。阿菱十二能操舟。隔湖買得射洪到。射洪春酒醉百壺。壁上新詩值一掃。慈山山人知不知。人生行樂須及時。白注：白香山歌童名阿菱。

北平送友人南歸

哀角嚴城起。悲秋淚滿衣。如何遊子恨。偏自送人歸。霜落孤鞍急。天高獨雁飛。賞心零落盡。朋舊日應稀。

白杜鵑花

蜀魄何因冷不飛。空山一片影霏微。那須帶血依芳樹。自可梳翎弄雪衣。細雨春波愁素女。輕風明月泣湘妃。江南寒食催花候。腸斷無聲莫喚歸。

詠白丁香花

幾樹瑤花小院東。分明素女傍簾櫳。冷垂串串玲瓏雪。香送絲絲麝殼風。穩稱輕奩勻粉後。細添薄髮洗妝中。最憐千結朝來坼。十二闌干玉一叢。

喻成龍字武功。奉天人。官至刑部侍郎。著有塞上集。嘗有句云。丈夫既捐軀。豈能依骨肉。又云。立馬望黃河。天青塞雲紫。頗學少陵。

聞笛

夢裏悠揚橫笛聲。高天露下共淒清。愁來江漢人何處。望裏關山月倍明。萬里孤雲隨絕漠。十年羸馬更長征。誰知一曲終宵怨。霜雪無端兩鬢生。

曹寅字子清。奉天人。官江寧織造。著有棟亭詩稿。

歲暮遠爲客

曉鏡寒無光。驅馬別親故。殘月墮楓林。荒煙白山路。十年遊子懷。惜此歲華暮。載詠無衣詩。何以蒙霜露。
起手十字。寫盡辭家之苦。可與別賦並讀。

讀洪昉思稗畦行卷感贈一首兼寄趙秋谷宮贊

惆悵江關白髮生。斷雲零雁各淒清。稱心歲月荒唐過。垂老文章憂患成。禮法世難拘阮籍。窮愁天欲厚虞卿。縱橫掉闔人間世。只此能消萬古情。

揆

字愷功。滿洲人。官至都御史。

鷹坊歌

西郊天濶沙茫茫。高槐古柳溪風涼。地偏寂寞少人住。但作甌脫供鷹坊。中有海青最神俊。竦立毛骨森昂藏。金眸玉爪異凡品。下視狡兔如跛牂。側眼似覺天地窄。常思一舉摩穹蒼。憶昔遼代最珍貴。女直貢獻交相望。搜求無厭旋致禍。兩國轉眼悲興亡。至今黑水留異種。雕籠競致來遐方。五陵年少頗好事。愛玩豈惜千金償。嗟汝生性特趨捷。隼鷃未許隨肩行。長纜羈縲豈初意。歲月浸久成馴良。關山秋暮盛羽獵。商飆倒捲塵沙狂。翻身向空入霄漢。快若駿馬初脫韁。駕鵝潛飛雉避。雲羅萬里無遮防。老拳勁翮奮搏擊。風毛雨血齊飛揚。天生羽族亦有命。飢雀叫噪悲空倉。林邊野鶴骨立瘦。度腹僅得分餘糧。爾形巉隤亦安用。終朝肉食恆充腸。人間生計總媿汝。翻笑溪獺銜魚忙。侏儒方朔異飢飽。萬物榮悴真何常。

況今飛啄本同類，強弱吞啖堪嗟傷。食鰕原不乏魚鮪，捕蟬亦復驚螳螂。何當忘機效海客，驅逐猛摯延奇祥。羣飛衆動各適所，丹山鸞鳳常遊翔。桐花搖落期不至，老鴉攫肉紛路旁。且隨韓嫣逐金彈，排風毛質看騰驤。

議論正大，不及唐東江作，而筆力亦自矯健。

鈕

琇字玉樵，江南吳江人，官邑宰，著有臨野堂集。○玉樵博雅多聞，著觚牋一書，能舉見聞異詞者折衷之，可以補正史之闕，詩亦變風之遺。

春草

不信繁華事已空，傷心南浦復濛濛。何年陵寢斜陽外，幾處亭臺暮靄中。歷亂影連流水碧，萋迷香襯落花紅。多情陌上雙蝴蝶，猶是飛飛失故叢。

題方石居贈忍公用吳媿菴先生韻

方庭修竹綠如圍，琴榻書牀識靜機。紫朮夜春供客飯，白雲秋製入山衣。落花逕曲呼童掃，斜日林空放鶴歸。最喜遠公寬酒戒，虎溪乘月叩禪扉。

于養志

字涵一，奉天人，官四川巡撫，著有讀易草西征集。

不寐

秋風吹白帝，枕上落江聲。小苑煙光薄，疎簾月影清。三更羈客夢，萬里故鄉情。漸聽荒雞動，驅車按部行。

起手杜陵家數

管 掄 字青村。江南武進人。官師宗州知州。著有吹萬集。

匡廬歌

平明迎日上廬嶽。春山滌翠清如濯。攀蘿直上三萬級。側身蟠走如飛鶴。雲鱗鱗。花冥冥。劃然巨靈劈千丈。瀉出萬派洪濤聲。耳目蕩漾不能主。恍如坐我於滄瀛。滄瀛風雨不可測。中有一人不相識。回頭笑指遊空濛。導余絳節雙玉童。呼吸帝座隨清風。俯視一一金芙蓉。白雲如緜滿空谷。乘此欲與天庭通。拍肩笑問洪崖生。口吹玉笛銀河傾。山中木葉蕭蕭響。下界疑爲鸞鳳鳴。戩戩授蕭史。供飲白玉醴。長觥傾倒慎莫辭。醉眠石上呼不起。白猿蒼鳥莫相猜。前五百年曾住此。空靈縹緲之氣凝結而成。自是君身有仙骨。

陶孚尹 字謫仙。江南江陰人。貢生。官教諭。

早春閒興

東郊雨後景逾新。蠟屐尋芳踏軟塵。橋畔杏花村店酒。水邊紅袖畫樓人。鷓鴣覓壘頻穿幙。鸚鵡偷言巧弄春。陌上王孫何處去。青青草色送征輪。章莊章數風流斯在。

舟中

烏衣翦剪柳穠穠。陌上誰家賦采藍。我在木蘭船裏住。夢魂依約到江南。

水仙花

澧蘭沅芷若爲鄰。澹蕩疑生羅襪塵。昨夜月明川上立。不知解珮贈何人。同是凌波微步之義。而風神閒遠在欲離欲卽之間。

張養重字虞山。江南山陽人。○張嘗有句云。南樓楚雨三更遠。春水吳江一夜生。王漁洋尙書賞之。初謁漁洋時。卽問此等好句。生平有幾。張退謂人曰。生平快意句。不意王公一見道出。

自困溪歷延平抵建寧雜詠

風吹博望槎。白浪滾江沙。纜走懸厓險。舟穿亂石斜。龍鍾垂澗竹。躑躅映山花。野泊無人境。前林起暮鴉。
纜走懸厓險。卽所云百丈牽江上瀨船也。舟穿亂石斜。卽所云船落危灘無正行也。經過險境。吐語自然暗合。

不寐數嚴更。危厓戍火明。聞鶻春淚滴。防虎夜心驚。枕落高灘響。篷懸密雨聲。山川淒絕處。魂斷劍州城。

汀州道中

左顧朝陽右贛州。新羅高據萬山頭。番獠接地蟠關隘。烽火連天起戍樓。日夜鄉心皆北向。古今汀水獨南流。可憐滿眼崎嶇路。惟有清猿伴客愁。

沈受宏字台臣。江南太倉人。歲貢生。著有白漣集。○白漣先生。孝友誠懇。在名場五十年。終老不遇。而中心坦如所養。可知也。詩學親承梅村祭酒指授。故吐辭淵雅。無志微嘯殺之音。

九龍灘

我從建溪走千里。膽落魂銷百灘水。舟人更說九龍灘。絕險諸灘安足齒。嗟予漂泊何爲哉。今日親到龍灘來。恰聞昨日七舟下。兩舟卻破尋尸骸。上灘猶比下灘好。人登崖岸且自保。長索條分衆挽舟。獨把操篙付三老。一灘水懸一丈高。奔雷捲雪春怒濤。舟尾向天舟倒立。還防巨石留相遭。欲上不上力再著。號

呼互應愁一錯。我傍山根彳亍行。峻嶒石罅難移腳。九龍九龍路折盤。盡日勞勞上幾灘。最有嘉龍勢尤險。過此相慶方平安。嗚呼上灘人自苦。下灘水急誰能主。輕舟逐浪轉如飛。縱有賁獲勇何補。清流之人水中生。自注。閩中舟子。俱清流人。弄舟慣與洪流爭。商旅乘舟漫僥倖。性命直比鴻毛輕。我意欲將山路關。下屬安沙上鐵石。自注。安沙鎮。鐵石磯。爲九龍上下地名。閉卻九龍不復行。往來免誤天涯客。史漢敘事。全在生動。使千載下如親其難。數語。猶存史漢遺法。

舟暮

不知所宿處。暮色正氤氳。路遠隨行賈。村稀傍戍軍。江清波浸月。山赤火燒雲。同客如鴻雁。天邊自作羣。

憶母

貧是儒家事。難安爲老親。遙憐負米客。長作倚閭人。夜績孤燈暗。朝梳白髮新。生男亦何益。只是累艱辛。從憶母中傳出母之憶子。其言藹如。

許九日閩歸

萬里歸家白髮新。秋風重得飽鱸尊。脫身戎馬憐今日。回首關山哭故人。跌宕七言才更健。蕭條八口業長貧。一杯同把松窗酒。坐看天邊戰伐塵。

衢州書事

尙書昔日駐旌旄。烽火危疆保障勞。已見降王歸斧鉞。徒聞戰鬼逐弓刀。山圍四野寒雲沒。水拍孤城夜雨高。回首可憐離亂處。至今閭井半蓬蒿。此詠李文襄事。神氣完足。絕似梅村。

客曉

千里作遠客。五更思故鄉。寒鴉數聲起。窗外月如霜。如出李青蓮手。此種神妙。何必界限古今。

示內

莫歎貧家卒歲難。北風曾過幾番寒。明年桃柳堂前樹。還汝春光滿眼看。如此處貧。終身可混怨尤。視牛衣對泣者。身分遠過。

送毛亦史入都

三月鶯花紫陌春。曳裾何處逐風塵。毛生初作平原客。莫便輕他十九人。

蘇隄口號

六橋遙帶兩峯孤。煙水茫茫舊宋都。一向鄂王墳上拜。回頭不忍見西湖。賁高宗之溺於偏安。不欲復讐也。余舊有句云。卻憐一片臨安

月。同照龍沙五國城。亦是此意。

同錢太史泛舟東湖。座有女郎。湘煙戲題

酒綠燈青夜語中。家鄉同隔海雲東。傷心一種天涯客。卿是飛花我斷蓬。我未成名。君未嫁。感舊也。此則

泊於無關合處。生出關合一往情深。

送春

客舍長安十丈塵。閉門終日苦吟身。一花一草何曾見。卻道今朝是送春。極陳因題。偏得此新色。

陸韜字亦岸。浙江山陰人。

白雲

白雲縷縷青山出。雲自忙時山自閒。唯有野人忙不了。朝朝洗硯寫雲山。以忙寫閒。如許措辭。純乎天籟。

方登嶧字鳧宗。江南桐城人。官工部主事。著述古堂詩。

秦女休行自注。女報讎也。女秦人名休。

一尺髻。三尺刀。讎人頭。在女腰。渭水深。華山高。血風腥。天冥冥。手提髑髏氣崢嶸。法吏執之付以理。女欲報讎。先辦一死。後來又有龐娥親。千古英雄在女子。兩女子能復父讎。惟志堅而氣定也。宋高宗輩能毋媿死。

盤中詩

木刻鳩。紙翦馬。飛山頭。走山下。露貫珠。紉爲襦。雲裁衣。爛光輝。是耶非。孰辨之。六月桑。吐蠶絲。冬之蕙。苗新枝。爾所思。非其時。素者髮。丹者淚。心惻惻。老已至。骨肉殘。風雨駛。寸有長。尺有短。雙輪馳。不可挽。我所急。天所緩。擊瓦鼓。聲烏烏。白雲滿天歌。且呼歌。周四角。旋中區。初言似者之不能爲真。次言過時者之歸於無用。末言年命之速。時不可挽。而一付之悲歌也。中間隱分五解。

古詩

勿傲步兵哭。應比士龍笑。有時笑亦哭。不在音與貌。鐘鼓可以哀。長歌可以弔。寸心無營求。流泉淨泥淖。味淡聲亦希。淵然涵衆妙。笑哭兩不關。天半發清嘯。

村北

野曠朝鶴清。峯高日半規。遠風吹水氣。澹林結幽姿。策蹇訪故人。村北路逶迤。碧陰漾千畝。涼露沁心脾。刈麥走田父。婦子相追隨。老翁欣得食。回頭顧其兒。大兒束麥把。小兒抱豆枝。歌笑偕鄰叟。飲濯清湍湄。留連緩去路。寓目心情怡。田間有真樂。朝市知者誰。

出西郊道過摩訶菴經前明宦寺葬地

易代一坏土。纍纍葬宦官。餘威剩碑碣。流毒在衣冠。樹接宮雲密。鐘敲佛火殘。東京喬固塚。鬼哭北邙寒。
誅姦宦。悲忠直。侃侃稜稜。詩不徒作。

望南信不到

不見兒書至。應知下筆難。有心慰衰老。無計說平安。關塞寒雲早。門庭落葉殘。倘逢南鴈過。便當室家完。

霜遲樂

七月不落霜。卜魁城邊麩子黃。八月霜不落。千夫下田總歡樂。官田刈穀載滿車。官兵急公先完租。蠶帳

牛車十日路。驅向城中易茶布。和茶煮穀布裁衣。卒歲不憂寒與飢。人人盡樂霜遲好。蕎麥沙田收更早。但願年年不出兵。官兵皆休農夫老。

七兄以詩慰病和答

形骸百鍊後。心事五更中。苦海終無岸。愁城豈易攻。道危迷老馬。邊遠失歸鴻。誰謂青天濶。浮雲亦礙空。

紀事

爭看金甲健兒裝。玉輦雲移下鳳皇。名城都尉魚麗開細柳。將軍猿臂射長揚。螿弧露冷搖秋月。韎韐風高帶曉霜。大閱至尊非好武。良弓不爲太平藏。

濮

字澹軒。浙江桐鄉人。

聞梁蘧玉已寓京口

容易相逢尙未逢。老年親故喜相從。已辭野店中山酒。望斷煙江北固峯。一夜夢遊千里月。五更霜落萬家鐘。莫言人遠天涯近。書到樓頭第幾封。中有名句。

贈方望子入黃山修煉

詩成當代說方干。何事辭家久不還。夢裏湯泉非故國。眼前雲海是名山。花深古竈憑燒藥。月冷啼猿爲守關。只是白頭慈母在。不教容易別人間。入山修煉。非儒者事。況有慈親在耶。送之卽以招之。得贈人以言之體。

卷二十一

楊

賓作柳邊紀略塞外人稱楊夫子書法不染宋元習氣詩體專主沉着身後散如雲烟矣惟於其門人處得塞外詩一冊故所錄皆辛苦愁慘之音。

至寧古塔二首

望望吉林峯。白雲繞其下。登頓及今朝。亦得依親舍。父母驟相逢。注視還相訝。別時髮覆眉。胡乃成老大。鄰舍爭慰勞。應接苦不暇。姓氏未及知。空言聊慰藉。日暮細挑鐙。恍若夢中夜。喜極乃更悲。不覺淚如瀉。父母驟相逢。二句與妻孥怪我在。驚定還拭淚。同一真至。而父子至情。則又過之。姓氏未及知。空言聊慰藉。非身親其地者。不能道也。此種詩豈在語言聲律之工。

上書不得達。生男亦胡爲。四十始省親。問心良可悲。戲綵媿老子。挽須同小兒。西山日已薄。鄉國歸何時。歎息謂季弟。爾獨無分離。承歡廿八載。此樂人誰知。季弟隨侍戍所。故羨其承歡之樂。然不有行者。誰奉晨昏。不有居者。誰陳寃抑。楊氏可云有子。

換車行

冰凍馬蹄行不止。歷盡千山復千水。邊門未出已難堪。況出邊門二千里。瀋陽城外換柴車。柴車換得無人使。坡陀木石相枝撐。谷口泥淖多呀坑。日日轅摧與轂折。翻雲覆雨如人情。人情翻覆烏可識。出門步行荆棘。涕淚沾巾向北風。但見庭闈死亦得。直白語從少陵出。不從白傳出。

王 戩字孟毅湖廣漢陽人著有突星閣詩集○王漁洋謂孟毅池

秋日遊白茅寺次少陵韻

天空靈籟發。入耳心逾靜。何許微風過。月林搖客影。人生五濁世。爲歡苦不永。爭如羝觸藩。有如瓶墮井。及茲清夜遊。無辭燭共秉。佛香一院深。僧梵四山迴。身尙依迦葉。足真踐箕穎。禪燈照宵夢。妄念未能屏。金篋開倦眼。慧目陟東嶺。他時禮白雲。應上最高頂。

讀放翁集

南渡四傑俱驚才。醉心尤在渭南伯。江翻海立富篇章。躍馬彎弓老梁益。一寸丹心常炯然。歸來垂釣鏡

湖邊。卻憐老死空家祭。不見王師北定年。義略其詩集表其忠。立言識輕重處。

顧希喆字有典江南長洲人太學生○先生與惠研溪太史爲汪純翁入室弟。子五經紛綸有井大春之目。詩其偶然作也。然吉光片羽彌用寶貴。

姑蘇楊柳枝詞

行春橋下午風和。畫舫樓船次第過。一面青山三面水。不知何處柳陰多。

越國佳人舊有名。吳中嬌舞不勝情。柳腰合是芳魂化。長向胥臺一路生。原唱係鈍翁先生時和者甚多。幾同濟南秋柳然風神搖曳無

作論二

許 潤字儉農福建閩縣人。以子松信。官江蘇布政使司。贈如其官。

己巳六月拜別家慈之楚

荒雞斷續天將曙。遊子辭親寸心悸。霜鬢攜燈立檻前。頻語加餐暗垂涕。舟子招招促行李。殘書數卷裏破被。解維咫尺是天涯。回首空閨人獨倚。發乎至情。可使軀解。東野遊子吟後。乃有嗣音。

閩溪舟行卽事

天設南閩多險阻。古今勞役幾時休。下灘疑泛銀河水。上瀨如牽陸地舟。響應風湍歌欸乃。身藏雲木叫鞦韆。筆牀茶竈延緣好。準擬浮生託白鷗。

戊子春自嶺南奉老母挈家旋閩

行囊帶得嶺頭春。荔浦珠江過眼頻。半世總爲天外客。一家今是故鄉人。迴看東粵名山遠。好補南陔樂事真。莫問田廬在何處。洛陽季子本清貧。遠客旋歸。人生樂事。况一家全歸。尤天倫至樂也。此種真詩。讀者亦爲色喜。

舟泊劍津懷亡友劉復庵

分手齊安隔數春。何緣龍劍合延津。可堪風雨孤舟夜。白髮盈頭哭故人。哭故人一層。白髮盈頭一層。孤舟一層。夜一層。風雨一層。合并

寫來如聽猿啼三峽。

毛世楷字古愚。江南吳縣人。官光祿寺典簿。

武昌

百戰江山一水萍。武昌宮闕舊亭亭。枝梧蜀漢爭持角。控制東南欲建瓴。未定中原安枕席。底思建業厭魚鯖。只今鐵鎖銷沉後。浪打寒潮入穴青。自注鎖穴尚在。○此合吳大帝後三嗣主言之。盛衰之感。渾括無遺。

秋日感懷

秋夜焚香醮玉真。秋河歷歷動星辰。人間何處投金瀨。天上徒聞析木津。同學少年悲杜甫。美人遲暮感靈均。青天碧海吾無悔。且泛南溪採白蘋。此感士不遇賦意也。三四虛含五六正寫。最得淺深次序。

楊

模字子式。浙江仁和人。以孝聞。生平不惑二氏。布衣中有卓識者。

漢陽旅中送蔡子彙征遊湘潭

相送斜陽外。相逢更幾時。共來荆楚地。還賦別離詩。祖席杯堪把。河橋柳挂絲。洞庭他夜月。千里繫遐思。

閏六月初七夜月

南訛莫認火西流。顧兔高懸略似鉤。四日魄生方入夜。七回絃上未成秋。先期乞巧穿鍼線。後月舒光照女牛。半露姮娥能卻暑。廣寒深處玉爲樓。字字雅切。第四語疑有鬼工。

沈

峻字田子。江南吳縣人。廩生。

荒亭

荒亭古墓南。遠見車塵滅。墓前雙石人。送盡人離別。

九日

有酒賞重陽。無煩白衣至。恐驚鄰舍翁。謂是催租吏。催租吏。潘邠老不成詩者。也。此云驚鄰舍翁。用意又別。

沈鍾彥字美初。江南長洲人。誥贈內閣學士。兼禮部侍郎。○後學周準填諱。○先君子喜成斷句詩。館於畫師湯式九家。湯寫一花卉。先君子輒題一詩。年五十餘。專工分隸書。詩偶然作矣。身

後稿為人竊去。初刻國朝詩時。未能得也。茲於汪氏學徒册子中。得此三詩。皆湯氏館中作。潛兒時所及見云。

題畫

春林如畫。朝曦燕立。穠陰濕不飛。柳外有樓簾半卷。掠花雙翦。莫忘歸。

罌粟花

炊烟時或斷貧家。曉起俄看五色霞。任爾侏儒誇獨飽。籬頭已放米囊花。

金錢花

鄧氏銅山虛設想。沈郎榆莢許為鄰。清宵風露頻頻擲。似向空庭卜遠人。花曉開夜落。故有三四語。

沈紹姬字香巖。浙江錢塘人。○香巖羈蹟淮右。垂老不歸。浙中詩壇亦罕數其。人者。偶於清江子氏得手鈔一册。亟采入之。其生平出處未遑詳悉。

錢塘懷古

城上黃雲鎖戍樓。城頭古木叫鉤輈。地從江底分吳越。天向欄前挂女牛。尚有荒祠題伍員。曾無杯酒祀

錢鏐。可憐人事今蕭索。花草依然發故邱。吳越之分。以江為界。用江底字。句便不平。此可識捶字之法。

寄懷查伊璜先輩

亭亭絕巘結蕭齋。高峙龍門百尺階。蘇晉堂前宜繡佛。馬融帳後有金釵。淒涼歌板憐君僻。磊落文章與世乖。愛我巴歌長擊節。汝南月旦媿齊諧。

杜鵑

年年啼徧欲殘春。午夜枝頭血滿脣。不盡羈魂悲蜀道。何來處士感天津。聲中似怨無家別。地下應憐再拜人。縱使欲歸歸便得。故宮何處更容身。中二聯俱以對句見靈活。

寄家人

歸來借隱計猶虛。垂老他鄉歎索居。別久乍疑前劫事。路歧才得去年書。夢如柳絮飛無定。愁似芭蕉卷未舒。記得小園親手植。一欄紅藥近何如。有敦瓜苦。蒸在栗薪。到家喜極。無可措辭。故指瓜苦栗薪。以志歲月也。此寄家書。千頭萬緒。難於著語。故憶一欄紅藥。訊其榮悴也。此種詩風人之遺。

司馬懿故居

王業偏安蜀道難。奸雄寧獨數曹瞞。中原回首移神鼎。豎子成名建禪壇。城上風旛新塔宇。墓中巾幗舊衣冠。掀髯西指蠶叢路。丞相祠堂尙錦官。

淮陰侯

鼎足才堪角兩雄。當年應悔滅重瞳。分羹父子恩猶薄。推食君臣誼豈終。獨有千金酬漂母。曾無一語感滕公。名成自古身當退。沒齒休論戰伐功。
報一飯之漂母而不報救死之滕公英雄舉動不可解也漢祖不封紀信亦然此意無人道及

題韓蘄王湖上策塞圖

南渡何人主廟謨。清涼居士老西湖。兩朝和議分棋墅。百戰雄心付酒壚。策塞山前逢故吏。參禪花底坐浮屠。只今猶恨丹青手。不畫麒麟閣上圖。

詠古

脫穎人成公子名。不然碌碌竟何稱。夷門虛己真知己。莫繡平原繡信陵。

為報韓仇奮一椎。副車雖誤亦雄哉。淮陰也是韓王後。何用當時躡足來。
從無人開此口欲報韓者幾於語塞

張衍懿
字慶餘江人南太倉人

進峽

峽自夷陵東。江從白帝懸。兩崖如劍立。百丈入雲牽。石出疑無路。雲開別有天。往來頻陟險。千里正茫然。
三四卽入天猶石色注脚

瞿唐峽

歷數西南險。瞿唐自古聞。水從天上落。路向石中分。如馬驚秋漲。哀猿叫夕曛。乘流千里疾。回首萬重雲。

此下覆唐也。玩如馬字樣及回首萬重雲句。峽之在上可知。

過馬伏波墓

漆水東流遶墓田。伏波埋土幾千年。西風但見吹殘壘。南海猶聞畏站廛。豈有明珠來戚里。空留銅柱在炎天。功成未得雲臺畫。回首荒原一惘然。勝來宵小。功在南天。二語爲伏波定論。

度梅嶺

拔起危峯萬仞雄。勢臨百粵控南中。人從丹壁千盤上。路入青天一箭通。古碣尙留唐相迹。荒祠誰祀越王功。只今四海梯航日。早見征車度曉風。

孫中岳字楓麓。江南桐城人。

大姪書金陵回卽走西安悵然念之

纔解征鞍又遠行。相看意氣轉縱橫。故宮荒草埋金狄。客路秋風動石鯨。詞筆已從梁苑禿。詩情又向灞橋生。隴頭流水聲幽咽。似我頻年送別情。隨題轉折。中有全力。法本之初盛唐人。

謝志發字雲逸。江南長洲人。著有一角山樓稿。

春日送張梅莊之維揚

春郊烟景濃於酒。萬縷千絲隄畔柳。當杯惜別暫流連。長條能館離情否。挂帆暮靄指維揚。渡口分飛各

一方一葦不從張仲去。思隨飛絮繞雷塘。

過褚漁黃山居

數峯深曲徑。返樸遂栖遲。虛室雲爲牖。成鄰鶴在枝。漱甘臨澗石。遯迹稱茅茨。客至青精飯。長鑊共采芝。
頗見作意。

過舊送別處

憶昔亭前柳。分攜曾繫船。至今攀折處。猶是鎖愁烟。
言淺韻深。此詩社題也。同賦是題者。皆極力鋪張。然只是送別處詩。作者二十言中。一一注意舊字。尤

西堂先生定爲
壓卷。衆無異辭。

姜實節 字學在。山東萊陽人。流寓吳中。○此貞毅先生仲子也。好古畏榮。布衣終老。詩工七言。斷句每於若不用力處遇之。

繡谷堂中牡丹今歲惟開一枝。楊子鶴馬扶義。徐采若暨目存上人。各爲作圖。王石谷補一石。余爲

題句

四人分寫一花枝。寫出傳看朵朵奇。恰似蘭亭摹搨本。淺深肥瘦各相宜。
比擬恰好。若但著意牡丹。便是笨伯。

白頭公鳥

霜鬢逢春可自由。老人端的爲多愁。不知小鳥緣何事。也向花前白了頭。

鷗

天山白草路橫分。日暮悲笳不忍聞。想得玉關方轉戰。阜鵬風起欲盤雲。忽然變調

題黃鶴山樵聽雨樓卷

湖天過雨水冥冥。吹綠東風草一汀。絕似銅阬橋上望。遠山如髮向人青。

題簪花圖

六年前見傾城色。猶是雲英未嫁身。今日相逢重問姓。座中愁殺白頭人。此歌者張乙孃照。蔣纖谷屬楊子鶴圖之。同時賦詩者多濃纖

肥賦。獨作者盛衰之感。盡傾一座。外此目存上人。亦復超然。黃四娘家花滿溪。姓名因杜老傳也。

吳祖修字慎思。江南吳江人。貢生。著有柳塘詩。○柳塘爲高才生。友教遠近。張損持陳起雷周漢荀諸公皆門下士也。詩尙才情。議論不主蘊含。能成一家言者。

古詩

兀坐一室中。澄觀若止水。羣動既已息。萬籟不到耳。方寸涵靈臺。光明疇與比。此中無將迎。安用起碓礪。蒙莊曠達人。亦未解斯旨。如何逃虛空。趫然足音喜。此古賢靜坐觀心之法。宜達觀者未喻。少陵薄文章。謂非道所尊。不讀破萬卷。何由聞斯論。經史足驅使。今古堪胚渾。寂若萬象滅。燦若衆星繁。根柢有至理。刊落皆陳言。以此爲詩史。孰能窮其源。

讀司馬相如傳

綺靡文傳是子虛。曲終雅奏竟何如。後人嗤點凌雲賦。曾讀當時諫獵書。

讀王褒傳

金馬祠神事已遙。子淵才擅漢宣朝。非無聖主賢臣頌。只教宮人記洞簫。連上章俱用議論。義山詠賈誼詩。其初祖也。高青邱詠史亦多

此種

寄示趙書年陳起雷

千里歌驪竟不聞。尙思尊酒數論文。過門不入能無憾。未敢人前薄待君。千里遠別。不聞於師。故以詩責之。然不即比之鄉。願言中猶有

情餘

陳

炳字虎文。江南長洲人。○虎文居陽山之陽。性狷介。幾至三旬九食。有餽以粟者。苟非義不受。與黃震生中堅友。論詩文不合。至拍案面赤。過此仍歡好也。工篆刻。得顧荅正傳。俗士求鑄名氏。雖多金謝之。不顧。詩宗孟山人。或少變化。然塵埃盡滌。亦如其性情之孤子焉。

雜詩

斧柯不到處。惡木易成林。君子抱渴疾。偶然息其陰。端人貴潔己。寧使霜露侵。事往悔何及。喟焉傷我心。

漢上

楚國江山古。維舟望渺然。山盤青入蜀。江合白吞天。樊口上寒月。漢陽生暝煙。欲尋抱甕者。小別夕陽邊。

此首如孟山人之詠洞庭湖。獨爲變調。

尋馬山人不遇

一壑冷雲白。山家何處尋。忽逢采樵者。遙指梅花林。曲徑吠寒犬。短籬鳴野禽。柴門閉幽寂。獨立聽泉音。

文

字賓日。江南長洲人。著有十二研齋集。○待詔五世孫。能述祖德。敦士行。詩品亦近清真。

病中雜詩

十日髮不梳。五日面不醜。久病臥荒村。秋深積陰晦。體弱殊畏冷。破衲已可愛。晚晴秋更佳。山色遙如黛。我當拭几塵。推窗坐相對。

吾愛陸渭南。一生常善病。謂非酒色來。雖病元氣正。雙眼澀如棘。搗頤猶高詠。省事兼寡言。能使心無競。病亦不迎醫。書卷養性命。

李必恆

字百藥。江南高郵人。邑廩生。○宋漫堂中丞選江左十五子詩。厥後十五人中。殿撰一人。位大宗伯者一人。大學士者一人。餘任宮詹。入翰林者。指不勝屈。而李文以諸生終。且耳聾多病。年止中壽。何其厄也。然詩格之高。才力之大。可久者。應讓此人。事久論定。所得果孰多。孰少耶。惜未見全稿。祇從選本中錄出。不無遺憾云。

詠史

方朔仕漢廷。事道非玩世。時時一諷諫。彼自敬其事。叩頭誅董偃。凜凜直臣義。豈得以詼諧。目之曰遊戲。文成甫伏誅。五利復親屬。爵祿尚可捐。何至棄骨肉。天子而神仙。人苦不知足。汲黯言誠戇。陛下內多欲。

悼亡詩

一室何啾啾。人語雜鬼哭。那得少踟躕。黃泉路迫促。飛來白項鳥。啞啞上我屋。心知不吉祥。其時六月六。

病婦晨起坐。清水自膏沐。再拜辭舅姑。雙足不能縮。灑泣眼無淚。酸苦只在腹。迴頭語小姑。語咽氣復蹙。可憐我生兒。艱苦賴鞠育。勿以生死異。飢飽時在目。開我嫁時箱。布衣未堪鬻。指日秋風來。改作我兒服。徽音又如何。日月忽已積。枯坐慘不歡。出門昧所歷。空房起晝陰。冷氣出枕席。窗多蛛結網。案盡鼠行跡。亦有筐中麻。燈火手自績。亦有所對鏡。花鈿恣狼藉。徘徊思言笑。彷彿面如覿。回頭遽欲語。撫心一慄擗。前夜夢見之。色慘體更瘠。恍惚絮語間。問兒何所食。甃時魂魄聚。覺後泉壤隔。忘情媿太上。莊缶詎忍擊。漁洋悼亡詩。風雅之中。純乎富貴氣象。此則元相所云。貧賤夫妻百事哀也。越瑣屑。越見真至。即他人讀之。亦爲感傷。

謁浮山禹廟次昌黎石鼓韻作歌

粵若稽古帝舜世。光華復旦卿雲歌。滔天獨恣河伯怒。帝曰四岳咨如何。九載墮績羽山殛。黃熊碧血膏霜戈。惟鯀有子子曰禹。負罪飲泣爭濯磨。行山表木敷五土。大地碁置如星羅。首疏濟潔定冀域。導南條水先岷峨。舟車繹絡紛水陸。樯楫雜沓周陵阿。支祁夜鎖縛奇相。百靈炯炯誰敢訶。九河旣道九原滌。支分派析無舛訛。濁水綠字著神怪。穴中金簡書蚪蝌。鼎塗百物禦魍魎。驅使蛟鱷馴鼉鼉。蟻珠珍珠琳貢銀。鏤鉛松篠蕩浮青柯。土功荒度錯昏晝。踐烏八載同擲梭。東漸西被朔南暨。手胼足胝難委蛇。呱呱門內弗暇子。塗山洒泣同湘娥。玄圭載錫幹厥蠹。黃龍呈瑞江之沱。烝民乃粒玉帛會。萬國輻輳車書和。厥田惟上中下錯。總銓結粟開輸科。淮海惟揚古澤國。昏墊實維東南多。舊傳浮山此作鎮。崩崩最屬神鼇駝。

或云一拳實中繫。其下滾滾洪濤過。或云媧皇煉餘石。巨靈斧劈同切磋。又云蛟龍性險怪。制以鑛鐵沉諸波。頂露一丈其色黑。平砥如掌無偏頗。由來神物歷年久。溯源那復知其他。楚俗紛紛競淫祀。蛇神牛鬼爭媿媿。數椽冷落傍闌闌。空餘盛蹟誰摩挲。我來再拜瞻黻冕。俯仰四矚生悲哦。壞廊風吹舞鴨脚。麗牲有石誰刑鵝。山根斑駁苔蘚蝕。清泉朝汲唯禪那。吁嗟下士抱微尙。利濟無術心丘軻。負薪沉璧戴君相。會見注海行江河。緬思禹功纘明德。分陰用惜毋蹉跎。用韻詩須胸有成竹以意爲主而以韻從之則無趁韻之病矣看此篇敘事議論一氣呵成若自己用韻者然中有大力量在

鏡歌

從軍樂

牽馬出里門。扈蹕邊城去。西陲有遺孽。狡脫甚投兔。誓滅此朝食。家室非所顧。附書與六親。不必念苦辛。天子是主帥。拊循如家人。天子是主帥。士氣爲之揚。天子是主帥。甲冑生輝光。早夜五十里。在道無兼程。軍中米粟多。到處泉流清。昔怨從軍苦。今歌從軍樂。功成受上賞。圖形在麟閣。歌成於聖祖親征噶爾丹時一片鏗鏘漢魏音節

役者謳

磬石陟砮。山石齟齬。豈不憚行。念我聖主。念我聖主在軍中。親韎跣。肝乃食。蚤夜不得休息。小人戢戢。敢告勞苦。驅駝千匹。牛萬頭。峙乃糗糧。負乃餼。餘粟纍纍棄道周。野鳥爭啄聲啾啾。起句至敢告勞苦用七變韻中夾入十三職中

三句漢樂府
嘗有此體

歸化城

歸化城。徠羣生。日入之部。就我日出主。聞風者。施施來。來施施。帝念之。作室家。相地宜。俾爾父母兄弟妻
子無寒飢。出作入息。以遨以嬉。駐者歌。行者思。歸化城。樂不可支。

破陣樂

破車轟天白日燒。烟如虓虎軍聲塵。天威所到心膽墮。霜刃未交敵壘破。塵漫漫。大風起。鼓不絕。馬逸不
能止。窮寇解甲降。巨憝抱鞍死。皇帝曰嘻。武不可究。罪人斯得。矧敢多又。旦日將軍來。幕府上功簿。峨峨
甲仗高於山。孳畜谷量不知數。天子受賀軍門開。山呼萬歲聲如雷。

釋纍俘

臨高原。漠北墟。其無人。但見風馳霆擊。沙石的礫爭飛奔。殲渠魁。喪厥元。自餘跂行喙息百一存。寡妻弱
子俘軍門。皇帝德大。蓋載遠邇。曰予不孥戮爾。多賜繒帛。美酒甘食。與之更始。傳告衆人。赦女脅從。貸女
死。盍歸來乎。聖天子。樂府之妙。全在音節短長。錯綜變化。使人不可測識。此篇略備。

大愷

奏愷樂。歌彤弓。撻鼉鼓。鏗鯨鐘。酒再行。樂三終。羣臣拜手上帝功。帝不自功。謂女庸。爾諸臣來。大者公。小

者侯。釐爾圭瓚。秬鬯一卣。維茲山川。田土弗敢愛。分土三列。爵五及苗裔。永終譽。

月上

月上微風起。飄飄吹素林。草蟲浮夕響。木葉識秋心。涼氣湖中水。砧聲空外音。不知孤館客。此際感何深。

方正學先生祠

烽烟一夕逼南畿。痛絕孤臣淚血揮。十族可堪同蔓草。自注。時戮建文諸臣。謂之瓜蔓抄。九重亦自媿麻衣。金川燕子飛還出。玉壘龍孫去不歸。祠宇高皇幸鄰近。一坏鍾阜共斜暉。

吳門徐昭法先生畫芝

壘圻輪困態最工。披圖謾謾起清風。定知崖畔叢三秀。不在祥符萬本中。

孫元衡字湘南。江南桐城人。官臺灣郡丞。有赤嵌集。

渡海

捩柁揚帆似發機。茫洋自顧此生微。亂山斷處天應盡。一髮窮時鳥不飛。魚眼光邊波閃爍。龍涎影外國依稀。壯遊奇絕平生冠。斯語東坡未必非。

蔣景祁字京少。江南武進人。官府同知。著有東舍集。

伏波廟

雲臺圖功臣。椒房獨未許。示公轉見私。遠嫌亦何取。龍虵方鬪爭。幾先擇真主。回翔竟不歸。風雲會軒舉。五溪阻且深。一鼓氣如虎。顧盼惜壯年。矍鑠勇堪賈。薏苡蜚語騰。宮側起讒蠱。公匪一將榮。犀貝何足數。松固乳臭子。無乃累建武。薄遊沅江濱。靈祠立江澚。遺事徵故老。英風尚千古。慨然懷昔賢。功名想銅柱。
松固乳臭子。無乃累建武。儒者之言。不必意盡話竭。

朱載震 字悔人。湖廣潛江人。選貢。官石泉知縣。著有東浦詩鈔。

建蘭

叢蘭生幽谷。莓莓徧林薄。不紉亦何傷。已勝當門託。輦至踰關山。滋培珍几閣。掉頭忘閩海。傾心向京洛。輕颺晝回芳。清泉晚宜淪。玉軫一再彈。天際如可作。
此為王新城尙書題花木六詠之一也。新城謂玉琦為沈約賦郊居十詠。約曰。此詩指物呈形。無假題署。今之視昔。殆為過之。詩意古淡無迹。不同漫許。

雪中呈黃涓先生

鐘動明光接曙暉。雪花片片點朝衣。玉珂積素趨仙仗。金勒凝寒出瑣闈。北極樓臺天上迴。西山雲樹望中微。閉門有客還僵臥。歲暮羈愁未得歸。

陳于王 字健夫。順天宛平人。

遊文殊院歷天都峯逢採藥者

夜宿疑積雨。曉知松風鳴。日出霧靄消。紫氣羣峯生。十月山葉綠。境僻草木榮。策杖穿蘿徑。宛轉隨昏明。路滑懸溜滴。橋欹崩石橫。蒼茫衆岫接。絡繹飛泉迎。矯矯霜髯叟。負鍤巖邊行。息肩趺盤石。細說農皇經。謂我有夙緣。相顧若有情。令我坐其側。翠篋厓上傾。雙朮赤白色。二苓龜虵形。柏葉含貞性。蓂花至陽精。服食屏嗜欲。堪與元化并。金丹餌軒轅。誤人始容成。言訖超然去。白雲空冥冥。起十字山中夜宿真境後寫采藥者驚然而來超然而去妙在不盡

硃砂菴一名慈光寺

古寺開巖腹。層層雲氣流。溪聲過竹院。山影落僧樓。施食玄猿接。齋鐘遠客投。奇峯三十六。一一畫中遊。

王丹林字赤抒。浙江錢塘人。官中書舍人。著有野航詩集。○詩品在牧之飛卿間。羈留日下。諸鉅公交口推重。方欲薦揚明廷。而中道摧折。詩之鐫刻者亦少。藝林至今想望之。

銀塘曲

宜春小苑樓倚空。綠楊晴掃千絲風。湘簾翠卷暮山色。斷霞散作魚尾紅。美人舊事平陽主。十五盈盈學歌舞。羅襪還凌洛水波。錦衾祇夢巫山雨。團扇承恩夏日長。晚裝闌掃追微涼。玻璃一頃翦空碧。白玉勾闌銀作塘。姊妹相憐復相妬。私語凭肩一迴顧。文鴛雙宿乍驚飛。貼水荷盤瀉珠露。

白桃花次乾齋侍讀韻

相逢不信武陵村。合是孤峯舊托根。流水有情空蘸影。春風無色最銷魂。開當玉洞難知路。吹落銀牆不

見痕多恐賺他雙舞燕。誤猜梨院繞重門。無翦刻痕。有天然趣。一時和者。皆出其下。輦下詩人。鈔寫幾遍。

乾齋再賦白桃花重和

亞水仍宜曉漲時。似無姿處最多姿。融融和露逢三月。皎皎臨風見一枝。綉袖未依秦隱士。藥宮休遇漢儂兒。紅塵拂面何曾染。枉賦劉郎紫陌詩。

寒食

鳴鳩穀穀畫樓邊。欲雨還晴百五天。香薺亂堆梁苑雪。綠榆小鑄沈郎錢。催花雨起無多日。銜紙鳶飛又一年。賴得近時無火禁。茶牀吹裊竹爐煙。

題桃葉渡江圖

細雨橫塘記昔過。畫圖開處奈愁何。桃花一簇紅無主。春水三篙綠始波。解珮清狂餘髣髴。濺裙宿約竟蹉跎。由來蘭漿無情物。錦瑟華年送已多。

悼亡妹

十年兄妹悵離居。惡問驚傳涕淚餘。急雪罷吟簷外絮。大雷空寄袖中書。塞鴻影斷鄉關遠。墓草痕生奠饋虛。寶瑟凝塵長簟冷。潘郎憔悴欲何如。昔人論詩。實事貴虛用。死事貴活用。道韞咏雪。明遠寄書。實事深。情自。

顧嗣協字迂客江南長洲人官新會知縣○迂客詩才不在令弟秀野太史下未見稿本不及多收

雜興

駿馬能歷險。力田不如牛。堅車能載重。渡河不如舟。舍長以就短。智者難爲謀。生材貴適用。慎勿多苛求。
言用貴適乎其材也。此種詩劉繼莊時有之。緣情綺靡之家。未能辨此。

出居庸關

巉巖形勢好躋攀。粉堞高樓一望間。自有天威臨絕塞。不因地險恃雄關。衝雲澗雪懸千丈。撲馬塵沙失萬山。哀角悲笳聽漸近。何堪落日照征顏。

題宋宮贊葯州北征圖

刁斗聲中起塞氛。詞臣亦復張吾軍。王師神武原無敵。儒將風流更不羣。鐵馬夜嘶千里月。雕旂秋倦萬重雲。畫工自具凌煙手。圖出沙場紀舊勛。
鐵馬雕旂一聯寫塞外景象。有聲有色。可匹令嚴鐘鼓三更月。野宿貔貅萬竈煙之句。

李寅

字東崖江南吳江人。恩貢生崇祀鄉賢。

書武侯傳

寤想宗臣握帝圖。盟心無地不艱虞。運移京國方扶漢。力竭西南更託孤。縱使河山分鼎足。忍教正朔委當塗。可知空谷龍蟠日。莘野躬耕道自符。
初決策時。已知三分鼎足。而既受重託。志在死而後已。三代下出處之正。惟臥龍一人也。詩中無意不到。如讀武侯列傳。

書鄴侯傳

衣白山人現宰官。每參帷幄繫危安。但清河朔風塵易。欲掃宮庭枳棘難。戰伐有功身屢退。副儲無恙魄

猶寒。平生漫託神仙術。絕勝華陽早挂冠。平定河朔保全儲副功幾不在汾陽下託言神仙猶從赤松子遊意也而舊唐書以鬼道少之真乃不成議論。

王

錫字百朋浙江仁和人邑諸生著有嘯竹堂集○作者古今體詩俱有家數即入西泠諸子中亦為上駟而名不出里巷予往來浙西歷訪辭人無道及百朋姓氏者偶於仁和柴侍御案

頭得之錄入卷中因知名家而運淪者正有其人也為之慨然

法相寺

釋氏貴無生。不在形骸久。性真既已離。色相復何有。寺僧惑愚民。丹漆飾木偶。謂是肉身存。雙耳長齊口。斯言或信然。結習終多狃。四大了不空。六依反塵垢。何如任歸全。清淨還高厚。吾聞孔子云。死者欲速朽。

破釋氏之說。表出歸全正理。是為儒者立言。

題朱氏山莊

纒過合澗橋。便到雲林寺。泉石奇以秀。疑非人間地。不知萬木中。亭榭更幽邃。溪聲隔竹喧。松色當樓翠。鶴識嶺雲歸。僧乘蘿月至。嗒然吾喪吾。安問形與器。溪聲四語。如晤對左司。

冬曉登韜光禪院後山望晴雪

天地氣嚴凝。出郭遊人少。踏雪登山巔。凌虛縱遠眺。萬戶炊煙遲。奇景湛清曉。竹折枝蒙密。松危勢天矯。

足底多寒雲。眼前絕飛鳥。風驚碧落間。日出扶桑表。千重越岫明。一帶錢江小。百里紛皚皚。萬象爭皦皦。積素射晴霞。異光互迴繞。目眩下高峯。冥濛林壑杳。舉首望精藍。樓臺俱縹緲。

春江花月夜

春江兩岸百花深。皓月飛空雪滿林。爲愛良宵清似畫。獨來江畔試幽尋。東風送冷春衫薄。花月堪憐難擲卻。孤月何能夜夜圓。繁花易遣紛紛落。搔首踟躕江水濱。月明忽遇弄珠人。紅粧笑入花叢去。併作江南腸斷春。月轉江亭花影動。數聲嬌鳥枝頭弄。侵曉分途踏月歸。連宵應作春江夢。題中五字安放穩貼。風神去原辭未遠。

觀潮

風激滄溟立。驚濤拍翠巒。朝昏存大信。天地湧奇觀。皎日雷頻作。秋江雪早寒。賈帆收欲盡。千里水瀾漫。三四籠蓋一切覺事擬形似者。但得其瑣屑耳。

丁卯中秋

去歲中秋節。燈前病劇身。黃昏正風雨。白首獨酸辛。此日全微命。高堂失老親。不如垂死處。尙見倚閭人。兩中秋前後分寫。仍是一氣渾淪。見今茲全軀而喪母。不如前此垂死之身。猶依母氏也。律詩之變。至少陵已極。此又在少陵變體之外。發乎至情。格律不足以拘之也。

冷泉亭

小憩空亭戀翠微。上方日暮客過稀。春秋閱盡水長冷。風雨到來山欲飛。嶺半樹高猿每挂。林間雲暝鶴

知歸炎天坐久寒生骨。思向僧家借衲衣。三語正寫冷泉得山之欲飛作觀。字字皆活矣。極生動又極見成。

李白

誰道謫仙狂。豪情托舉觴。目無高力士。心識郭汾陽。青蓮大節已盡二十十字中。

詠雪

朔雪舞迴風。華凝香閣晚。繡幕尙生寒。人在龍沙遠。

俞

焘字日絲。浙江秀水人。

灰七姑辭自注。禾俗嘗以二月祀灰七姑。即紫姑之遺也。

紅繪張笄箕。斜插海棠杏。竈前舂來竈下請。小婦薦清茶。中婦陳白餅。大婦拜致辭。燭花弄鬢影。種秫種秫須多收。養蠶新絲十倍抽。不願生兒近王侯。但願蕃息滋羊牛。小姑靈威識人意。髮箸重重書作字。笄箕頻動小姑迴。瓦爐香燼柏子灰。穉男收拾棗栗去。門前簾鼓喧春雷。村落間瑣事。寫來最真。

劉石齡

字介于。江南長洲人。著有瓠容草堂集。國初孝子劉蓼。於鼎革後。艱苦省親。父前沒。遇未及。藹而韓公卒矣。詩榜。得力昌黎。近體漫淫宋人。因未見全集。故祇錄古體二章。以志厓略。

登祝融峯頂宿上封寺

梯空躡晴霓。振衣祝融頂。俯視七十峯。茫然墮烟井。湘流失灣環。洞庭餘溟泮。目窮日月鄉。袖拂天漢影。

迴首蒼梧雲。飄飄度前嶺。太陽汲新泉。石鼎淪苦茗。肺腑添清涼。丹元溢光景。塵斥隘八區。幽尋愜孤秉。徘徊會仙橋。晴崖發娟靚。絕壁有行跡。仙路細如綆。蚪松生古巖。翠葉光炯炯。靈秀天所鍾。應與茲山永。倒景迴明霞。大地總澄瑩。歸來宿上封。一枕山雲冷。生平學韓。此章又近謝公。

恆山

寶符玄王奠茲麓。有神上下扶坤乾。曲陽飛石就禋祀。虞舜不到恆山邊。茲語荒怪誰所紀。翠砥屨巽空磨鑿。磁窰兩岸盡絕壁。南有細徑緣秋煙。崖回水立三百丈。巨石怒落隨奔泉。幾年於此壘雲棧。排空石竇鬼手穿。餘材蠶嚼插山腹。欲落藤蔓相鉤牽。平生未嘗識劍閣。或謂蜀道險亦然。酌芳萬仞試初步。飛仙巖閣中霄懸。虎風一噫土囊口。犍牛飄墜輕烏鳶。渾渾雲霧起林際。乖龍鱗尾方蜿蜒。紫芝翳翳隱幽峪。黃榆颯颯飛晴天。中有仙人繫驢樹。下根離析枝相連。寒濤萬壑起松杪。翠雪散落山亭前。夕陽晚霞足幽眺。丹竈夜光然通玄。野人頗有濟勝具。度越峻嶺如登仙。俯視羣山盡臣庶。太白巨麗差隨肩。茫茫一氣辨龍塞。囊駝萬隊成蟻旋。丈夫寧能死章句。有名須勒狼胥巔。此心未遂身老大。投足巖岫差安便。徧遊五岳自茲始。俟昏嫁畢當何年。天地奇境。須得此驚人句寫之。蜿蜒如龍。幾於不可控馭。

黃中堅

字震生。江南吳縣人。歲貢生。著有蓄齋集。蓄齋以古文鳴詩其餘事。然即此二章。已見其情至文生。不同釘釘。

聞陸旣藩樞歸弔之

昨得傳來信。靈輻返故居。悲深翻作喜。望切轉疑虛。一棹風烟外。孤魂憂患餘。生還當此日。歡笑定何如。
傳來凶信故悲。聞其極歸翻喜。及望而未至。又恐消息之虛也。十字中無限曲折。結用反襯。以生還之樂觀。喪歸之感。倍難為懷矣。

題馬雲逵像

故國蒼涼天地秋。誰將肝膽託清流。狂瀾已向東南倒。正氣偏於草莽留。憤似安民悲刻石。
自注。官為魏闢立碑。命鑄

石。君先期遠避去。厚同齊相贖孤囚。
自注。魏忠愍公子濂。以誣賊追比。君勸募入金得免。畫工只貌須眉古。一片丹心未易求。官命鑄魏闢

曰。安民乞免。鑄名固善。然已汗吾手矣。通之浙西。以免。又魏忠愍被逮。至胥江。周忠介欲以女妻其孫。無人為媒。雲逵獨任之。此又詩中未及詳者。

沈廉字補隅。浙江嘉興人。○補隅方壯入秦。有去題百二關中壁。要看三千里外山之句。聞者壯之。後足跡幾遍天下。而蜀遊一集。沉鬱中復極縱橫。頗得杜陵氣骨。一時矜摩其壘者。

出連雲棧抵宿褒城

蜿蜒雲棧縈空迴。劃然半壁秦天開。煙巒高下勢排宕。興元形勝何雄哉。放眼褒中樹如薺。一片孤城落井底。紛紛飛鳥墮蒼烟。落日無光沙泥泥。我馬厓隕不復驕。解鞍止宿心搖搖。孤雲兩角天一握。側身西望驚魂銷。眼前險阻無時無。區區百里成坦途。且復開襟澆濁酒。放歌一醉花間壚。前路崎嶇君勿慮。揚鞭更上青天去。

江口行 井序

江口者。岷江口也。明末孽賊張獻忠。據成都三載。誅求民物殆盡。鼎革後。獻孽運其輜重赴楚。

巨舟數百號。連檣銜尾。東至嘉州。直抵江口。先是有武舉楊展者。豪勇冠西川。憤賊蹂躪。練集鄉兵備賊。至是截之。獻孽怒。舉火悉焚其舟。金物並沉於江。獻孽復集賊黨。還成都。會王師至。盡殲滅之。西蜀既定。頗有覬覦江中遺物者。竭人力取之。終莫能得。半溺於水。到今七十年矣。嗚呼。由此觀之。彼獻賊之暴。愚民之貪。皆歸烏有也。乙未秋。成都楊鳴岡孝廉述其事。爰作江口行。以志慨云。

岷峨江水清且深。黃金那識行人心。岷峨之水清且淺。黃金偏著行人眼。爲問黃金何處來。客談往事真荒哉。獻賊當年蕩蜀土。生民甲第成飛灰。一朝束裝賊東走。連檣直下岷江口。岷江楊展豪勇者。痛憤呼天忍束手。義旗一舉羣飛揚。弓刀直掩日月光。一時天地爲震怒。橫江截殺勢莫當。旌旗徧野風颼颼。嘉州三日江不流。煙雲黯淡日無色。山川撼動蛟龍愁。孽賊此時無一可。突怒鼻端欲出火。狂呼一炬燎羣艘。黃金百萬歸洪濤。賊衆奔忙還錦水。王師殲盡獍與梟。妖氛靖後七十載。可憐猶見民脂膏。江流滔滔走如駛。黃金曜日清見底。貪夫從此智力窮。無冬無夏驅人工。摸金半入江魚腹。十無一得空貪慾。馮夷冷眼笑人忙。孽賊猖狂有餘毒。不貪爲寶古所云。世人攘取徒紛紛。竊國竊鉤分大小。斬刈淪溺同亡身。我聞客言三太息。可備野史傳其真。君不見古來讓以天下惟恐澆。世間尙有洗耳沉淵人。獻賊之虐。愚於盡中。寫楊展義勇。能以鄉兵截殺羣賊。大是快人。

自彝陵州發棹至黃牛峽

江月欲落晨雞鳴。客船未發官船行。曉風颼颼舟子喜。蒲帆吹出彝陵城。鼓聲坎坎日方吐。船頭漸聽灘聲怒。棹轉俄驚又一天。桃花雞犬回頭誤。入峽愈深山愈奇。半雲半雨崖傾欹。疾風捲水水欲立。紛紅駭綠相離披。盡日冥搜思縹緲。空裏無聲絕飛鳥。斜照西南一角天。數峯青入微雲表。初疑前山無路通。劃然一線開鴻濛。乃歎偉哉神禹蹟。人力疏鑿天無功。危灘更轉勢欲壓。路斷雲根疑倒插。噴珠跳雪從空來。不知此是黃牛峽。我聞昔日有黃牛。助禹開導疏江流。至今風雲相隱見。愴恍如有神人遊。百丈高牽不可越。行人到此真愁絕。一舟簸蕩波濤中。卻與魚龍爭出沒。吁嗟乎。黃牛峽水無時停。黃牛峽石無時平。人言雖險君勿怖。那得人間有平路。斜照西南二語。宛用虛寫。危灘更轉以下。乃用實寫。峯嶺淙瀑聲勢俱壯。一結轉說開去。意境莫測。

錦江觀漲

桃花落盡春水生。錦江忽作輶雷鳴。奔流欲轉草堂去。大聲撼動芙蓉城。兩岸迴旋如走馬。飛騰上下馳流星。浪花排空百丈立。銀河倒瀉天爲傾。一氣渾噩渺無盡。乾坤不覺如浮萍。憶昔長江破巨浪。風帆乘我空中行。身如滄海渺一粟。性命直與蛟龍爭。今日江城看春漲。披襟想像神猶王。安得呼起浣花翁。相與乘舟坐天上。

苦雨有感

蕭瑟三秋序。沉冥萬里天。吳儂愁送日。蜀國雨爲年。時去名何與。詩窮老或傳。黃花應有恨。不肯放尊前。
雨爲年三字。新絕警絕。

入遠雲棧

飛棧盤空鳥路分。烟嵐霧樹合氤氳。人緣蟻垤紛相引。風遞猿聲斷更聞。百道爭飛天外瀑。千峯亂插馬頭雲。身當絕境渾忘險。不覺頻穿虎豹羣。

劍門

亂山迴抱蜀天昏。雙劍爲峯關一門。怨鳥三春悲望帝。井蛙當日笑公孫。幽花怪木隨高下。冷霧荒雲自吐吞。千載漫多憑弔客。摩崖詩徧綠苔痕。
自注石壁多鐫前人題詠。

翁 荃 字止園。江南江寧人。○止園究心三禮學。與方望溪張彝歎諸先生說經經。不以詩人自命也。卽詩中寄托亦復抱負不凡。讀其詩可以觀其旨趣矣。

讀武侯靖節合集

士生三代下。著書日紛紜。武侯與靖節。述作稱完人。三聘出草廬。治國兼治軍。滅賊志未遂。鞠躬竟忘身。彭澤歸去來。恥爲二姓臣。甘守西山節。荆軻願空存。二公重志行。豈惟尙華文。隆中尙未出。悠然樂天真。柴桑苟任事。述祖抒忠純。易地則皆然。孟子曾有云。吾生千載後。展卷如相親。夢寐接古賢。心期共探論。還慙志顏尹。望古情彌敦。
三代下。漢以武侯爲完人。晉以靖節爲完人。顯晦不同。志節一也。篇中善於推論。結意尤高。

田家詩擬陶

窮經一生事。老至強荷鋤。先師鄙樊子。農圃謝不如。我胡忽改業。甘爲小人徒。珪組豈不榮。日與傾危俱。黽勉食其力。一飽安有餘。魂夢無縈擾。日高起徐徐。牀頭清酒熟。聊以解辛劬。

卜

煥字彤文山東日照人諸生

愛菊

我非柴桑翁。素性亦愛菊。地不滿數弓。所栽備種族。泥沾洗餘滓。天暑障素幅。插援聊扶傾。除蠹恐滋毒。愛護同家兒。日夕榮顧復。花時繞畦看。相於淡無欲。遲暮亦何妨。霜餘愜幽獨。自號菊花農。頭銜珍令僕。花品人品並見不學陶自足陶趣。

卷二十二

劉青藜

字太乙河南襄城人康熙丙戌進士官翰林院庶吉士著有高陽山人集○太史既通籍彌刻苦自勵乞假後補官旋卒故發言爲詩多食齋腸苦之意

贈車同

癡雲壓長空。荒郊風栗冽。敝裘毛已禿。疲驢骨欲折。問君何所之。語次氣哽咽。子婦往歸寧。一病遂永訣。淮西有書來。返櫬資囊竭。況有小兒女。呱呱須提挈。燈昏漏且殘。爲君中腸結。麥舟愧古人。惆悵明朝別。

車同全軌字也。中河南解元王漁洋稱許之。惜無從覓其詩稿。

友朋何寥寥。人事兼聚散。一飯別君廬。時日不可算。子嗟喪頻仍。余苦病居半。酸辛勿重陳。倒篋煩點竄。但愧嶺頭瀧。波瀾怯河漢。佳惡吾自知。洪爐休辭鍛。後會總茫茫。莫負燈花燦。太乙車同。皆愁苦之士。故詩稿望其攻瑕。誠古道交也。詞意清真。何從著得藻采。

杜少陵墓

萬里清明節。回頭憶北邙。可憐出巫峽。曾未到襄陽。故國三千里。羈魂二十霜。蹉跎稷契志。終古恨茫茫。此甲少陵墓。故只就出巫峽沒耒陽言之。末二語志其生平之大者。

將赴都門

十載長安道。風塵鬢欲皤。天寧哀志氣。人盡笑蹉跎。日落汾邱壘。冰膠乾勒河。又驅羸馬去。惆悵意如何。

孟德疑塚

銅雀凋零鴛瓦殘。西陵遺塚徧河干。不知歌吹層臺妓。冷魄還從何處看。姦雄用心。不值詩人一晒。

王

萃字秋史。山東歷城人。康熙丙戌進士。著有二十四泉草堂集。○秋史所居。近望水泉。元于欽所編七十二泉之第二十四也。少歲多否少。人以狂士目之。王漁洋田山園二公賞其詩。

並奇其人。漁洋許其不以貧賤終。後果如其言。

南園

何處窳然有敝廬。空存老樹與清渠。亂泉聲裏誰通屐。黃葉林間自著書。草色又新秋去後。菊花爭放鴈來初。菘畦舍北餘多少。取次呼童一荷鋤。

春日述懷

泉頭十九年前住。試看垂楊大幾圍。猶是隻雞招近局。依然山鳥怪儒衣。詩如上水船難進。身似沾泥絮不飛。屈指年華竟虛擲。從前悔未買漁磯。

讀吳野人集

海上吟詩到白頭。菱花滿地一沙鷗。一生不出東淘路。自有才名十五州。

弔張布衣

拜杖譙樓血肉飛。少年帕首奮重圍。惜君生後陳同甫。獨使丹陽有布衣。布衣名秦運。明末上書開府。陳戰守之策。不用杖四十。推墮城

下。幾死。秋史另有張布衣傳載其事。

吳士玉

字荆山。江南吳縣人。康熙丙戌進士。官至禮部尙書。謚文恪。著有吹劍集。

玉帶生歌奉和漫堂先生

先生原本云。楊鐵崖有七客者之寮。以貯所藏笛。琴。管。胡。琴。古。壺。與。研。並。已。爲。七。六。客。各。錫。以。嘉。名。而。硯。舊。寶。於。文。丞相。紫。質。玉。紋。所。謂。玉。帶。生。也。丞。相。殉。國。硯。歸。謝。臯。羽。轉。歸。鐵。崖。鐵。崖。作。

志命門生張憲作玉帶生歌余幸觀奇寶亦贈以歌

中丞好古摠幽情。示我寶研光晶瑩。紫衣通身腰橫白。云是景炎故物玉帶生。曾遊鐵門翻白雪。向陪臯羽號冬青。其先文山早結契。揮灑神筆凌霄嶂。銘錫貫珠四十四。至今的燦光日星。棐几摩挲追往事。感慨鬱律何能平。或云信國當年初射策。生也卽隨顧盼趨承明。萬言一掃盡龜鑑。鐵肝石膽生風稜。轉瞬烟塵昏瀕洞。生同顛躋哀零丁。丹心磨礪句不滅。正氣磅礴歌吞聲。天崩地塌壯士死。但聞西臺擊竹聲。悲鳴可憐宋社淪海水。片石迺有神靈憑。鼎遷者三載五百。貞質不毀堪嗟矜。英英紫玉暈痕透。有如白虹貫日昭精誠。仰止孔石自注孔子遺研。陋桑鐵笛管之族。非其朋。焦琴況出自奸相。自注琴爲賈似道故物。蘇糞那混申椒馨。彼哉客寮並數七。嘈雜非偶徒虛名。豈如我公位置肅。左圖右史箋遺經。濡翰端可幹元化。作歌雅欲親典型。公歌突過玉笥作。爲生寫真垂千齡。萬言一掃四語見硯與文丞相一生關切後將賈似道之琴作一反觀忠義判別波瀾不窮矣作七言古須得此法。

嵇曾筠

字松友江南無錫人康熙丙戌進士官大學士謚文敏

五臺山

昔人一覽五臺勝。謂可不須五嶽遊。把詩令我神輒往。襍被欲發仍勾留。那知山靈有深眷。銜命太原償此願。見山已自開心顏。况復驅車到天半。摩霄跨漢何崑龍。呼吸直與精靈通。疑是媧皇此煉石。化作五朶青芙蓉。聞說東臺特奇妙。拾級先登縱遐眺。夜半湧出硃砂丸。海外天雞猶未叫。山僧復導過西臺。舉

頭正喜鴻濛開。陰晴涼暖變俄頃。颯然萬里邊風來。遙指南臺高幾許。蹈虛躡險如霞舉。上方歷歷見星辰。下界冥冥自風雨。欲往北臺更飄警。分明引入水晶窟。陰崖高疊萬古冰。幽澗長流千歲雪。中臺宛在山中央。云是文殊舊道場。馴虎何曾避行客。伏龍猶自依空王。飛泉宛轉當檐落。注入清池長不涸。鏡中大可印禪心。惟見一泓開澹漠。小憩剛逢梵課餘。妙香冉冉飄衣裾。到此能令衆緣息。祇有夙好猶難除。攝衣餘勇更一鼓。直上蓮花嶺頭坐。兩九日月足底生。百道烟霞腰下裹。一峯萬狀難具論。諸山環侍猶兒孫。置身合在最高頂。俯瞰一氣渾無垠。登高倘使心不猛。奇勝何由得全領。從知萬事須造巔。賴得茲遊發深省。竭來幸得公務閒。閒情暫寄水石間。幽吟頗得清淨理。遐賞適在清涼山。卻爲王程難久住。搖鞭又入紅塵去。回看一片出山雲。不識爲霖向何處。明點五臺。移形換步。登高造巔。悟及立行。結到出山之雲。雨澤天下。宰臣心事如見矣。

寄天津范自牧觀察

有母常教獨倚閭。顯揚無計愧何如。南溟鶴唳歸華表。吳地冰霜逼歲除。倘憶通門重啓事。定教伏闕上遺書。忠魂已化萋弘碧。雪涕君恩浩蕩初。哀贈公。懷節母也。閱詩意。應是未通籍時作。

登披雲山眺海

披雲更上一層臺。睥睨乾坤獨舉杯。海勢欲浮台宕去。濤聲直撼斗牛迴。三秋笳鼓當風競。千里艨艟蔽日來。爲詔奸雄齊解甲。聖朝懸爵待招徠。

俞兆晟字叔穎浙江海鹽人康熙丙戌進士官內閣學士○公視學江左時諸生進謁相接如先生弟子論文行外兼及詩品畫理以二者皆公所長也清風和氣至今猶想慕之

吳宮曲

館娃春深晝寂寂。美人列坐彈瑤瑟。自裁白紵六銖衣。回雪流風侍君側。清歌珠串鼻入雲。梁塵不動花
續紛。繁絃急管停復作。當筵催進泥金裙。軍聲殷殷來構李。犀甲晶瑩照秋水。破楚門東鐵騎圍。君王夜
醉扶不起。白紵歌殘事已非。洞庭漁唱雨霏霏。至今城上烏啼急。猶聽吳娘夜擣衣。悠揚婉轉結處一聲中有無限餘聲。

蔣

綱字有條廣西全州人康熙丙戌進士。

舟次書感

蒲帆一幅挂秋槎。渺渺煙波去路賒。不及茂陵歸有璧。翻同杜老別無家。囊中長物餘詩草。道上重陽負
菊花。他日縈懷在何處。知予依斗望京華。妙用活用。

鄭任鑰

字魚門福建侯官人康熙丙戌進士官至湖北巡撫○江左多名學使公其一也生平不以詩重而詩亦可傳。

春蠶詞

蠶月人家愛晴旭。紙筐分葉聲滿屋。三眠過後桑樹稀。稱來銀蠶繅爲絲。山村日午緯車響。榆柳陰陰煙
火遲。憶昔民間累苛派。新絲二月長先賣。近年兒女有完襦。急公更足償私債。艱難衣食在農桑。年年拜
祭馬頭孃。不辭小婦閨中苦。願作山龍藻火裳。他手每說詞蠶之苦此用翻案法見閨中女子忠愛有餘先生補衮之心言中流露矣。

喬崇烈字無功江南寶應人康熙丙戌進士官翰林院庶吉士著有學齋集

悼亡

慘目復慘目掩涕入汝房攬鏡泣孤影撫枕悲殘芳嫁衣亦已敝繡幕無時張篋篋遺素壁刀尺緘空箱種種感故物脈脈想容光憶汝初歸時盛飾拜姑嫜錙銖今何有毀棄坐我窮叶往余客京師心念第三郎料知需玩弄買來小銀鐙封題託鴻羽更著書數行嗟我寄未到此子先天殤汝每持以泣因之汝亦亡那更復見此能不摧肝腸末買銀鐙寄歸一段愈瑣屑愈見情真

立秋日枕上

新涼滌殘暑細雨作秋聲笛簾初宜夜鰈魚自愴情草荒原上塚夢斷驛前更來日憐兒女單衣補未成

徐用錫字壇長江南宿遷人康熙己丑進士官翰林院侍講

關峽早行

柝響知關峽東方尙未明虵紆危壁路雷走大河聲星落寒燈見沙崩疲馬驚一夫須設險塞下尙連營

三語鍊在危字
四語鍊在走字

張麟書字玉函江南華亭人康熙己丑進士官翰林院編修

早梅

夢寐難忘姑射姿。春山無伴每相思。誰將暖律翻三弄。卻遣芳魂逗一枝。淺瀨影疎人小立。曲簾香動鳥先知。賞心不待花如雪。好在寒冰未解時。

繆

沅字湘芷。江南泰州人。康熙己丑。賜進士第三人。官至刑部侍郎。著有餘園詩鈔。○司寇視學。楚中。延四方名流。校閱所得人文。極一時之盛。楚人爲予稱道之。詩舊入江左十五子選中。

予曾評點。後披全稿。見牛屬朱墨。改易所云。老去漸於詩律細者耶。

王孝子詩

丁徭日繁重。閭戶多逃亡。文安王氏子。飄泊辭故鄉。棄我舊井竈。舍我舊耕桑。甘心雜匹耦。各自東西翔。故鄉不能歸。涕泣淚如雨。一燈何熒熒。健婦搗門戶。生兒在襁褓。日夜尙須乳。兒生未十期。兒志如成人。上堂見阿母。兒有平生親。兒生不知父。兒不如鮮民。阿母爲兒言。汝父久埃塵。上天與入地。欲見愁無因。孝子聞母言。含淚聲酸辛。團圓復團圓。爲兒授家室。登堂見花燭。吞聲哭不得。兒生未識爺。何以安枕席。誓辭連理枝。永遠事行役。再拜阿母旁。泣血泥顏色。出門何所之。惘惘別里門。長號感行路。天地爲之昏。日則望雲馳。夜則戴星奔。飛簷冒天末。何處尋本根。行行大壑旁。僵臥荒祠外。精誠動木石。魂魄交冥昧。開門揖老叟。夢中與神會。午食見指南。莎羹未粗糲。當歸乃隱語。不聞附子膾。迤邐入東南。山澤形神枯。黃沙蝕顏面。瘡痍生肌膚。果然帶山下。夢覺逢精廬。佛香飄院落。有客蒼髯鬚。詢知舊鄉里。驚喜立坐隅。尋聲猶識得。精神相感孚。父子抱持哭。淚落千僧徒。慇懃勸還鄉。緇林戒行李。入門見

老妻毀顏已暮齒。新婦潔盤餐。爲翁具甘旨。至行格天地。和氣浹鄉里。高曾遺矩矱。子孫遍朱紫。至今道
旁人齊歌王孝子。胎源於孔雀東南飛一章。中間夢與神會一段。妙在若可解若不可解。

房中詩

嬌兒衰師繞案長。文如翻水聲琅琅。夜堂篝火攤書讀。吹落燈花紅簌簌。小者玉頰好眉宇。手持棊粟能
爾汝。中男依兄坐短檠。毛詩新讀一半生。山妻椎髻夜操作。手弄諸雛共笑樂。頻年踪跡隨天涯。賴汝罷
勉能持家。不爲楚相君勿哂。與君相偕鹿門隱。羅仲一家可云有道妻子皆得佚樂司寇非隱人而家庭之樂與羅仲同也。語語用韻兩韻一轉。格調得自嘉州。

袁術

公路浦前白日昏。千重駭浪猶奔騰。袁曹昔時爭戰地。秋原尙作黃雲屯。兄弟鬩牆事堪歎。術也讎紹翻
結瓚。謬算適足羞先公。強云圖讖天所贊。里謠誰記當塗高。僭號不聞閭象諫。符命之說誠荒唐。當車有
臂疑螳螂。江淮凍饑士卒死。宮中日夜爲荒亡。蛾眉皓齒競害寵。馮家小女悲懸梁。灑山之敗所自致。江
亭奔竄如亡羊。堆牀十斛僅麥屑。一勺入口無蜜漿。當時割據意何取。離離滿目悲禾黍。我來袁浦爲弔
古。老龍晝眠蛟夜舞。鯨波蝕盡戰場土。衆尊爲帝。而欲奔匈奴以自絕者。劉虞也。因當塗高讖語。而欲自稱爲帝者。袁術也。漢末羣雄。惟術爲至愚且妄。身死後。妻孥不保。亦惟術爲至慘。篇中綜本傳始終言之。不漏不支。自然中節。

送顧嗣宗返吳門次留別韻

韓孟雲龍日夕依。故山猿鶴久相違。人如諸葛真名士。品是江東大布衣。吳地烟嵐應入夢。楚天鷗鷺漸忘機。步兵日有尊鱸思。隱語當歸且緩歸。

訪汪鈍翁先生故居

山光塔影尙嶙峋。遺築丘南野水濱。草沒垣衣何限感。乞花場上弔詩人。乞花場鈍翁先生所居

張大受字日容。江南嘉定人。康熙己丑進士。官翰林院檢討。著有匠門詩文集。○先生未第進士時。即已陶成士類。既入館選。汲引尤衆。後有貢之者。弗與校。且若不知也。吳中宏獎風流。斷推匠門。今沒世已久。過其故居者。猶想望餘風焉。駢語韻語。皆清新獨出。披其集如遇其人。

魯肅廟

關達謀吳策。幾微保漢心。才輸公瑾捷。道契武侯深。夏口帆初上。龜山廟至今。靈風吹赤壁。城北雨沉沉。

肅始迎先主於長阪。繼勸吳主召周瑜還。與武侯共破曹操。後又勸借荊州於劉。則肅匪獨忠于吳。兼能保漢也。十字中。包括無限史事。三四申言之。

送顧祿百外孫

博識蟲魚晰。閒吟花草工。長康三絕擅。東野一身窮。老我離思外。慈親望眼中。榮名真不朽。雲樹隔江東。

慕廬先生還朝

交無洛蜀本和衷。雅量分明司馬同。常以文章推後輩。久將政事托羣公。委蛇晏退裘應敝。狼藉髡留鬢。

莫空出處古來雲。變化芳馨誰播史書中。韓公得詩。答以斷句云。扁舟不怯蠶裝薄。好語穿來一珠吟。到交無洛蜀句。千秋牙曠賞音孤。以公中朝子立。不隨黨同。詩

能得其素心也三四
亦惟公足當斯語

睢州謁湯公祠

過宋頻登夫子堂。傳經應比鄭公鄉。曾遊霽月光風裏。早歎浮雲白日旁。衆母至今歌子產。伏龍曩昔起南陽。音容似昨人千載。贏得吳民淚溢眶。茂叔襟懷伏龍出處國儲遺愛而不免浮雲之蔽日君子歎息痛恨於方正不容也事久論定曲直顯然彼謂人者亦何益而哉爲此

送沈子大赴江西

才子秋風淚點多。遠行霜曉唱驪歌。三年皮骨空人役。千載文章奈命何。紫氣豫章龍變化。青峯彭蠡雁經過。舊時慷慨南征賦。送客都門髮已皤。

答袁虎文

重遊梁宋訪心知。一揖尊前感贈詩。射虎舊誇從李廣。鬪雞今喜逐袁絲。文章白璧元無垢。意氣青萍兩不疑。歸到江南最相憶。小園風雨對牀時。

呈竹垞先生四十韻

日月懸鴻筆。江湖伴釣翁。斯文如一髮。此老不三公。世溯章賢相。生稱江夏童。異書都默識。疑義若披蒙。瑚璉珍初待。金刀數正終。蘭成終竄谷。王粲早飄蓬。寄興滄溟外。悲歌燕趙中。揮箋迴雪白。拍板落花紅。

劍拔看天小。鴈浮覺海空。但隨遊野豕。未卜漸遼鴻。當代旁求說。盈朝並薦雄。對揚欽學邃。拔擢荷恩隆。太白官供奉。龍門史折衷。掄才弘鐵網。校藝試青銅。書卷裝歸橐。神仙近法宮。騎將天廐駿。捧出御書虹。自此期調鼎。無端怨失弓。歸來操翰墨。吟笑脫樊籠。醜舫波還泛。書亭日久烘。聖經羅象緯。物理析魚蟲。注地鄴元似。論詩蕭統同。采飛神每助。斤運帝無功。鳳小能翔漢。蘭摧莫叫穹。暮年餘痛哭。篤志益明聰。鹿引晨穿屐。龍聽夕倚篷。門生輿請舁。朝士刺求通。斯畫珊瑚缺。邕文金帛充。共知占蔚豹。仍望載非熊。小子勞鑽仰。先生發覆蒙。逢人憐抱璞。知己撫炊桐。再謁鴛湖曲。高談桂樹叢。森森開武庫。藹藹挹春風。世路誰輕薄。耆儒只困窮。養心欣事簡。餬口幸年豐。角里芝徒采。春卿爵可崇。人情留樸拙。天氣值和融。三歲依門下。千秋歎道東。經營慚小技。雕斲冀良工。廣樂陳鼗鼓。凡民警曠聳。升堂私有願。陶冶及纖洪。

題徐大臨湖鄉小景

鳥背嵐光過夕汀。碎萍魚唼水花腥。青山一角湖三面。記是塘西乙未亭。

七言絕句。唐人神韻勝。宋人以清新勝。此宋體中最高者。

山居

愛看支硎一角山。何妨身臥薜蘿間。峯頭片片秋雲白。不礙虛亭鶴往還。

清流道中梅花

駐馬清流香氣吹。東風漸近落花時。可憐躑躅關山路。才見江南第一枝。

惠士奇

字仲孺。江南吳縣人。康熙己丑進士。官至翰林院侍讀學士。著有牛農人詩。○牛農少卽厲志經史。而於經學尤深。著有易說春秋說禮說大學說等書。皆晚年論定者。視學廣南以通

經術爲先務。空疎舊習。爲之一變。操行之潔。比於白圭振鷺。廣南前此未嘗有也。身後記於韓山。配食昌黎。韓子至今尸視之。詩近唐人。以自然爲宗。視研谿先生家學。各有所得。

除夕寫懷

持門賴健婦。頗憶貧孟光。今夕復何夕。洗手調羹湯。辛盤與椒酒。一一親排當。夜半理梳裹。燈前事晨粧。君姑尙未起。雞鳴候高堂。駒躑偕先後。雜珮鳴珩璜。我亦夢到家。身侍阿母旁。烏啼忽驚覺。仍在天一方。夢回思往事。石闕空銜悲。緬惟遭喪日。事遠尙可追。先君昔遷謫。家細不得隨。二載密雲尹。溘然遂長違。時余行未至。伯兄適南歸。飯舍未及視。安用有子爲。一棺尙寄旅。僻在城南陲。遙憶今夜奠。紙錢風吹灰。吾聞古喪禮。未葬不釋縗。念此痛欲絕。有如刺心錐。哀歌不成曲。我唱和者誰。二章發乎至性。不以辭句爲工。

坐月酬鄭 見懷之作

明月上西軒。流光照積雪。開軒一長望。皎皎千里潔。佳人怨遙夜。起坐彈金屑。爲我操孤鸞。悵然感離別。相思報瑤華。無使音塵絕。

牧童詞

溪水碧。溪上牧童青。簞笠烏。韃斜繫柳陰中。藉草臥吹三孔笛。橫鞭還過飲牛亭。亭邊撲撲飛牛蟲。雀兒鼓翅蝦蟆跳。陂塘水滿齊牛腰。歸來仍放青山郭。遠樹仟仟烟漠漠。日暮聞歌不見人。隔林月下敲牛角。

連下二章，皆張王體中最雅潔者。

樵客行

春山暮。山花吹滿樵人路。平原淺草連天遠。樵風初起樵雲捲。數聲樵唱出林間。夜夜歸來擔頭滿。曉上陰崖逢月黑。前溪虎去猶留迹。昨宵山水漂人家。失卻澗邊磨斧石。伐木當伐檀。刈薪當刈蘭。刈蘭爲佩檀爲輻。免使年年老空谷。

田家行

二月青蟲初化蝶。三月紅蠶欲斷葉。桑榆門巷綠陰成。四月家家纈白雪。屋邊豆苗垂宛宛。鴈齒叢長雀梅短。道中歷亂蝦蟆衣。昨夜風來牛跡滿。竹雞啼罷楚鳩語。十日田家九日雨。平旦開門看天色。聲聲老鷹催收麥。日出腰鎌向隴頭。桑間驚起黃離留。

送蔣樹存之官餘慶

憶昔識君年弱冠。風流文酒長耽翫。無事頻過交翠堂。觥籌往往行無算。二月山塘柳色青。玉簫金管醉中聽。可憐明月初三夜。最憶春風第一亭。沉沉玉漏鳴街鼓。寂寂春陰月停午。燈前一曲柘枝新。小玉傚傚踏筵舞。雲散花殘事已空。秦淮水榭又相逢。三條共翦深更燭。五夜同聽鎖院鐘。數載飄零不相見。去年忽覩雲卿面。待詔吾留金馬門。修書君上南薰殿。只今天子急循良。莫恨天涯道路長。烏撒白苗生似

鹿。禽。丁。溪。子。狼。如。羊。邊。氓。正。欲。煩。君。撫。況。有。君。家。理。縣。譜。九。溪。斜。繞。葛。蠻。司。十。洞。遙。連。金。竹。府。不。知。握。手。在。何。年。離。別。今。朝。倍。黯。然。待。爾。歸。來。尋。舊。約。月。明。重。泛。虎。邱。船。寫。離。合。聚。散。情。事。可。入。管。絃。○。理。縣。譜。係。傳。瑛。父。子。作。令。事。事。見。南。史。此。應。借。用。

送陳秋田先生之官長寧

善。卷。洞。裏。咀。丹。客。玉。液。朝。朝。鍊。精。魄。偶。然。作。吏。山。水。邦。衣。裳。猶。帶。雲。霞。色。昔。年。曾。到。瘴。江。濱。布。襪。青。鞋。萬。里。身。邑。里。時。逢。烏。蠻。戶。居。民。半。是。馬。留。人。今。年。仍。往。西。南。徼。路。遠。健。鷹。飛。不。到。劍。閣。回。看。北。向。雲。石。門。遙。指。南。征。道。知。君。才。似。寇。巴。東。莫。歎。生。涯。類。轉。蓬。登。棧。人。行。紅。樹。杪。隔。溪。猿。嘯。白。雲。中。平。林。芳。草。萋。萋。綠。從。此。連。絲。到。西。蜀。月。上。峨眉。一。片。秋。煙。銷。巴。水。三。回。曲。瀘。川。渺。渺。夕。陽。低。更。在。瀘。川。西。復。西。遙。想。訟。庭。春。寂。寂。海棠。花。發。杜。鵑。啼。

張文獻公廟

海。燕。辭。巢。日。何。曾。戀。舊。痕。南。州。一。麾。去。北。闕。幾。人。存。蕃。將。頻。蒙。寵。胡。雛。竟。負。恩。淒。涼。謫。仙。怨。空。向。曲。中。論。自。注。劇。談。錄。玄。宗。幸。蜀。次。駱。谷。下。馬。望。長。安。嗚。咽。流。涕。謂。高。力。士。曰。吾。用。九。齡。之。言。不。至。此。因。上。馬。索。長。笛。吹。之。有。司。旋。錄。成。譜。名。謫。仙。怨。○。卽。少。陵。所。云。受。諫。無。今。日。臨。危。憶。古。人。也。公。歸。南。州。而。李。林。甫。牛。仙。客。用。事。矣。北。闕。尙。得。有。人。乎。幾。人。存。婉。言。之。也。

廣州十二月書懷

風。物。娛。遊。子。孤。懷。強。自。寬。鷓。鴒。知。歲。暮。鸚。鵡。訴。冬。寒。山。上。飛。鳴。好。樊。中。飲。啄。安。可。憐。珠。樹。鳥。無。地。避。金。丸。

自注西陽雜俎。鷓鴣正月一飛。至十二月十二起。新唐書。林邑獻鸚鵡。數訴寒。詔還之。○寫飛鳥。卽自抒懷抱。

姑胥臺懷古

五道通諸郡。三江繞故都。白猿終霸越。黑犬竟亡吳。人去空芳草。春來長綠蕪。蕭蕭楊柳岸。愁殺夜啼烏。
黑犬及下章公孫聖事俱見越絕書。

好上三臺望。還從九曲行。可憐文種水。猶抱伍胥城。風雨松陵暗。煙波笠澤清。公孫今在否。寂寞久無聲。
自注公孫聖曰。我死當使後世有聲響。及吳亡。三呼三應。

題座主安溪相國紀伯父葆甫先生破賊詩後

孤城鼓角四山聞。刁斗聲中五夜分。獨領數人探虎穴。何如一鷓入鴉羣。青袍不改儒生服。白馬偏成上將助。萬丈峯頭餘故壘。千秋猶說李摩雲。
李罕之攻破摩雲山。樹柵其上。時人呼爲李摩雲。見五代史。

送徐亮直編修奉使琉球

海神擎日映波紅。此去扶桑直向東。鯨眼常明無月夜。鸞身能使不帆風。天書捧到恩應渥。唐帕傳來語盡通。
自注唐帕譯者之名。想見中山迎使節。踏歌齊擁紫髯翁。烟開鰲背千尋黑。日射鯨波萬頃金。三四語足與相敵。

張照字得天。江南華亭人。康熙己丑進士。官至刑部尙書。諡文敏。○文敏性。地高明。通釋氏教。所作詩。左磕右觸。皆禪語也。予未諳禪理。仍取主性情。叶風雅者。

觀海

境界真無兩。聊爲物外觀。乾坤浮一氣。今古浸雙丸。野鳥飛難過。眞仙望亦寒。人間白少傅。高詠海漫漫。
乾坤十字。本魏武東坡句意。鑄而成詩。可以壓倒一切。

蓬萊

蓬萊山水橫波。流入銀灣隔翠蛾。天上星辰歡會少。壺中日月別離多。鸞驚香夢紅蘭笑。花帶愁痕青鳥歌。昨日子登傳敕去。一時齊羨下天河。
此卽悼亡之作。以李義山體行之。不使人一覽而得。

悼亡

邊關暑夕冷於秋。孤鵲驚飛別樹頭。此夜萬家明月裏。幾家思婦獨登樓。

秦道然

字維生。江南無錫人。康熙己丑進士。官翰林院編修。著有泉南山人存稿。○前明高忠憲歸季思二公詩理足於中。不假修飾。得陶公一脈。泉南先生亦然。無理語。有理趣。別乎白沙定山流派。彼求工詞句。與說理入腐者。均不知其品之高也。能讀陶詩者。欣然遇之。

山居詩

山齋寂寂。玄鳥初來。春風融融。林花乍開。共二三子。撫景銜杯。從容詠歌。吾師點哉。
自寫天機。人力不與。

靜坐吟

我愛山中坐。白雲來無時。垂天自鶴鶴。歸山亦徐徐。青松千歲姿。天矯干霄枝。舍此不棲鳥。營營竟安之。超然無懷世。日夕心神怡。

我愛水邊坐。照我遺世情。周流雖不居。瑩澈全其真。蒲蘆依渚碧。杜若方春榮。波間雙白鷗。游泳不復驚。高天雲影淨。相對同涵清。

夏日閒居

何以娛永日。對景常忘言。棲遲詎非計。造物與我閒。碧草長庭除。珍禽息樹間。微風生秋意。雨氣在遠山。良友欣然來。小酌俱陶然。柴門月色裏。相送溪橋邊。

春日月坡初成

湖干月無際。月坡先得之。山人倚杖間。坡上月到時。逝者不可留。明月常如茲。田夫荷鋤歸。漁舟亦來斯。笑言隄柳畔。誰云不相知。仰觀天宇空。不礙浮雲馳。千川同一月。孰寂亦成私。撫景時有得。古人吾所思。千川同一月。化機之大公也。若寂守一川。謂惟此川有月。則私矣。此吾儒與釋之別。

湖上閒居友人適至

昔人感離羣。吾亦念吾友。片帆湖上來。扁舟繫隄柳。呼童掃三徑。欣欣競奔走。清言味道腴。庶慰別來久。相期在千載。聚散亦何有。結契不同方。合併亦非偶。載歌伐木章。真氣滿戶牖。

微光靜坐

一涉山水趣。所得常有餘。況茲禪境寂。更值三春初。嵐光照几榻。花氣盈庭除。忽聆清磬音。頓覺塵跡疎。

先聖言淵淵。瞿曇說如如。門庭別疑似。當別靜與虛。欲識道味腴。莫厭山中居。從釋教引入吾儒。儒教主靜。釋教主虛。靜能生動。虛不能生實也。靜與虛判然。即公與私判然。

詠史

六籍委秦燄。聖學棄榛蕪。董子乃崛起。遺經究始終。不沿縱橫流。不將枝葉窮。精心契先聖。高文發羣蒙。譬如剝復間。微陽生窮冬。譬如百世系。一線傳其宗。孟氏醇乎醇。繼之則有公。何為昌黎書。乃稱軻與雄。昌黎亦指揚氏之疵。而輒稱之者。溺於辭章之學也。此能明道脈之正。

偶作

文章從何生。其道本自然。中天列象緯。川岳蒸雲煙。風來水生波。春至花自鮮。人心何所有。出之則繇繇。悟此無文意。至文乃生焉。嗤嗤夸毗子。綺麗徒爭妍。

老境

天運日推遷。人生有大分。隆冬百蟲蟄。分耳非為困。老年精力衰。聰明安所聘。冥心了無忤。無忤乃無悶。

李

絨字巨來。江西臨川人。康熙己丑進士。官至戶部尚書。著有穆堂初集。○穆堂來吳。問字於匠門。而學問各有所得。匠門主溫雅。穆堂主闊大也。詩品不加修飾。亦復自見風標。

夏至日滎澤渡黃河

日車方北至。我馬獨南行。廣武風猶壯。黃河浪不平。澄清誰攬轡。憑弔漫霑纓。前路雄關近。平靖關當年駐。

重兵。

秋山學圃爲張韋齋明府題

莊烏經春祇越吟。菜根滋味憶山林。夕陽千樹烏聲寂。涼月一庭花影深。宰堦波原難作宅。磨兜堅已自題箴。惟餘結習殘書在。窺見羲皇以上心。韋齋。匠門弟也。識穆堂於未遇時。去官後。暫留江右佛寺。穆堂作詩贈之。

驛南舖不寐

草舍摧頽早戒更。旅人靜夜倍淒清。沉沉戍鼓樓頭動。宛宛參旗天半橫。短燄一空雞絕唱。敗槽百鬻馬多聲。十年夢想公車路。支枕連宵白髮生。荒驛情事。身親其境者能言之。

方式濟

字沃園。江南桐城人。康熙己丑進士。官中書舍人。○中翰隨考。堯宗水部居塞上。服勤左右。以慰晨昏。著五經一得。書未成而卒。詩格清真。樂府尤矯然拔俗。漳浦蔡文勳謂其秀骨獨異。清音自遠。誠定評也。後以子問亭宮保貴。贈如其官。

遠行曲

結束語童僕。雞鳴看天曙。辭我鄉里親。曳屣出門去。出門口無言。寸心煎百慮。請取囊中琴。暫坐理絃柱。一彈示知音。音新知者故。人情戀鄉井。冰霜況歲暮。此身值賤貧。焉能樂完聚。嶺高猿狖墜。水急蛟龍怒。行行將何之。白日沙飛路。此卽省親出門別。鄰里親交而作。

鐵五送至蒲河賦別

勞骨不遑席。脂車迫東馳。晴日照大野。去去從此辭。相送蒲河陰。感激潛酸嘶。戀景重須臾。念當生別離。我有數行淚。欲墮還自持。死化桑下蠶。吐君衣上絲。生同比翼鳥。夜夜長相思。生死如浮雲。素交山不移。

八月十七日霜

土牀入夜氣。骨冷火不溫。起視手種花。委仆墻籬根。早霜纔一夕。不緩須臾恩。窮邊無林柯。後凋誰與言。柔條受戕伐。悼惜同蘭蓀。回憶故鄉暖。萬里傷征魂。窮邊十字見投蠶荒遠雖抱後凋之節人誰知者可以悲其志矣。

護菊

盆菊瘦亦花。尺莖綴錢小。荒地苦栽培。強說顏色好。種從鄰圃移。南階旣昏曉。八月藏戶牖。扶護費探討。而胡傲霜姿。翻畏寒霜早。人實累此花。使汝隨邊草。人實累花怨而不怒。

掃地

抱帚倚戶立。寒風吹衣巾。凌晨汲土井。灑掃庭陔塵。掃塵不掃雪。留取寒意真。棄帚出門望。邊塵浩無垠。俯視穢草積。仰見黃雲昏。放廢敢晏安。勞力清心神。強鍊未死骨。涸水潛窮鱗。家破散如雨。一僕隨征輪。偶効胼胝力。頰顏詡辛勤。萬里親童奴。傲惰誰能噴。

采萱

曉起望術阡。萱花盈古道。采萱欲忘憂。佩之轉紛擾。豈有壯士懷。聽命寸莖草。勿謂百年短。計日不爲少。

憂更多於日。忽忽憂中老。蕙茝化爲茅。勿歎秋風早。人能自立。雖處憂患。不傷品節。倘荃蕙化茅。即日受和風。亦何益之有哉。

蜀錦曲

蜀錦機長越羅短。繡出鴛鴦春水暖。姊妹綺年俱遣嫁。空閨寂處蘭膏卸。女貞擇對師孟光。依然操作紉蘭纒。藏有天孫五色線。鮮明巧奪雲錦章。願縫堯衣與舜裳。借貞女縫紉。傳出山甫補。衰意忠愛之思。藹然言下。

隴頭水

河水濁。江水清。妾似隴頭水。清濁自分明。昔爲田家女。擇婿嫁邊吏。田夫入城不隔宿。邊吏年年在邊地。聞道梁州新破虜。燉煌已入中朝土。戍卒受賞官封侯。血裏冰霜凝繡斧。主將笑擁雙嬋娟。箏瑟夜醉穹廬眠。橫塘水接隴頭去。送妾雙淚流君前。田夫入城不隔宿。俚俗語轉與古樂府近。

題遂安鄒廣文效忠圖

遂安城大如斗。賊兵來。縣官走。儒官罵賊賊縛肘。乘機遁出豺狼口。集衆擊賊挺在手。妖星一掃寧雞狗。賊伏莽。去還來。城門火。棲烏哀。登陴矢石驅風雷。狂氛惡霧層層開。釋重圍。士民喜。歸我絳紗帷。理我舊書史。孤忠未顯微官死。當年佐陣兒折齒。兒今抱圖獻天子。音節詳明。忘其爲酬應之作。

送朱鹿田之任蜀中

天入萬峯攢。羊腸路屈盤。黃巾追往事。朱邑幸之官。復業民無幾。催科政待寬。從今行蜀道。歌唱不知難。

呂謙恆字天益河南新安人康熙己丑進士官至光祿卿○光祿詩烹鍊兄元素司農詩古雅新安二呂並重於時

望嶽

馬首三峯近林端萬壑封青天迴落鴈赤日抱蒼龍玉女時吹笛仙人此種松罡風何處斷忽聽九霄鐘
起二十字雄渾蒼堅華嶽已落我手通體只是望不是登此作家本事

西鄉對月

纖月照闌干愁心夜獨看光流千嶂動影入萬松寒銀漢何清淺金波自淼漫臨風旋起舞烏鵲過林端

寧鄉道中

奔峭時相引盤回勢屢遷雪峯藏白日雲谷束青天路轉啼猿裏人行飛鳥邊懸車頻度險回首失三泉
自注三泉地名○藏字束字極鍾鍊之功

望吳嶽呈王使君擬山

吳嶽高寒蔽蜀門巡檐跂望肅心魂地形近接關山脈禮秩遙同太華尊衆壑雲雷生白晝中峯星宿落黃昏凌風欲躡王喬鳥玉粒丹砂信可捫五六語總經捶鍊而出故能字字奇警

送澤州相國予告歸里

元老承恩帝里回奏書三上曰俞哉丹心寧恕蒼生望白髮方看綠野開綸閣有章光日月巖城無地起

樓臺。他時天語還存問。沁水遙瞻佳氣來。五語表其奏疏光明。賢於孔光削草之媚。六語表其持躬潔白。同於寇萊公行之清。有官居鼎鼐。無地起樓臺。魏桀呈萊公也。

登岱

煙嵐雪瀑見鴻濛。閭闔平分一氣中。身倚青蒼巖壑迥。目窮雲水海天空。雞鳴半夜騰潮日。鐘落層霄響澗風。七十二君勞想像。盤回輦路望龍從。

方

覲字近雯。江南江都人。康熙己丑進士。官陝西布政使。

定興縣謁楊忠愍祠

倔強楊員外。鄉閭尚有光。何須冠獬豸。直欲問豺狼。伏鑕差無補。當車肯自曠。荒祠臨野水。肅拜奠椒漿。忠愍本無言責。而欲爲國除奸。置死生於度外也。三四擲地有聲。

七夕

佳時臥病更添愁。枕簟涼生覺早秋。薰篋儘教塵網遍。三年不上曝衣樓。佳節悼亡。倍難爲懷。予作七夕。果然天上勝人間。同此感也。

子規啼

平羌江口江水清。峨眉山頭山月明。江樓望月人未寢。腸斷子規啼一聲。

吳

字振西。江南太倉人。康熙己丑進士。著有樂園集。○振西係梅村族孫。為諸生時。學使者試必第一。試牘傳播。幾於紙貴。未嘗以詩鳴也。今搜覽遺集。不必刻求勝人。而古今體安和妥適。才人學人。兩者兼之。梅村之流風遠矣。

西山探梅

虎山橋頭太湖曲。花為銀海山為玉。湖鄉歲判梅花租。花開便抵湖田熟。我來繫艇南溪邊。晴空無雨山無烟。只有白雲三十里。模糊隔斷山中天。筍輿側入似無路。矮籬窄逕相迴旋。黏衣不嫌花霧重。壓帽更愛花枝偏。前迎後送迷遠近。豁眼條上山之巔。熨斗巖邊路幽仄。長旂嶺外連西磧。十家五家無別程。千樹萬樹同一色。微分螺黛障橫青。遙奪琉璃波湧白。出林更上蓮花臺。枝枝呈葉當門開。一擲凡軀衆香國。十年面目慙塵埃。使君仙尉如可喚。芳魂古魄何悠哉。梅花不老青山在。姓名清絕留蒼崖。吳儂愛花乏花趣。但貪狂賞慳清句。寒花謝客似有言。好勸幽人為少駐。舉西山全勝言之。諱其詩可當臥遊矣。使君晉青州刺史郁泰玄。葬於此山。仙尉但傳鄧姓。不詳其名。

洞庭山館呈司寇東海公二首

廿載鴻文典集賢。還鄉仍續石渠編。暫伸謝傅登山志。校勝溫公在雒年。嶽瀆遺經搜禹穴。金鑾舊記錄吳船。須知玉局閒居士。元是蓬瀛第一仙。健庵司寇去官後。奉詔開書局於洞庭東山。準司馬相公修資治通鑑之例。蓋異數也。書係一統志。故有嶽瀆遺經。金鑾舊記云云。

錦堂恩詔許歸休。妙選賓僚佐校讎。江左文章分史局。山中宰相起經樓。詩豪酒敵皆登座。野老溪僧亦伴遊。笑引韓門窮賈島。放吟同上碧峯頭。

謁范文正公祠

慶歷推英傑。龍圖景大賢。少思天下任。老至四夷傳。薰德吳風外。徵文雒學前。人師真百世。社祀近千年。緬昔孤如綆。登朝直似絃。垂簾誠宮闈。專柄斥樞銓。奮舌天心正。嚼膚黨議偏。賜環仍待制。筭鑰又從邊。地闢橫山壘。師承好水川。靈胸羅甲盾。蕃落靖戈鋌。卒踐三台重。終持十事堅。志伸恢舊典。遇短謝時權。育士開饗序。收宗設義阡。一莊風自古。五世澤猶延。祠額咸淳創。碑銘至正鐫。蒸嘗歆格遠。榱桷暨塗鮮。舍菜羞蘋藻。繙經謁几筵。衣冠標正大。鐘鼓震愚顛。長白書堂錄。天章館閣編。萬言何慷慨。六籍本搜研。要識爲梁棟。須從忍粥饘。名高遷謫裏。憂極治平先。忠孝還詒子。精誠儼在天。蘇湖開禮樂。自注。公延胡學。夔高咏詩篇。歷聖德詩。舊宅寒松偃。亭園老杏妍。披圖一回首。古色照蒼然。不遺本傳。而於被謗。夏竦到斷。蓋割粥。先天下憂。見士當勵志。窮居不求溫飽也。篇法句法。皆苦心營構而成。

卷二十三

張景崧

字岳維。江南吳縣人。康熙己丑進士。官樂亭知縣。著有鍛亭詩稿。○鍛亭學詩於葉橫山。先生稱入室弟子。論詩以鮮新明麗爲主。謂與其爲假王孟。不如爲淺溫李。以王孟可僞爲。溫

李不易僞爲也。嘗以詩呈王新城尙書。新城比之韓門張籍。人服其允。

弄潮兒歌

錢塘江上弄潮兒。放船拉槳乘流澌。短衣單衫不蓋膝。科頭跣足暄朝曦。自言大父官藍田。堆金不計萬與千。阿侯年少邯鄲俠。貂衣駿馬珊瑚鞭。兒年七八掌上珠。逢人稱是千里駒。雙鬢左右列屏障。不教風著千金軀。大僚特疏上天子。剋剝脂膏飾羅綺。坐辭華屋入囹圄。一家夜哭長安市。當時珠履客三千。至今漂泊誰堪倚。洪濤江上高於天。性命換得青銅錢。豪華如電不可恃。東升紅日西山巔。豪華子弟讀之。恐面熱內慚汗出。而食不下咽也。或恐子弟不能讀。奈何。○子孫性命換錢。由祖父剋剝脂膏所致。居官者盍一思之。

京口

身外茫無際。橫江老雁秋。芙蓉皆別思。風雨獨歸舟。斷岸隨烟合。奇巒破浪浮。自從南北限。萬古逐東流。

和途中卽事韻限高字

愁起疲驢背。吟聲入楚騷。江湖縈別夢。風雨戀征袍。驛草秋先歇。邊雲晚更高。時平多設險。旅夜看龍韜。

邊雲五字高渾。

餞鴈

數聲哀怨客樓聞。九月相逢二月分。繪繳伺多難避地。關山歷盡悵孤羣。離腸曲曲湘潭水。行色重重楚

峽雲此去豈無留別字一行空際自成文

晚渡平望湖同舟話舊

稻梁謀已拙耕耘越水吳山逐雁羣細雨殘鐘荒驛夢斜陽衰草故人墳空江鴉散遙衝霧絕巘樵歸盡
躡雲吟得小詩留蠹篋也當麟閣記殊勛晚唐神韻○鍛亭嘗戲咏甘蔗丞相有句云是長樂老焉知苦非讀書人終欠酸可云工巧因題纖小故不錄全詩

蔣仁錫字靜山順天大興人康熙己丑進士

唐諫議劉蕡

隻手思扶皇運傾春秋三傳論縱橫生前不售鋤姦志地下何慙諫議名惡稔北司威正煽冤銜南國恨

難平自注實為宜者所惡貶柳州司戶參軍卒於貶所玉溪為寫招魂句溢浦書來愴客情實身後對策之言皆驗因贈諫議大夫故有地下何慙之句所謂他日請

念者此也

王時憲字若干江南太倉人康熙己丑進士官翰林院庶吉士著有性影集

舟中遣興

四十日來誰地主二千里外客天涯青山兩岸尋詩路黃葉孤村賣酒家鼓枻有聲過蟹舍使帆無際失
鷗沙前途遙指蒼茫處黃鵠磯邊正晚霞

旅舍感懷

侯門縱可曳長裾。嬾癖偏安水竹居。臺畔空傳收駿骨。肆間敢望活枯魚。鬢將如鶴頻看鏡。松欲成龍尙著書。百尺樓頭且高臥。陳登豪氣未全除。太史爲顯菴相國從父行成名時年已老矣玩五六語見其老而勤學

黎志遠字寧先福建長汀人康熙己丑進士官至京兆尹

禮執客鄂城用和巨來韻見貽事牽未報漢陽舟次韻寄答

離羣劇調饑。晤言暫濡沫。方快鄂城遊。條有瀟湘別。論文期摘瑕。求友惟攻闕。古風不可回。時頗笑迂闊。長江撼坤浮。艸窗敞天豁。晚月升虛無。夕霞爛披列。低昂漁子舟。參差渡人筏。顧我自夷猶。嘯歌爲誰發。征夫出王城。九玩團團月。人事俄是非。宦途遽得失。夙懷經世心。詎可違前轍。飛鴻向長沙。沙渚何當歇。吾愛武昌山。遲君理布襪。載收玉與珉。慧珠照澄澈。運旋轉於無痕之中善學選體

泊陳家灣觀山石奇秀遲客舟同登不至日暝獨遊未窮其勝

殷殷紅樹村。漫漫白沙堰。深叢切秋禽。修竹翳長阪。奇境在幽遐。神工啓關鍵。泛澨鯨波搖。跳躍龍遊宛。玲瓏變繩墨。疊皺若違反。蘭舟不卽來。臨淵奚繾綣。薄暮遲客心。篷窗聊息偃。侵宵杖策行。焉得窮其闕。雲寒月色深。漁靜江光遠。嗟予事行役。徒爾登眺晚。玲瓏就一處言合衆玲瓏言之則變繩墨矣粗心遊山者不知其妙

王世琛字寶傳江南長洲人康熙壬辰賜進士第一人官至侍讀學士

登樓

萬里辭吳會。經年滯越舟。兩行鄉國淚。獨上海山樓。鷓鴣威難近。蠻雲瘴不收。炎荒非我土。何事愛南遊。

英州道中寄大兄

江岸草萋萋。愁懸落日低。天涯兩兄弟。客路各東西。眠食知何似。音書莫嬾題。遙憐端水上。惟聽子規啼。

靈山峽

瘴鎖雙峯合。江穿一線通。崩崖飛鷓母。落日嘯猿公。林暗蒼梧雨。波翻厓海風。朝朝啼杜宇。蕭瑟似巴東。

連上二首。穩順清朗。似極玄又玄風格。

題畫三照

邊草初枯獵馬肥。甲光照日散金微。健兒羌笛三聲晚。射虎歸來雪滿衣。

沈樹本

字厚餘。浙江歸安人。康熙壬辰賜進士第二人。官翰林院編修。著有輪翁詩集。從來學蘇詩者。祇得其隨手徵引。波瀾不窮。其弊往往流於縱肆。此獨於用意正大處求之。卽質之元遺山。必無滄海橫流之目。

五顯嶺

高峯入閩奇。飛路盤空幻。硤角隱堂皇。壁面壓溪澗。洩雲生嵌竇。飄雨來轉盼。馱馱滑難行。攀緣苦木慣。進虞一步艱。墜有千丈患。戰兢腰脚疲。牽挽衣裳綻。前望怖啼猿。俯視羨歸鴈。險疑過秦關。危或踰蜀棧。積陰何時開。疊嶂誰能鏟。人無戀舟車。我將老葭蕀。

浴象行

瑤光之精照九真。奇獸天生好軀幹。貢入虞廷受封號。朝儀熟習無拘慙。神威礮礮過熊羆。異狀嶽崑陔。隨時澣濯順陽氣。勾引傾城闕奇翫。故人僦屋宣武門。邀我來觀玉河畔。一笑登樓快倚欄。樓下千人萬人看。傳呼都尉出西城。指點蠻奴踞南岸。羯鼓喧闐羣象來。錦鞍結隊紅雲爛。鼓聲初歇人語寂。並立沙汀卸羈絆。一人裸體騎一象。徐徐踏浪排魚貫。細刷四蹄及兩牙。洗淨塵汗一身遍。水面浮來自在行。淺瀾盤渦纔沒骭。翻身一躍入波底。疑墮蛟宮杳難喚。隔浦俄驚浪拍天。波心突出銀濤亂。蠻奴依舊跨肩頭。觀者魂搖共嗟歎。也似吳兒石作腸。潮頭出入全無憚。往來盤舞復幾回。揚沫飛涎繞雲漢。連蜷修鼻吼長風。老魚瘦蛟皆遠竄。浴罷依然上錦塘。赤鬪重裝日將旰。成羣歸鎖御房深。明日宮門須待旦。油壁花驄影漸稀。風吹十里香塵散。濛濛樓角翠浪流。西山掃黛橫天半。狀象奴入水出水。如見其人。結水濺及櫻角也。

磨盤山

回顧不見入山處。此身已似盤中住。百千旋折眼生花。三五迴環神失據。纔思左往復右行。正欲仰登先俯注。坡平幸獲尋丈寬。徑仄只留分寸度。鞭絲帽影蟻緣窗。馬足車輪虵繞樹。乍陰乍陽日向背。在前在後風來去。山遠不踰三十里。山高不越萬餘步。從卯到酉歷未窮。自壯至老陟猶誤。燕齊大賈有深愁。并

代健兒俱卻顧。人間不省行路難。請過磨盤山上路。起六語寫盡山行風折已盡磨盤之義以下驚澗注坡直如行所無事

遊汴城宋宮故址

帝闕崔巍逼敵營。乘輿倉卒赴青城。力窮巷戰悲何處。計決親行誤范瓊。此後難逢迴日馭。有人空喚渡河聲。杜家留守真雞狗。草草南歸失四京。徽欽北狩始誤於不用李綱。繼誤於不用宗澤。至用杜充爲留守而國事萬不可支矣。此種詩可作史讀。

贈王載揚

唱遍楊枝又橘枝。洞庭林屋有新詞。誰知楓落吳江冷。未是崔郎壓卷詩。載揚少工詩。人無知者。論翁見而賞之。徧告詩壇。名遂著。載揚吳江人。故以楓落吳江冷爲比。

李白填詞

花前承旨筆如飛。三闕新詞萬古稀。被酒不忘規諷意。故將燕瘦比環肥。從前作者。但羨其才思之敏。知遇之榮。此能道其規諷微意。所見者大。

徐葆光字亮直。江南吳縣人。康熙壬辰。賜進士第三人。官翰林院編修。○彙見太史懷舊詩七章。胎源於少陵八哀。今已散佚矣。茲從奉使琉球冊中錄出。得其大概。

康熙戊戌六月朔奉命册封琉球述懷三首

我生寡行役。敦敦守書案。少長太湖旁。臨涯渺無岸。竭來京國遊。涉江已三歎。濁流益奔駛。疑向銀河亂。今將事澣東。寵命賁冗散。皇靈賜九域。當險敢云憚。銜綸出區夏。郵籤浩難算。八千閩越路。未及溟程半。

涉川守忠信。古人寧我謾。茲遊縱目初。奇絕平生冠。

去家逾一紀。有母嗟尸饔。微名雖獲忝。祿薄仍固窮。侍養曰有季。顧我如飄蓬。玄髮恐日霜。倚門望屢空。

七十古云稀。茲秋欣已逢。膝下闕親拜。頌況徒爲恭。聞命蹶焉起。問驛江之東。我家官河壩。水郵當此從。

省覲始一遂。長跼獻泥封。自注癸巳覃恩。誥封始賚回。王程幸非迫。且復樂融融。

家貧如屋敗。椽桷強撐拄。大者既就撓。薄弱成何補。瘦妻豈云健。乃委持門戶。二女皆獲歸。緝緝良辛苦。

相見且歡喜。譎怨茹不吐。佳兒得嘉耦。此日來歸祖。新婦前致辭。階前綵雙舞。不覺愛憐生。拭淚成媁語。

水清石疊疊。此事自前古。到家不成歸。離緒還縷縷。首章奉命。次章拜母。三章辭家。章法井然。詞亦朴茂。

自口外回至密雲道中車折軸遇雨

出山復入山。顛頓不知幾。瘦馬怯孱顏。兩轂鬪石齒。脫險就夷曠。泥行鈍亦喜。中軸忽摧折。輪轉不踰咫。

勞薪不能言。事敗悔方始。解輓就牛車。落日照行李。駛雨截山來。壞雲翻墨起。橋阻斷虹邊。路辨掣電裏。

風吹祇裊單。沾濕行未已。將經滄海身。平地已如此。

楓嶺山行至黎嶺

風泉聒旅枕。壁鏡照客起。雲木滉初陽。蒙茸猶谷底。笳鳴驚宿禽。旌影照溪水。虹橋接楓嶺。閩程從此起。

仰見黎山巔。霧行猶十里。陰崖竹梢空。寒碧光薤薤。山僧延客坐。孤亭翠微裏。亭邊方竹枝。乍見心尤喜。

稜稜節目勻。端正比君子。我行既在險。所恃非圓美。從僧乞杖材。中矩皆如砥。行行步亦步。扶我歷濛汜。
人生涉險。惟中正自守。可以免禍。古來聰敏人。每以圓美得咎。不止捷徑。窘步已也。從方竹枝。悟及持身有素。言下遇之。

上灘行

祇命走閩服。崎嶇敢易安。紙船託微命。上灘復下灘。上灘逆水怒。求進尺寸難。片石扼我嶮。力費千篙攢。
下灘得水利。雙楫如輕翰。穿針與走馬。自注。皆灘師語。一瀉百里寬。順流雖云樂。觸激無堅完。灘師頭易白。鬪捷摧心肝。上水既失利。小心事驚湍。救墮愁脫手。引汲心膽寒。釜懸船挂壁。溜急魚升竿。步步自牽挽。力盡終躋攀。于此互乘除。得失如循環。上灘與下灘。請君擇其間。處順恣肆。處逆周防。恣肆者敗。周防者安。行路禪身。其義一也。

顧嗣立字俠君。江南長洲人。康熙壬辰進士。官翰林院庶吉士。著有秀野詩集。○秀野選元人詩集。不諳其家。至家道中落。猶以不能酬贈。爲媿。與前明葛震甫之愛客。正復相類。

讀元史

中原皇綱失。宗社如山崩。讀書遭兵燹。滅沒無一存。偉哉姚公茂。絕學能相承。軍中來江漢。竇許號得朋。讀書鳴琴下。聖賢接寢興。寶劍挾浮雲。手扶日月升。經學唱西北。文物得未曾。茫茫六合內。獨讓斯人能。
姚公茂。名樞。竇許。竇默。許衡也。

周室憫黍離。蜀臣悲杜宇。吁嗟彼王孫。甘心事仇虜。死媿文丞相。生慙謝臯羽。書畫雖絕倫。大節吾不取。

賢哉彝齋翁。高風邈千古。遇弟輒生噴。到門必見侮。吾愛水仙圖。寶為翰墨祖。彝齋名孟堅字子固以梅竹水仙擅名。

文章開魯姚。元氣尙團結。天歷置奎章。作者首虞揭。金華接踵興。儒林推四傑。為學務根柢。行文淨冰雪。

古藻揚清光。煌煌照碑碣。一代制作手。小儒盡咋舌。同時惟歐陽。瓣香乃祖烈。後來宋太史。猶承黃柳訣。

斯文如江河。源遠流不竭。猗歟百年間。生才竟殊絕。傳道脈屬清節人道所重表章前哲別於風雲月露之詞。

自錢唐江口至常山舟中雜詩

積雨濕江雲。林深白一片。春風急吹開。青峯遞隱見。晴旭散旅愁。鼓枻聊自遣。昨宿西安城。今到常山縣。

故人松桂林。葱蘢眼中見。自注張常山天農有讀書松桂林圖西北有浮雲別來幾番變阮籍醉不醒司馬遊已倦弭節暫

淹留孤蹤媿深眷。畫筆所不能到者以韻語補之此化工也起四語予嘗於舟行曉望時一遇目。

望郎回自注在大安驛有石形如婦人攜一稗子立山上名望郎回。

望郎回。望郎回。朝朝望郎郎不回。孤兒三尺形單影隻。冬愁風酸。夏愁日赤。南山雲連北山雨。一樣人間

兩樣土。望郎回。幾時來。東海會有西歸水。妾作石人甘爛死。為男子作詩風其忠愛為婦人作詩風其貞烈此立誓體也杜陵得三百篇之遺作者猶

得此意。

日觀峯

羣山向背東南缺。一聲雞鳴海波裂。黃雲下墜黑雲浮。金輪三丈鮮如血。當時李白平明來。風掃六合無

織埃精神飛揚出天地。口吟奇句招蓬萊。我今黯黹失昏曉。雙石凌虛自悄悄。安得快劍開烟雲。直指扶桑窮杳緲。嘗於五更登天台華頂見浮雲卷盡海面俱紅須臾金輪上升天地忽開萬象呈露前之赤海盡浮金光矣讀黃雲十四字服其簡而能該。

萬安

城仄羣峯壓。江紆亂石通。灘聲從地北。瘴氣自天東。采竹童乘筏。撈魚家置籠。灘師喜風利。撥棹入黃公。自注土人識水性者呼爲灘師黃公灘卽惶恐灘。

賈傅故宅

治安策上衆狺狺。謫向長沙卑濕濱。生遇漢文猶痛哭。放同屈子竟亡身。洪鑪久已爲銅炭。宣室何勞問鬼神。絳灌不知才子貴。漫輕年少洛陽人。

宿遷西楚霸王故里

拔山扛鼎力難支。有勇無謀敗固宜。王霸業成破釜日。英雄淚盡別驩時。重瞳每小江東土。殘魄猶依魯國祠。只有野花紛五色。春風省識帳中姬。項王霸業成於救趙敗於弑主至該下而氣已盡矣三四語已舉其概。

黃陵廟

翠帷玉佩問湘娥。夕張佳期憶九歌。寂寞荒祠叢竹淚。西風吹作洞庭波。

杜

詔字紫綸江南無錫人康熙壬辰進士官翰林院庶吉士著有雲川閣集○雲川以詩受知於聖祖會試不第賜進士入辭館士林榮之而雲川以養親歸不復出矣晚與道士榮連僧天

鈞結九龍三逸社。有廬山東林之風焉。中歲嘗選唐時叩
彈集行世。皆中晚名作。故平生得力亦在大歷以後云。

隋隄曲

隋隄一帶官河口。不種桑麻種楊柳。錦帆帝子數巡遊。
厭住東京樂奔走。將兵西域再征遼。呼韓稽顙諸蕃朝。
江都宮監伺顏色。翡翠玻璃恣雕飾。水晶殿揭珠簾開。
香風吹送飛仙來。凭肩笑語能幾回。夢遊恍惚吳公臺。
吳公臺下雷塘路。野土茫茫亂煙樹。傷心爲弔玉鈞斜。
柳色黃昏不知處。柔肌令儀。按節起舞。

周處讀書臺

臺廢尙遺址。荒荒宿草中。在朝能獨立。致命見孤忠。
始信讀書效。因高力戰功。斬蛟與射虎。未足號英雄。
見力戰致命緣讀書有得而斬蛟射虎未足言也。一氣鼓鑄結倍有力。

黃金臺

伯業銷沉等劫灰。黃金照耀獨名臺。兵連五國收燕地。
力借羣豪始郭隗。豈獨一時能雪恥。直令千載感
憐才。於今濩落風塵客。猶是紛紛向北來。隗韻平。仄俱收。

戲馬臺

戲馬元來楚故鄉。鴻溝還記各分疆。儘教率土歸劉氏。
剩有斯臺與項王。一戰快心惟鉅鹿。三分失策在
咸陽。如何蓋世英雄氣。獨爲虞兮泣數行。王漢王巴蜀漢中使得還定三秦此項王最失策也。特爲拈出。具見論古之識。

雨泊吳閶送春同顧梁汾先生作

吳宮花老淚臙脂。點點殘紅墮晚枝。自是東風無著處。本來西子有歸時。錦帆冷落青簾舫。玉管闌珊白苧詞。雙槳綠波留不住。半塘烟雨柳如絲。以西子泛湖比春光。徂謝又恰關合。金閶送春。天然波折。

次泰和韻送同年于元士入都因簡劉喻旃楊若遊諸同館

春明分手兩經春。吳舫忻同夜語親。欹枕卻憐聽雨細。入山還喜試泉新。飽嘗世味初歸客。寒到征衣又送人。爲語玉皇香案吏。秋風且莫憶鱸蓴。不無玉堂天上之感。

花朝讌集

舊遊零落復新知。不放傷春到牧之。一笑豈云無覓處。百花多在未開時。金鈴小繫香仍淺。羯鼓高催信較遲。共是軟紅塵裏客。薄寒消得酒盈卮。

羅浮蝶

海南飛夢渺無涯。小洞朱明自有家。仙種固應呼鳳子。香魂只合伴梅花。別來風雨迷烟嶂。撲向樊籠泣露華。回首此生空羽化。滿身狼籍葛洪砂。第四語天然名雋。雕琢轉或失之。

王圖炳字麟照。江南華亭人。康熙壬辰進士。官至詹事府詹事。著有授香書屋詩。

詠史

洙泗無煖席。齊梁無停軌。吾道大可爲。斯人詎可避。閉戶與纓冠。出處須易地。貞元有韓公。讀書尙其志。唐士太披猖。淫靡沿六季。獨自抱遺經。卓哉不朽事。觚排二氏言。周情兼孔思。鳳躍鈞韶鳴。氣象庶幾似。當其未遇時。皇皇出載贄。佛骨尙欲燒。鱷魚尙欲制。豈其百鍊剛。繞指頓柔脆。三上宰相書。誰識難難意。汝曹不自量。嗤點何容易。撼樹在蚍蜉。當轍笑螳臂。韓公三上書。共謂宜少安毋躁。此獨表其皇皇濟時之心。與席不暇煖同意。知人論世。不當如是耶。

鸚鵡

文采擅江東。隴山短夢通。有時尋稻粒。無計脫條籠。侵曉梳翎慣。當窗學語工。聰明真誤汝。天際看冥鴻。

遊仙

青雀西飛繞集靈。麻姑仙訣悟熊經。玉杯日暖黃雲動。金掌風微白露零。望氣方壺猶寂寞。祈年太乙尙丁寧。君王欲乞長生術。不道郎官是歲星。

平原郝

年少驚人入洛名。雲津龍躍是平生。八王兵甲無臣主。兩晉文章有弟兄。晚節不堪愁鶴唳。舊交聞已賦蓴羹。春蒲細柳平原路。長使行人淚滿纓。累世將家子。而甘受讎邦恩遇。又處濁亂之朝。而不思潛身遠害。宜其及於難也。以季鷹之歸。作對面襯託。其義尤妙。

白燕菴

鰕菜飄零范蠡船。幅巾短杖自翛然。柴桑歸及元興日。同谷歌成天寶年。流水桃花何處問。春風燕子至

今憐隔村隱隱精藍結。知是當時已解禪。海叟以遺民終不羈于禪詩中獨

渡江

雲自孤飛月自明。蒲帆十幅翦江行。君聽濁浪金焦外。淘盡英雄是此聲。無限悲壯

程夢星

字伍喬。江南江都人。康熙壬辰進士。官翰林院庶吉士。○太史好友朋。喜著述。注李義山詩。成平山堂志。名流過維揚者。每定縞紵交。原字伍喬。取南唐書伍喬居廬山。僧夢大星旁一

星曰伍喬星也。後易曰午橋。

讀史

公孫舉賢良。先棄後乃收。歸然置第一。晚封平津侯。陸贄舉韓愈。亦以再舉售。叶其論不貳過。卽以前文投一君與一相。取舍豈自由。得失故有命。際會良悠悠。見遇合有命。亦有時。君相不能主也。從前無人道及。

老人峯歌

山煙作霧朝濛濛。模糊煙外疑遠峯。風開日出始破笑。一峯背俯兼頭童。何年南極下霄漢。無事僵立空山中。諸峯兒孫並臚列。形體雖具難相同。平生儕輩恐無幾。匡廬五老齊高風。世人少壯幾時好。等閒條作雞皮翁。何如此峯既老常不老。前古後今無始終。浮丘容成每來往。俯視塵世擾擾同雞蟲。

雲棲

靈山結想十年前。一路穿雲許問禪。人綠須眉全是竹。晴喧風雨摠因泉。地高偏覺江聲近。峯遠猶將梵

唄傳吟盡夕陽歸較晚。清池應愛遠公蓮。

舒大成

字子展直隸宛平人康熙壬辰進士官翰林院編修

自城子山還宿白家灘贈主人

到山日亭午。雞鳴桃花村。杳杳原隰廣。藹藹桑麻繁。展眺興方永。卽事情彌敦。盤餐古時俗。作息平生言。際夜轉清闕。明月來南軒。撫時寧不惜。勞生焉可論。當須遂夙願。與君采芳蓀。

山行

杳杳雲外鐘。原陸颯已晦。寧知沙際月。復與前峯對。墟落有歸人。烟蘿聞犬吠。

作者五言應得力于唐賢三昧風味近劉春虛不能

用多能用少也近人能用少者惟吾友喬億慕韓

東靈臯先生

伐木廢千載。勞者方載歌。卽須良有繫。觀善匪在他。大道無隱晦。斯文流江河。先民重邁征。所戒惟蹉跎。春風迴歲律。芳色滋庭柯。喟然慚所欽。去日何其多。古淡

當時

玉筍嚴催金叵羅。當時歡會總如何。燕辭華館無迴信。葉落橫塘有去波。曉日軒窗閒夢少。晚涼庭院別懷多。露桃花下三年客。腸斷秋來一曲歌。

林

佶字吉人福建閩縣人康熙壬辰進士官中書舍人著有樸學齋詩

甘泉宮瓦歌自注文曰長生去矣

甘泉漢宮遺古瓦。何年棄擲荒隴下。泥沙埋沒風雨剝。誰人物色求諸野。阿兄遊宦西入秦。嗜奇好古搜沉淪。西京文字傳絕少。何意長生四字完形神。周圍一尺有二寸。水清翡翠光鮮新。非篆非隸含古意。不瑣不琢歸元淳。歐陽集古見未到。劉攽博雅誰探真。二千餘年復寶重。轉憶飛廉太乙俱成塵。當塗銅雀非儕偶。歷十四朝真可久。寶器逾晦逾光明。吉人另有記寶器逾晦逾光明。才人沉淪久而光顯者何獨不然。

遊武夷登一覽亭

吾聞武夷山。乃是昇真元化之洞天。中間溪流有九曲。三十六峯峭折相排聯。我家去山七百里。適然神往已十年。雖未扶藜臨澗谷。早有清夢來騰鸞。今冬適經雙溪口。舟子西指思迴船。興高踴躍決探勝。四日逕到仙宮前。凌晨登筏泝霜瀨。山容面面其沿緣。幔亭巍峨聳雲際。玉女秀出清而妍。虹橋千載駕陡削。接筍一線梯鈎連。嫣然花竹藏別塢。小九曲內宜安禪。隱屏精舍昔講學。官且與處羅羣賢。雍雍絃誦倡。擢曲會心微妙超。言詮盤遊六曲望不極。有亭天半憑空懸。虛無縹緲徑欲斷。猿鳥絕跡惟雲烟。捨舟輕身陟危磴。聽徹水樂鳴濺濺。仙船天路落不落。誰弄狡獪疑彭錢。險艱歷盡到奇絕。天遊古觀山之巔。

亭稱一覽小閩越。扶背遠睇無涯邊。此時不知此身在何處。便思脫遣人世同飛仙。丹山碧水如此勝。恨不早拍洪厓肩。會當買山傍雲壑。盡載羣籍來摩編。山靈愛山亦愛我。定應招我棄官賦。就歸來篇。可作武夷

有韻遊記讀不嫌其詳。

虞景星

字東臯。江南金壇人。康熙壬辰進士。兩任知縣。改授吳縣教諭。工詩畫。書學米襄陽。雅負鄭虔三絕之望。

班婕妤

翻因棄置久。轉念寵恩偏。燈暗增成夜。花飛長信年。秋風有時歇。團扇豈常捐。獨惜羅衣色。塵生不再鮮。

悻悻小丈夫。不能作是語。

湘中曲

風起黃陵廟下秋。斷猿聲裏繫孤舟。雲鬟霧鬢知何處。竹色娟娟月影流。

任蘭枝

字香谷。江南溧陽人。康熙癸巳賜進士第二人。官至禮部尚書。著有見南詩集。○字出使安南。宣諭國王。使于知天朝恩重。拜舞感泣。此生平大節。詩亦典重有體。

武侯祠

丞相祠堂沔陽滸。檜柏森森鐵榦古。行人指點定軍山。月黑天陰聞戰鼓。三分炎祚鼎終存。萬馬中原氣已吞。五丈原頭將星落。此間終古藏忠魂。泱泱寒流向東去。霜郊豁見平蕪路。南通劍閣北褒斜。想見當年運籌處。我來下馬拜荒邱。三代而還第一流。絲竹戰餘瞻尙死。一門忠烈壯千秋。憑弔武侯寫出風雲動色。忠魂如在。未并

傳出蘇竹之戰。一門死烈。此前人未說。到者。應與王新城定軍山下作並傳。

大相嶺

肩輿歷峻坂。力盡得躋攀。冰雪明孤嶺。風雲暗百蠻。地應雄劍閣。天已近陽關。舊說南征相。兵戈駐此間。

宿劍關

斜日下荒原。驅車宿劍門。寒山風落石。殘夜虎窺村。斷續京華夢。淒清獨客魂。古來設險地。興敗共誰論。
五言律多從杜出。咏蜀中詩尤宜近杜。

巴州

深院嚴扃盡日閑。一年花事已全刪。情同籠鳥難舒翼。行似枯僧正閉關。萬里煙波通峽水。連朝雲霧失塗山。故園遙在春江畔。邨得扁舟縱往還。

吳

襄字七雲。江南青陽人。康熙癸巳進士。官至禮部尙書。謚文簡。○文簡老年遇合。位至六卿。出處進退。如鳳皇芝草。賢愚共稱美瑞者。詩品亦高。不肯流入三唐以下。

柏鄉雨花菴口占

雨花亭子上。坐飲趙州茶。古寺木初落。疎林日已斜。黃花應笑客。白髮未還家。老衲若南去。鄉山問九華。
自注。僧楚澤云。將行腳南中。○黃花一聯。十字成句。此文簡出使楚中。過而留題也。名流過者。俱有和作。總未及其自然。予見而錄之。

送徐澂齋先輩奉使琉球

浩渺滄波隸九州。貢航不絕大琉球。自注國朝册封琉球今為第三次使者才名第一流。龍節高擎天北極。星槎直泛海東頭。書生報國宣威德。敢詫乘風萬里遊。時送行詩彙成卷軸劇多名作然頌揚得體無踰此章

題黃山蒲團石

小心坡上得心安。鵲落猿飛路不難。百步雲梯誰撒手。九年空坐石蒲團。

唐建中字赤子湖廣竟陵人康熙癸巳進士官翰林院編修

臨高臺

臨高望秋水。寒鏡出塵函。碧蘚淨孤渚。蒼雲陰半岳。風傳隔院笛。葉送下江帆。正有南來鴈。離情孰寄緘。

張梁字大木江南華亭人康熙癸巳進士著有澹吟樓詩○張氏門風鼎盛聲華赫奕而澹吟不樂仕進戶庭蕭寂如遊方外人喜鼓琴輿到時弄一二曲晚遷居青浦之珠溪無疾而逝人

謂同禪家之解脫者

彈琴

偶坐藤蘿下。揮手弄素琴。我琴不悅耳。能作澹泊音。本非求人知。我自寫我心。鍾期既已亡。成連誰能尋。豈徒桑與濮。六代趨荒淫。時世有升降。性情無古今。撫茲枯桐枝。欲辨口若瘖。罷琴人寂然。明月窺疎陰。
古人五言如人心盡如此天下自和平能使江月白又令江水深七言如空山秋滿霜烟平寫琴理琴韻非琴聲也作者此篇已得古人三昧

彈琴雜詩

孤桐獨爲奏。不假金石諧。微矣園客絲。能寫曠士懷。中散已云逝。千載罕見儕。奈何大雅音。委之優與俳。撫絃傳宵渺。希聲正復佳。豈難悅人耳。所恥在淫哇。聽者雖或疎。宮徵安可乖。束髮好鼓琴。自謂甚易工。初得一聲似。曠若意已通。學之既十年。茲理彌無窮。吾未忘吾手。焉令諸有空。乳泉滴幽洞。箏木含遠風。至音非可求。只在天然中。諸有皆空。只在天然。滯于手不能空也。末句點明。

梅花三弄

梅花隨東風。淡淡入我絃。凍雲殘雪春乍破。一枝兩枝籬落邊。喧啾野雀噪深竹。溪水無波照空綠。陽和暗覺指下來。遙峯潑翠嵐陰開。五色鳳子雙徘徊。小絃急。大絃緩。冷香拂袖東風軟。嫋嫋冰魂吹不斷。忽然孤鶴唳一聲。羅浮山遠春夢驚。霜天欲曉寒更清。平生茆屋心。松篁共蕭寂。山家閉戶悄無人。綠滿青苔落英積。瑤琴悄悄醉橫膝。一片孤月當窗白。梅花與琴。渾融無迹。

謝遵王

字前幾。江南江都人。康熙癸巳副榜。

吳中感興

兩月金閨住。聽殘白紵歌。山惟洞庭好。春是虎邱多。良覲故人遠。鄉心寒食過。舵樓閒倚望。渺渺奈愁何。
三四已括吳中之勝。春是虎邱多。眼前語道來轉覺其新。

枕上

簾幙微風入。輕寒枕簟侵。夢多通夜惡。病覺隔年深。簌簌燈花墜。寥寥戍鼓沉。寒蛩偏戀我。牀下和哀吟。

前幾沒於早歲。此即病中作也。讀去哀音動人。

顧陳埽字玉停。江南太倉人。康熙甲午舉人。官行人。○婁東詩人。雖各自成家。大約宗仰梅村祭酒。玉停晚出。欲自關町畦。而能不離正軌。亦後輩中矯矯者。

餞敬亭上江西觀察分題得盆檜

一尺萬丈勢鬱此。昇仙婆托根。几案間。抉石出。怒猊黛枝雲。蓋結鐵榦霜痕披。聖植既劫火。猶覩具體微。風霆起。春蟄應。有飛龍知。願爲祖生楫。送君中流時。借題發義。見得聖傳一脈。正可乘時有爲也。後敬亭居官克副此語。可云不負友朋矣。敬亭字子大。名起元。

分擬鮑參軍白頭吟

持妾懷中月。照君絃上心。琴聲逐流水。月向波心尋。體雙珍合璧。心一利斷金。如何乖宿昔。貌昵情辰參。破壁成帶玦。挫金置氈鍼。昔爲比目魚。今作分飛禽。分飛日以遠。反目望轉深。言念結好初。忍垢共泥沉。錢刀焉足貴。信義乃可任。不見黔婁妻。相看雪盈簪。溫厚纏綿。愴泥沉之共艱。責信義之足守。怨而不怒。可與谷風並讀。

豹留皮

豹留皮。人留名。死無所留。不如無生。大丈夫。得死所。光奕奕。照千古。王鐵槍。不識字。但好武。鄆州失。鐵槍出。破強敵。期三日。妻子羈。唐勿復言。男兒誓不私家室。轅門置酒出舟師。座客未散連鎖摧。亞子膽落守

殷竄威名播耳如春雷青蠅營貝錦成保變潰中都傾吾槍可折吾膝勝鐵誰能向鬪雞小兒屈惜哉豹
爲鼠死豹皮文獨存鼠腐臭未已彥章事朱溫固爲不能擇主然既已事之則君臣之義不能亂也歐陽
之兩者兼而王
鐵槍之論定矣

十阿父

爲天子父孰如其尊阿父過多難爲兒孫殺人於市如屠犬豕臯陶袖手虞舜充耳一父披猖九父譁張
願言築宮奉以上皇脂車秣馬歸之汴京後周太祖后柴氏無子以后兄守禮之子爲子是爲世宗守禮
將相皆有父在洛陽與守禮往來
惟意所爲洛人畏之號十阿父

古北口

地險雄關舊秋臨獨客驚馬頭懸漢月山背絡秦城草帶烽烟色蟬爲朔吹聲輿圖正無外大漠亦神京
捶鍊而成
言無浮響

偕王樹先觀察渡錢塘舟中對弈

問渡攜棋局忘言到夕曛星辰兩手握吳越一江分小劫壺中隱餘音榜外聞機心渾不用仍可狎鷗羣
吳越以江爲界人能言之以手握星辰引
爲對偶兩語皆警拔矣作律詩須得此意

瓜州曉渡

征鞍才卸客身輕。指點金焦雙眼明。宿雨漸收遙岸出。海雲初落怒潮平。人歸春晚猶餘興。風入江南亦有情。正值百花新釀足。一杯先爲破愁城。第六語久羈北地者始知其工。

寅鑑堂後燈筵卽事

自注各以字爲韻

珠明玉豔簇芳庭。細膩風光鎖曲屏。歌板欲殘餘白雪。月輪初上淡春星。坐忘賓主宵嫌短。思入鄉關酒易停。不奈峭寒歸客枕。半垂紙帳一燈熒。

硯

端谿誰割紫雲腴。萬古文心向此攄。小點墨池成巨浪。就中飛出北溟魚。小中大

尤秉元

字昭嗣。江南長洲人。康熙甲午舉人。官樂至知縣。○昭嗣年五十餘。胸嚙嚙。依然童穉。及乎蒞官。民安政肅。去後猶思賢者。洵不可測也。詩承四堂滄澗兩先生後。不入輕浮之習。是

爲唐音

孤雁篇

玉關萬里秋風遠。南歸鴈渡蘆洲晚。數行中斷忽分飛。零落寒空誰作伴。可憐孤鴈不勝情。常伴寒星夜夜鳴。客舍淒涼魂欲斷。深閨輾轉夢難成。客舍深閨聽淒惻。絕絃更有傷心客。十載同棲連理枝。一朝忽拆雙飛翼。空館經秋冷繡帷。黃昏微雨畫簾垂。當時漫作求鳳引。此日翻成別鶴悲。悲來常向西風慟。重續難溫誰與共。一似孤鴻失侶飛。湘江不作鴛鴦夢。天上人間兩渺茫。年年歲歲恨難忘。尺書肯寄重泉

去爲道蕭郎正斷腸。昭嗣三十餘悼亡不娶旁無姬侍人高其清淨不知其情深也篇中連絲不斷如春蠶引絲失偶人幾不能讓

芙蓉映水曲

秋江澗澗開明鏡。湘女窺簾曉妝靚。遺佩飄香散作花。一枝豔質臨江映。江水盈盈未易求。相思空望夕陽樓。西風一夜生南浦。零落紅衣入暮愁。

牡丹

洛陽花譜幾番新。爛漫欣看穀雨辰。晚出遂超羣品上。纔開便足十分春。倚欄妝重愁無力。繞幕香濃欲醉人。千載沉香遺迹在。誰將絕調寫風神。李山甫數苞仙艷火中出一片異香天上來羅隱公子醉歸燈看到子孫能幾家則又過於衰颯矣。領聯爾雅典切古今人何必不相及耶。

張弘敏字訥夫江南丹徒人康熙甲午舉人官孝感知縣

詠史

劍術莫論疎荆卿一何愚。生劫萬乘主。此事大難圖。惟彼虎狼秦。變詐實多虞。誑楚絕齊交。終不致商於。焉能反侵地。信義申匹夫。急劇羸政胸。羣憤亦少舒。如何披督亢。猶事久踟蹰。嗟哉報丹心。空與日月俱。荆卿不止劍術之疎欲生劫以反侵地是以齊桓望虎狼之秦其勢必不能也未不沒其報丹之心咎之之中實深惜之。

放勝明日知落副車有作

瓊樓高迥絕躋攀。大藥功成第八還。行到半天仙骨少。罡風復遣落人間。

吳廷華 字中林浙江仁和人康熙甲午舉人官福建海防同知著有東壁詩鈔○東壁穿穴經學尤究心三禮所為詩徵引典實雖風雅不足不礙為方家也

沈孝子行 自注為良思觀察子庠生數愍作

我友有子稱小鳳。少歲六經熟磨礱。忘身竟以死孝傳。千古人倫作梓棟。孝子陳情救乃翁。乃翁得旨還天中。自注時寓居河南輝縣。昨歲母殯值鄰火。撲滅不覺麻衣紅。麻衣紅不可褫。寧死肯任母殯燬。頭焦額爛膚不完。殯宮獲全孝子死。孝子曾補兩笙詩。南陔白華有新詞。居身潔白守庭訓。循陔乃厄南宮離。我聞客位之殯塗且肆。攢至西序預火備。此禮廢墜千百年。致令孝子蹈炎熾。我友哭子幾喪明。邦人請旌留孝名。登危臨深古所戒。成仁取義非過情。讀書要在持大節。至行煌煌如火烈。旌廬令典金石光。精神不逐劫灰滅。始而陳情救父。繼恐火焚母棺。衰絰撲火。自焚其身。固死于孝者也。得此詩表之。孝子可以死然孝子於是乎不死。○士喪禮掘碑見衽。殯埋棺坎下也。顏延之哀冊文。戒涼在殯。杪秋即窆。注三日而殯。三月而葬。

題杜文貞公小像

長樂坡前白譏甫。自注飯顛山唐據言作長樂坡。太瘦生緣作詩苦。我聞斯言不謂然。是亦羣兒謗傷語。三人各瘦公有云。諸弟豈盡能詩人。唐書文苑傳可考。喪亂飢餓叢公身。自公蒞官天寶季。漁陽鼓鞞勢何熾。陷賊歸來驚所親。老瘦當知從此始。乾坤瘡痍勞至尊。蒼茫家室空柴門。三年奔走益潦倒。一身皮骨嗟空存。我讀

公詩見大略。浩氣縱橫非束縛。況聞下筆如有神。豪唵安得身如削。披圖恍遇山澤癯。聊存詩案明其誣。聞說李侯亦顛顛。千首敏捷終何如。太白戲少陵語。本出雜說。不足憑也。以三年奔走空皮骨。句爲證。見少陵之瘦。由於喪亂。而旁喻曲引。以破所戲之語。無微不至。

卷二十四

徐陶璋

字端揆。江南長洲人。崑山籍。康熙乙未。賜進士第一人。官翰林院修撰。○殿撰中歲成詩。流於性情溫厚之餘。故動皆有則。

桐廬

輕帆漾微風。到郭及亭午。晷影落清波。銜雲映吞吐。沙渚集漁舸。鷺鷥晒毛羽。參錯綴人家。臨水開牖戶。樓閣見層疊。罅隙松篁補。媿無荆關筆。好景渺難譜。微體幸蕭散。得未羈簪組。心胸湛虛明。俯仰憶往古。近欲訪玄英。頰首拜抔土。遠攀漢客星。高風邈天宇。擬將謝浮名。煙波狎柔櫓。何時攜雙柑。春鶯聽花塢。上半寫景。下半懷古。心胸湛虛明。二語作上下轉關。篇法整肅。乃爾。

洪忠宣祠

不愁鼎鑊一心堅。辯折金廷氣凜然。舉目動驚風黯慘。攀髯空想淚潺湲。放還北地辭羈繼。淪謫南朝被棄捐。寂寞錢塘孤廟冷。千秋有恨聽啼鴉。忠宣羈北地十五年。金人鑿其忠。放歸。高宗亦謂其同於蘇武。弁亦十七年放歸。事與相類。

凌如煥字榆山江南上海人康熙乙未進士官至兵部侍郎

題隆中草廬

攝衣峴山巔。停舟鹿門涘。憑弔草廬人。抱膝山之趾。燭照天下事。未嘗一挂齒。一朝感知遇。臥龍挾雲起。攘外遏強寇。安內輔孺子。伊呂良可追。管樂詎足擬。二表泣鬼神。耿耿光青史。命畢五丈原。恨流江漢水。當年有龐公。隴上秉良耜。足已外無求。民物捐敝屣。惟公立談時。決策挂炎紀。閉戶不失人。救世不枉己。緬懷三代下。誰許齊一揆。用行而舍藏。庶乎子淵氏。忠武自比管樂少陵比以伊呂而此以子淵氏擬之。行藏合宜所謂易地則皆然也。尙論古人正須獨放力。

新灘拽灘歌

風瑟瑟。樹蕭蕭。拽灘水落新灘高。蜀道青天不可上。橫飛白練三千丈。居人歡喜旅人愁。千盤萬折過隴頭。

北雪消。南風作。新灘水平拽灘惡。中流伏石如蛟龍。紙船全賴鐵梢公。旅人色沮居人利。石米百錢取如

寄自注貨米船下灘經水者值取百錢一石。○可作古謠諺讀。

余敏紳字張佩福建寧人康熙乙未進士

傳臚日作

初日曠曠刻漏傳。鷓班肅立靜鳴鞭。一聲臚唱纔過耳。五色雲高或在天。幸藉朴誠逢聖世。肯圖溫飽媿前賢。麤才未奏凌雲賦。也向螭頭惹御煙。臚唱日。想到或有韓魏公其人。心事光明磊落。謂他非矜一己也。朴誠自矢。不圖溫飽。可以覘其爲人。

楊士凝字笠乘。江南武進人。康熙丁酉舉人。

不如歸去

不如歸去。省我墳墓。十年萬里白頭親。腸斷縫衣無寄處。歸來五鼎列墓前。有泪不達重泉路。瞻遠遊子。視東野遊子吟。尤不忍讀。

吳江

丹楓颯颯下寒塘。財賦江東第一鄉。誰唱吳歌醒客睡。半湖殘月半船霜。

雨霖鈴曲

天子猶難活婦人。梨園枉唱雨霖鈴。萬層劍嶺千條峽。忍使官家掩淚聽。

潘其燦字景瞻。江南吳江人。康熙丁酉舉人。太史稼堂次子。

春風和李玉洲韻

韶華可是隔年期。轉眼春風似舊時。遠客樓高愁獨覺。深閨帳暖夢偏知。分番芳信園中報。一片晴光陌上吹。回首幾多離恨積。憑欄好與訴相思。深閨一語。尤爲著題無跡。

登河防口邊城

山海居庸千里長。前朝於此重邊防。藩籬屬國亡三衛。屏蔽中原恃一牆。保塞規模傳魏國。築臺形制說南塘。而今中外爲家日。直北輿圖接大荒。

癸卯歲暮感懷

敝裘燕市又經寒。歲晚冰霜閉戶看。夢斷梅花鄉國遠。愁憑竹葉酒樽寬。郢歌白雪誰憐寡。蜀道青天始信難。寂寞藜牀高臥處。碧霄依舊路漫漫。

翁志琦字式金。江南吳縣人。康熙丁酉副榜。○式金向曾屬草詩序。因遠行未果。今披覽遺稿。多原本性靈之作。采入選中。略補未能應命之咎。故人應亦諒我也。

反班婕妤怨歌行

團扇復團扇。皎皎白於雪。永晝引清飈。良宵延素月。秋來置箱奩。尋常不輕發。薄俗區故新。君子秉貞節。炎曦會有時。誰云恩義絕。元辭可以怨矣。此更秉心貞正。立言有則。

外孫信兒至

七年依我住。晨夕不暫離。三月不相見。惓惓繫我思。歡呼入門來。一笑舒雙眉。登我所坐榻。弄我所吟詩。我吟三十載。苦心實在茲。名山傳絕業。回首當付誰。數篇乞記誦。授之復何私。他時曉人事。應識此言悲。

見無人承柏園詩也。授之外孫。旋付劄。今詩壇傳有孫山姓氏。可慰九原。

答女口號

左家嬌女稟夙慧。把卷問耶欲學吟。耶窮正緣苦吟誤。爾何學吟費苦心。不聞郝鍾禮法重大義。婦德何嘗在識字。正論不磨如李易安轉受識字之累。

連夜夢歸故鄉醒後偶成

夢境原虛幻。情真幻亦真。身嘗為客苦。心戀在家貧。衣食憐嬌女。憂勞慰老親。不知閨閣夢。曾否見歸人。

白髮

朝來攬明鏡。白髮感蹉跎。畢竟無公道。愁人鬢畔多。

田氏紫荆里

田氏遺墟沒草萊。春風猶見紫荆開。願攜當日連枝種。分與人間處處栽。

張廷璐字寶臣。江南桐城人。康熙戊戌賜進士第二人。官至禮部侍郎。著有咏花軒詩。○心躁者多志微。嘯殺之音。心平者多順成和動之響。言為心聲。不可強也。藥齋公不干進不務華。以介

自娛以誠感人。視學江蘇九年。如和風著物。萬類萌動。既久。士林猶歌頌之。宜發言為詩。比於水之濼洄。春之和益。讀者心醉氣夷而不自知也。注力不在五言。故不備錄。

岍山招遊雲龍山用東坡答呂梁仲屯田韻

黃樓嵯峨古彭門。雲龍山下多煙村。暇日招遊恣登陟。壺榼不用燔雞豚。淮泗交流清浪駛。呂梁迅急黃河渾。巉巖似騰北海蜃。巨嶂如起南溟鷗。岡阜縈抱氣尤王。洪波襟帶勢欲吞。振衣絕頂俯平壤。川原環

拱雲龍尊古藤倒垂猿狖挂。怪石礮礮熊羆蹲。青疇千頃水方退。高壠往往留潮痕。禾根猶見集雁鷺。屋外直欲浮蛟鼉。今年盛夏苦霖潦。茅簷白雨如翻盆。水田坐看秋稅減。寒谷惟待春風溫。城中居人尙安枕。萬家鱗次炊煙昏。茲山高曠足眺覽。歸然放鶴亭孤存。石磴逶迤古苔滑。蒼枝詰曲老樹髡。黃茅岡頭指遺跡。羣羊髣髴眠雲根。山人已往坡老逝。空嗟歲月如濤奔。殘碑寂寞野煙罨。虛廊蕭瑟寒雲屯。勝遊憑弔增慨歎。不辭斗酒傾匏樽。用蘇韻。近蘇詩。

送魏定野歸柏鄉

蕭齋把臂足清歡。聯句論文夜漏殘。楊柳旗亭偏送別。杏花邨店尙餘寒。萊衣愛日春方永。謝草關情夢未安。無計留君倍惆悵。心隨歸騎過邯鄲。楊柳旗亭一聯似人人意中語。然佳處正在自然。一加槌琢。恐失天趣。

賦得落日樓臺一笛風

餘霞散漫晚煙浮。長笛風前響欲流。幾點鴉歸遠村樹。一聲人倚夕陽樓。梅花早向江城落。楊柳曾傳絕塞愁。何似神仙騎鶴背。凌空吹徹萬山秋。

哭梁貢

秋風素旆聽虞歌。月落空山叫夜烏。堂上白頭翻哭汝。膝前黃口已成孤。魂依姜被霜華冷。腸斷蘇機血淚枯。寄語閨中鬢髻婦。茹哀還慰八旬姑。此哭女夫而作也。白頭無子。黃口無父。人生最不堪事。未囑空閨鬢髻。髻押哀慰姑。望其節孝兩兼。立言真至。

恭和御製秋蒐雜紀元韻

登陟岡巒勢磊嵬。經過澗壑水潏洄。騎來天廐三千駒。蹋破秋雲幾萬堆。林外瑯戈隨豹尾。峯頭黃繖傍龍媒。從知蒐獵關戎政。載筆還須付馬枚。

南歸

廿載勞人得賜閑。故園風景隔塵寰。潏洄馬鬣雙溪水。層疊龍眠萬笏山。巾屐獨尋新蘚徑。煙雲仍護舊

柴關。林泉瀟灑無拘檢。大似開籠放白鷗。此五章致政歸時所作。

天池水擊有鯤鵬。蜩鷲榆枋自不勝。腰綬已拋三尺組。頭銜猶領一條冰。收將帆櫓乘查客。攜去瓶盂退

院僧。日上松窗新睡覺。還疑帶月望觚稜。忠愛之言於極閑處傳出。

松風蘿月送餘年。暮靄朝風別有天。門爲看山寧用杜。車還駕鹿不須懸。烹茶泉比中泠水。荷鍤秧分下

澗田。老我得從耕牧者。蕭閑真覺主恩偏。杜門懸車歸田後常語也。一經翻用便覺生新。

由來齒角未容兼。獨荷生成意已厭。奉席兒能謝簪紱。扶筇婦尙理齋鹽。含飴孩幼甘同剖。高枕林廬夢

亦恬。慚愧此生論取與。天公傷惠我傷廉。從熊躡魚腹豈能兼意化出極欣喜。轉似以咎出之妙不可言。

舟泊無錫

九龍山色何媚嫵。坐見白雲生縷縷。空濛散作波上煙。篷窗一夜蕭蕭雨。

送楊升聞歸里

節近傳柑花映扉。山園且莫戀芳菲。遲君一葉樵風便。流過春江燕子磯。詩中天籟亦以不雕琢得之。

鄭

江字幾尺。浙江錢塘人。康熙戊戌進士。官至翰林院侍講。著有筠谷詩鈔。○筠谷以詩爲事業。有指其失及改定其詩者。終身敬禮之。

西溪草堂圖

吾鄉山水窟。莫如西溪幽。延緣一徑通。落落清瑤流。夾岸無雜樹。鹿角枝相樛。霏微嵐翠間。香雪千林浮。有時略約橫。野竹寒修修。尋幽窈窕入。落英滿扁舟。花陰路疑盡。豁然見平疇。四山圍澗綠。土俗勤鋤耰。此中隱君子。毋乃栗里儔。一茅粗翦葺。六枳紛環周。虛室靜生白。恍然物初遊。臞鶴唳天半。若與孤情酬。仙源在枌榆。余胡久淹留。西溪在北高峯背。舟行凡十八里。溪窄只容一舟。梅林兩岸。風翻落英。沾人衣袂。錢唐幽絕境也。昔曾經其地。與會未到。難形語言。讀此詩令人神往。可當重矣。

度輦嶺

新安僻一隅。崖谷莽相圍。寒雨度輦嶺。悄然徒御悲。匪悲道路險。疲氓寒無衣。祇役我之分。勞民毋乃非。旣不能重趺。復不奮翅飛。民勞豈得已。王程不可違。酬民以價直。幾爲吏橐肥。詰問得其情。懲吏乃用威。疲氓感我意。繞座涕泗揮。民情大可見。豈願咸其腓。勞勞道路閒。志在救朝飢。飢寒苟不恤。焉用長吏爲。勤勞王事而不忍。以獸役人。仁人之用心也。詩之朴老。近元道州。

常山縣

風帆沙際落。嵐翠碧叢叢。一縣江聲裏。四山雲氣中。迎人幽鳥語。隨意野花紅。回首鄉心遠。沿流直向東。

殘柳

畫橋斜去水東流。落日西風澤國秋。樹下彩雲都散盡。夜來明月尙勾留。碧蹄馬老憐荒驛。白髮人間倚酒樓。六代離宮鴉數點。滿天疎雨不勝愁。五六取題之神。不黏不脫。一結尤有遠韻。

釣臺

高臺俯暎暮江清。葉葉風帆盡日行。碧水幾時停過客。青山終古屬先生。可知遜世原持世。始信逃名是愛名。慚愧萍蓬無定迹。滄洲暫借濯塵纓。遜世原持世。謂東漢節義之風。從羊裘翁開出也。逃名是愛名。工於著辭。他手以釣臺爲釣名。淺而無味矣。

飛來寺

澄江綠滌潔于苔。羣峭摩天一線開。吉貝花中聞梵唄。兜羅緜裏現樓臺。榕陰濃疊千重翠。松吹晴喧萬壑雷。瘦石玲瓏霞縹緲。卻疑巖岫亦飛來。

鄒升恆字泰和。江南無錫人。康熙戊戌進士。官至侍講學士。著有借柳軒詩。

分賦得采香徑送沈歸愚太史暫假歸里

吳宮花草今何處。巖畔猶餘采香路。當年越女顏如花。蓮舟蕩漾雙槳斜。後宮羅綺照野水。鴛鴦作隊隨

溪沙六千君子一朝起。臺上佳人委流水。相逐鷗夷泛五湖。羞見荷花守紅死。千年遺跡想依稀。過客唯應弔落暉。詩人家傍采香徑。不采穠香采紫芝。老入承明親禁掖。慙辭釵砌還山澤。洗硯池邊訪舊蹤。樵翁溪友還相識。自憐軟土滯年年。何時同泛香溪船。不采穠香采紫芝爲歸人增長聲價然愚實有媿其言也是日贈行者共十有二人先生詩尤高雅錄此

并識一時良會

丁香和韻

春空煙鎖綴星星。兩樹瓊枝占一庭。交網月穿珠絡索。小鈴風動玉冬丁。傍簷結密人難折。拂座香多酒易醒。只恐天花散無迹。擬將湘管寫娉婷。羌無故實自足風流

宋

照字謹涵江南長洲人康熙戊戌進士官翰林院庶吉士

霧凇

風寒霧下成銀沙。徧穆林木垂鬢髻。天公知我太岑寂。先遣萬樹開梨花。梨花一望杳無際。應是碧空慣遊戲。東方漸見升陽曦。還憐化作輕雲飛。冬月行德州曾見此景因憶嘉州千樹萬樹梨花開句然未形諸詩也讀此歎作者先得我心

白雲寺閣次壁間張使君韻

白雲小閣與雲平。開閣瑩然眼界清。飛鳥沒邊孤塔見。亂山缺處夕陽明。僧投遠寺煙中去。筏下空江鏡裏行。林外聲聲啼布穀。青郊應及試春耕。

王 恪字愚千。江南太倉人。康熙戊戌進士。官知縣。著有長留詩集。○愚千爲家台臣先生女。夫指授既正。而筆力清剛。一空時下纖穠之習。觀詩集命名。知其自信者素矣。

椒山先生祠

風節容城仰。斜陽憑軾時。疏成十罪定。獄借二王辭。大鳥前朝墓。披鱗異代祠。病中虛拜薦。欽挹起餘思。
椒山先生疏成。嵩之十罪。千秋定案矣。如此著筆。筆有風霜。

水宿

水宿風餐裏。栖栖過此生。米原無帖乞。碑信有雷轟。中土多凋瘵。西陲尙甲兵。休從詹尹卜。歸去好躬耕。

寄題陳橋驛

五代干戈苦戰爭。天心撥亂已潛生。營光久應焚香祝。檢點曾傳得讖驚。倉卒黃袍酌素志。綢繆金匱負遺盟。最憐永棄幽燕地。當日師名是北征。
黃袍加身後。杜太后云。我兒素有志。則宋祖之不臣顯然矣。金匱之盟。負者太宗而宋祖。主是議。亦非中庸之道也。結意燕雲永棄。強名北征。宋之積弱。已萌於此。此種詩可當後世春秋之筆。

送楊文叔北上

自注。從洗馬川中學幕歸。卽借北上。

萬里征塵拂袂初。驪歌促別意何如。已看蜀道非難上。誰說長安不易居。作客仍依王儉幕。故交好借惠施書。
自注。指仲孺太史。知君負米緣情切。早寄鄉音慰倚閭。
三四語工於點化。

石鼓

當日岐陽獵火紅。大書深刻配車攻。奇文人嗜三蒼並。盈數天虧九鼎同。歌託韓蘇參史筆。辭超奏漢繫王風。重搜殘日成完壁。千古輝煌太學中。辛鼓流落人間。改作春白。故云九鼎同也。後復搜得。同置太學戟門。

王懋竝。字予中。江南寶應人。康熙戊戌進士。雍正中。以教授改官翰林。入上書房行走。○太史精研理學。身體力行。一時有小朱子之目。詩亦言其所得力。不求工於詞也。

書座右二章

長隄潰蟻穴。君子慎其微。生平操持力。不敵一念非。波浪浮天闊。漭漭決四圍。內省增歎息。已往安可追。奔馬不可馭。盤石不可幹。是非反掌間。鉛刀貴一割。我心似寒灰。百念俱利剗。願更塞其端。絕之在由枿。

此言慎獨之功。欲念乍萌。絕之於微。勿使其潛滋暗長也。妙在親切。不覺其腐。

吳家騏。字晉綺。江南吳江人。康熙戊戌進士。官至禮部侍郎。

聖駕南苑大閱恭紀

鸞旂肅肅駐郊垆。輦道風和霧色明。四海無塵寧弛武。六軍有紀盡知兵。瑠弓親試穿雲箭。繡罕還巡夾日營。昨夜賜醕恩澤溥。馬騰士飽遍歡聲。

城南帳殿曉雲開。萬騎星羅拱日來。虎旅自諳司馬法。鷁班齊侍瞭鷹臺。兩行列陣堅於壁。九進聞聲動若雷。變化方圓包地軸。君王元裕統天才。

楊忠愍公祠

忠愍千秋總不亡。折姦那惜觸鋒鏦。不須螭膽當三木。祇請龍顏質二王。讞上霜飛章急下。城中風慘鎖猶香。平生未了伊誰補。浩氣常餘百鍊剛。鏘化傳中語。一歸自然。

萬邦榮字西田。河南襄城人。康熙庚子舉人。

偶感

世無名與宦。人心皆太古。世無輪與蹄。人皆守鄉土。造物鑿混沌。驅人投網罟。誰能翔天外。超然黃鵠舉。此即老氏之學。欲返三代爲太古也。然亦自成名論。詩格老幹。千尋盡芟枝葉。

成敗何足校。英雄自有真。據跡鼓脣舌。千秋一酸辛。不見屠狗輩。乘時滅強秦。臥龍思復漢。齋志何曾申。不以成敗論人。是作豪傑語。

致君復淳風。杜老有夙志。南山石可耕。俟時合高寄。胡爲望吹噓。干人欲涕泗。區區愁餓死。餓死乃常事。叩門隨肥馬。自反恐含媿。上書光範門。斯亦賢者累。杜韓志在救時。故急欲見知。與後世之耽利祿者異也。然持此責備西田之安命。俟時。皎然共見。

鄭世元字黨參。浙江餘姚人。康熙庚子舉人。著有耕餘集。○耕餘詩無鑄本。浙中亦無道及名姓者。茲從令嗣炳也。太史處借得未嘗求新立異。而胸次高朗。卓犖可觀。會稽詩人中罕此矯然者。

感懷雜詩

貧賤非所憂。菽水有餘歡。毛義喜形色。意詎榮一官。用愧七尺軀。無由潔晨餐。斗粟不任舂。負米計彌艱。

大義在不辱守身重邱山安得力畊養十畝樂閑閑以不辱身事親榮於祿養矣此義知之者少

劉勰著雕龍懷之謁休文磬折車輻下有才懼無聞又聞鮑明遠奏詩義慶門韜知恐沉沒上書以求伸

無稱雖可疾榮名胡因人榮名雖可寶此身亦宜珍銜玉賢者羞自媒貞女嘖崇實賓自至奚爲喪我真

因人成名屈辱甚焉此義知之者尤少

泰山不自高因丘垤以形河海不自廣因溝澮以名他山有礪石良璧逾晶瑩木槿爭朝榮松柏彌見貞

何妨粟有糝維箕簸之精何妨苗有莠罇趙畊者明純用比體拉雜成文在詩爲鶴鳴在文爲枚乘上吳王書皆開先也作者王於用比最耐人思

出門別妻子

病身不得安行役赴南嶠五嶺天之末未知幾時到仰見秋鴻征嗷嗷背雲叫回首望鄉里魂夢使顛倒

我恨不如月兩處能相照轆轤挂心頭轉輾向誰告不能如月兩照樂府中每有此種話頭

在家不知好出門使心悲嬌女繞我膝小兒挽我衣似亦解離別卻去還復來惟此不忍割令我殊依依

昨日適南市思買繒綺歸綺要機中織蠶婦方縑絲將絲撚作線成衣知幾時我老待兒養場焉摧心脾

勿用顧旅人我猶得自強融融榮衛間漸覺回三陽飢已思食粥渴已思飲漿前途雖然遼有弟相扶將

只愁雁鴻少勿慮歲月長但看嶺梅發知我思故鄉明年五六月寄汝荔支嘗

粵山山山奇。茲巖益奇絕。嵌空有神功。壁立淬寒鐵。崦嵫山精藏。靈秀真宰洩。赤日萬古陰。江霧晝常結。飛樓騎危駕。石隙透微穴。拾級如盤螺。堂隍忽開列。僧梵響出雲。鍾乳倒垂雪。南思羅浮佳。北與大庾別。目謀觀斯奇。殊使羈心悅。

鬱鬱詞二首

年荒有兄不顧其弟者。作此詞以感之。

鬱鬱紫荊。枝條紛紛。枝條雖分。其本則均。父母生子。惟我弟昆。弟昆分形。血氣一源。予手若創。予足不伸。予體不伸。予心煩冤。兄兮不關。誰知予之飢寒。

相彼鳴雁。猶同其羣。胡今之人。不知有弟昆。我視之弟。親視之子。念我父母兮。心熱而顛泚。呼父母告之。辭彌朴。聲彌

哀矣。近井有不顧父母之飢寒者。更當作何語以感之。

捉船行

客行在西吳。喧呼聞捉船。云奉憲司票。取數須一千。烏程縣堂曉傳鼓。縣官排衙點船戶。東船西舫寂不行。里正如狼吏如虎。行人坐守居人困。百里官塘斷商賈。罟師漁父都含愁。城南城北水斷流。千艘萬櫓城中集。葦岸蘆港風悠悠。大船競輸錢。差役幸暫免。小船無錢只一身。捉住支吾應供遣。自從名隸公家籍。日日河頭坐白日。太倉合米聊入腹。誰爲饜殮顧家室。可憐有船何處撐。江千萬衆俱吞聲。捉船不行。日坐河干。

可發一歎復一笑也。予有民船運一篇。情事正復相類。

官賑謠

黃鬚大吏駿馬肥。朱旗前導來賑飢。飢民腹未飽。城中一月擾。飢民一簞粥。吏胥兩石穀。我皇聖德仁蒼生。官吏甚勿張虛聲。中間四語似兒童謠辭。古今一轍。付之無可奈何而已。

檢先大人遺集

清氣迴天地。丹心在簡編。平生千古意。屬望後人賢。馬服深慚括。周南泣授遷。空嗟不能讀。三祝未終篇。歎己之徒讀父書。謙辭也。對以司馬談之。周南授遷。自任何等服其隊仗之高。

看客舞刀

秋水飛雙腕。冰花散滿身。柔看繞肢體。纖不動埃塵。閃閃搖銀海。團團滾玉輪。聲馳驚白帝。光亂失青春。殺氣騰幽朔。寒芒泣鬼神。舞餘回紫袖。蕭颯滿蒼旻。

觀槍法

聞聲馳鐵騎。過影走金蛇。進退真神捷。盤旋任屈斜。毫光團白雪。風雨散梨花。一氣如相貫。全身總被遮。陰陽回地紐。狐媚遁天涯。髣髴陳安技。真堪任虎牙。上章舞刀。此章舞槍。無一語可以互易。令讀者如置身玉輪梨花之間。是何神勇。

厲

鶚字太鴻。浙江錢塘人。康熙庚子舉人。著有樊榭詩集。○樊榭學問淹洽。尤精熟兩宋典實。人無敢難者。而詩品清高。五言在劉脊虛常建之間。今浙西談藝家專以釘釘搏搏為樊榭流。

派失樊樹
之真矣。

永興寺二雪堂曉起看綠萼梅是馮具區先生手種

幽人先鳥起。林籬正寂然。是時春空霽。山翠爭便娟。的花間雨。澹澹花上煙。煙雨爲合離。花態亦變遷。祭酒昔遊此。手種猶生前。傲兀根倚石。欹倒枝曠泉。微馨委陳迹。高格同枯禪。儒官罷亦得。不廢招隱篇。攀花久延佇。世已無其賢。起句傳曉起之神。花態隨烟雨變遷。靜心遊覽。人方領得此趣。具區手種梅。只淡淡寫之。

西溪巢泉上作

翫溪遂窮源。東峰屢向背。朝日上我衣。春泉淨可愛。不知泉落處。潺潺竹籬內。喧聞兩疊瀉。靜見一潭匯。松風颺纖碧。花影蓄深黛。名言猶有相。幻照乃無悔。悠然巢居心。頗欲終年對。曉起觀泉。初陽上。衣寫得字字入神。

春陰望西溪人家雲山梅竹互爲掩暎

溪聲迤西流。寺橋扼其隘。分餘落麥田。綺秀渺方罫。行人越阡陌。春望怡我輩。俯俯遠梅林。映山青曖曖。下有漁樵屨。竹樹互襟帶。炊煙化山雲。雲起半明晦。花原色不同。輞口境如在。悵矣懷閒居。悠然悟天繪。炊煙和山雲。幾合而爲一。此云化山雲。見炊煙亦神靈物也。筆有化機。無施不可。

西溪曉起

首春溪中寒。偃臥在巖穴。宵分天柱夢。覺來轉清切。開門殘月在。下見數峯雪。雪際生白雲。宵映不可說。

登橋水市靜。尋徑冰泉裂。田翁尙無事。初陽候林缺。懷新意似欣。理舊抱已結。何如巖棲人。鷄竹飯松屑。

行田至荆山嶺下作

大山何連延。細岑若迴顧。中有微逕通。兩村隔松霧。平疇開朝日。宿麥半凝沍。雲根脈未洩。涓流但微注。野人籬落小。鳴雞隱雜樹。雖無汜勝書。農話眷幽素。稍營下澗業。更羨上洄住。竹橋滑春霜。往來定非誤。

狀村落景如畫。

理安寺

老禪伏虎處。遺跡在澗西。巖翠多冷光。竹禽無驚啼。僧樓滿落葉。幽思窮扳躋。穿林日墮規。泉咽風淒淒。

寒翠欲滴。野禽無聲。非此神來之筆。不能傳寫。

二月十七日重遊洞霄宮探大滌洞天

振衣浴罷體更輕。竹枝投石聲彭觥。空山昨夜龍洗窟。雨過萬壑泉縱橫。山靈知我有默禱。故遣浮雲散縈繞。一峯陰見一峯晴。天柱中央翠於埽。元同先生昔隱居。洞天長鎖琅函書。前遊日夕未曾到。恨身不得乘飄車。穿盡幽篁履苔石。驚見給硯洞門坼。童子曾爲擣藥禽。桃花解笑題詩客。此中日月停兩丸。想象九夏尤清寒。微明秉炬觸暗壁。古靈題字來尋看。玲瓏乳竇隔凡處。路接華陽不歸去。有人問我洞中來。爲說浮雲如柳絮。

日月停兩丸。謂洞壑陰森。叢娥旋轉。其光不到也。通體疑有仙氣。

過宋通問副使朱公少章墓

突兀殘碑立古阡。行人猶記紹興年。青衣已見君王辱。白髮何期使節旋。老淚冰天他日恨。遺文曲洧至今傳。一杯築並花宮地。夕唄晨鐘更惘然。宋公留虜地。值徽宗殂落。哭以文云。歎馬角之未生。魂歸雪窖。蘇屬國也。放歸時年已老矣。墓在九里松。詩句句穩貼。無一剩語。閑字。

方正瑗

字引除。江南桐城人。康熙庚子舉人。官至潼關道。著有連理山人詩鈔。○引除自高祖廷尉餘事也。然皆古茂純。正蔚然成一家之言。

述母訓

藐孤幸有托。一線書種留。辛苦四十年。淚枯心未休。從政居大夫。國恩亦已優。秦中十五城。一箸兼爲籌。萬命倚生死。焉可私殖謀。大本貴先立。清風領諸侯。廉泉可以飲。腹滿他何求。喜兒赤子心。慮兒骨不逾。引索馭奔馬。一蹶韁難收。勿逐驍騰飛。信道從天遊。上以酬君恩。下以解親憂。通體皆母訓。稱述外不贅一語。

度秦峪嶺至商州與王刺史

自注。如宛平人。

梯雲數千級。忽登秦峪頂。羣壑馬蹄下。商顏尙延頸。風過虎氣腥。山荒草木警。民脂竭土祠。落日丹青冷。射矢黃沙岡。鳴鉦藥子嶺。百里多陶煙。十人九垂瘵。下鞍問疾苦。農樵意自騁。刺史政不苛。安居樂鄉井。夜黑月未上。燈火散林影。

關西書院落成示諸生

西岐聖人邦。治化隆終古。粵自漢唐來。功利雜尊俎。今茲禮樂備。文明會當午。未免征戰餘。習俗尙黷武。青袍少業儒。鐵衣多擒虜。豈知陝右地。原爲理學藪。叶讀書不講道。忠信更無主。笥中歲賜金。買得百弓土。築屋跨山河。聊以蔽風雨。矜式祀二賢。自注。睢州湯文正公。砥曲阜孔公。與鈺皆前任潼關守道。諸生聚三輔。學爲聖人徒。方圓就規矩。何人非顏曾。何鄉非鄒魯。殊塗而同歸。狂狷各有取。勿謂岐陽遙。流風動鐘鼓。以理道化剛武。使士還西岐舊俗也。詩品端重。不腐不佻。

放羅浮蝶

八幅裙開葉葉新。金籠初放翅如輪。神仙自合離塵網。顏色由來誤美人。莫向花邊迷舊影。好從洞口覓前身。蠻烟蠻雨還家路。飛破江南一片春。顏色固誤美人。不知文采亦誤才士。借題抒寫於言中。言外求之。

古鏡

土花點點上青螺。珠匣塵封委綠莎。絕代應憐顏色少。六宮曾識舊人多。月沉碧海秋無影。雲暗滄江水不波。一照尙能愁鬼魅。雙盤龍氣未消磨。六宮一語。於古字不取貌而取神。彼死煞刻畫者。少得其形似而已。

葉士寬

字映庭。山東籍。江南吳縣人。康熙庚子舉人。官至寧紹台道。

司馬悔山卽和司馬承禎山居洗心韻

山中雲霞古。山外草樹腥。出山猿鶴寂。還山夢魂清。流水斷復續。空谷幽而明。坐我石榻穩。著我羅衣輕。眼中何所見。太古苔痕青。耳中何所聞。絕頂波濤聲。吾心既已洗。誰博浮埃名。無求安有悔。遺身自忘情。豈必三山去。卽此凌青冥。有烟霞氣。混斧鑿痕。無求安有悔。見有求必有悔也。指示迷途。令人深省。

斷橋山用少陵白波渡韻

欲斷不斷橋。萬丈臨坼岸。有湫起乖龍。破石入雲漢。帝怒割左耳。置之懸崖半。老猿此迴踪。山鳥隔林喚。澗底雲濤翻。坡上雪花漫。奔湍往復迴。噴沫迸且散。我來臨深淵。下視目光亂。仙境無由登。凡骨自悲歎。刻畫斷橋。至於猿猴迴踪。山禽不度。安問行人。作皮膚語者。不解如此用筆。

上黨

上黨天邊郡。壺關控扼齊。羣推九州險。全壓太行低。往恨經羆虎。清時絕鼓鼙。從知秦趙鬪。只在故城西。天下勁兵處。嚴疆自古憑。虹鱗卷飛旆。獸角斷懸繩。三輔眞肩脊。河東舊股肱。至今唐使節。猶得義陽稱。蒼茫渾厚。胎源少陵。

許廷鑠字子遜。江南長洲人。康熙庚子舉人。官武平知縣。著有竹素園詩。○子遜少英敏。長弓刀馬。歷四方。友海內。知名士。居官有善政。去官後。人歌思之。詩嚴於唐宋之限。五律近李翰

林七絕。近杜樊川。諸體中。二體爲尤工也。高文良公章之對。客每吟子遜佳句。而文良有作子遜每與商略藝林兩賢之。

湘帆圖

湘山蒼兮湘水流。波平一鏡兮輕煙浮。美人自抱香草怨。鷓鴣啼出蒼梧秋。渺湘波兮紛幾曲。帆轉隨湘兮何處宿。遙山九面碧參差。暗水浮香流碧玉。羌峭帆兮何人涉。澧浦兮弔靈均。披圖笑爾日孤往。故鄉不憶秋風蕙。擢澌洄兮意超忽。睇峨眉兮在天末。醉來長嘯湘雲飛。一笑停帆弄江月。詩與題稱妙在若不用力。

采石

投竄歸來後。驚波弄月圓。江山無太白。寥落幾千年。予亦騎鯨客。來乘牛渚船。登樓人不見。春水上青天。全是太白近代徐昌穀亦有之。

黯淡灘

驚灘來黯淡。行旅奈愁何。山鬼荒啼雨。江鼉怒蹴波。舟從天上落。人似夢中過。歲歲勞于役。危途歷已多。
白菊

正得西方氣。來開籬下花。素心常耐冷。晚節本無瑕。質傲清霜色。香含秋露華。白衣何處去。載酒問陶家。晚節五字可傳品高處在絕去鏤刻。

中秋大風雨後看月有作

已分沉滄海。清光不上天。乍驚東壁曉。仰見一輪懸。萬里人同節。中秋影共憐。何能負良夜。讌賞又經年。一氣直下。不以對偶爲長。

和顧大嗣宗傷春之作兼送南歸

離亭微雪點征衣。惆悵天涯事已非。萍葉只隨潮信轉。楊花爭見雨中飛。夢迴遙夜驚明燭。人對殘春戀落暉。望遠思鄉兩無賴。故山空自寄當歸。賓主不偶俱於傷春中見之。

七夕雨中

不見西南玉鏡明。佳期迢遞隔層城。頻飛千里針樓夢。獨聽空堂夜雨聲。烏鵲橋成頭漸白。銀河天遠水空盈。但令此夕常相會。牛女何勞別恨生。

蕪城感舊

雷塘春盡草如煙。落拓江湖又一年。吟遍吹簫橋畔路。無人知有杜樊川。風神絕世。高文良最賞心者。

三千殿腳總如花。斷粉零香散暮霞。唯有離宮舊明月。夜深還上玉鈎斜。

題畫菊

芳菲過眼已成空。寂寞籬邊見幾叢。顏色祇從霜後好。不知人世有春風。晚節自佳。不受春風煦育也。覺老杜富貴應須致身早句。猶爲淺淺。

重過東園別墅感舊作

午橋莊閉少追遊。樹色波光帶雨愁。今日羊曇頭白盡。尚零衰淚過西州。此感婁東王氏而作。與趙嘏過汾陽舊宅一首同一風神。

七夕有感

離多倍覺故情歡。卻望針樓欲上難。記得星橋逢兩度。玉釵人共凭欄干。自注。去秋閏七夕。○情深矣。以神韻佐之。覺其情愈深。當求之

語言之外。

初八夜見月

鵲橋昨夜玉駟回。雲散香銷盡可哀。寂寂空房正腸斷。清光一片為誰來。

卷二十五

黃之雋。字石牧。江南華亭人。康熙辛丑進士。官翰林院編修。著有唐堂集。○雲間詩。自陳黃門振興才力。又足以驅策之。故能自開生面。仍復不失正軌。謂之詩學中興可也。

雜詩

絲布皆可服。本自機上分。布作縞素色。絲成羅綺春。載染紅紫豔。花色爭鮮新。紫綺裁窮袴。紅羅製舞裙。細腰同結束。密與支體親。回顧衣桁間。縞袂積埃塵。羅綺雖見愛。私褻不可陳。布素雖見棄。拂拭有餘芬。言文采炫於一時。不如太質之可久。此六義中比體。不用說明正意。

卓文君寄遠

靈禽有良匹。鬯鬯叶和鳴。奈何拚飛去。忽然棄平生。鳳鳥不變音。君子不變心。故人恩愛重。夙昔念同衾。明月在天上。流水在地下。秦蜀路非遙。人心自相阻。春風桃李花。綠葉對青枝。願爲歲寒友。偕老何不宜。
原辭白頭吟。閨閣中頗有英爽之氣。此云鳳鳥不變音。君子不變心。卽謂君子之恆久不已可也。有韻之言不妨斷章取義。

種王瓜籬豆諸蔬

昔逮養親日。灌園佐擊鮮。親亡事奔走。忽忽二十年。倦遊返衡門。老圃聊息肩。修我灌園業。情事恍如前。汲水諒非水。清淚同涓涓。此蔬親不逮。此圃親所傳。終作抱甕身。五鼎未列筵。瓜瓠如有知。爲我根蔓牽。蔓則蔽蒼野。根則入黃泉。以告我父母。貧賤子可憐。瓜瓠莫結子。有子亦徒然。
老圃親之所遺。因灌園蔬不及待。皆淚痕血點凝結而成者也。予亦有地一區。係先君子向時藝花者。因貧售人。今欲贖歸。藝植而親不及見矣。讀此詩爲之泫然。

水碓

轉輪在水稻在屋。糠粃如塵米如玉。誰其爲之機與軸。坎臼在地杵在水。橫貫輪心輪運瀑。以溪之水代人足。列杵五六杵齒齒。一杵入臼一杵起。圓輪迫杵水迫輪。急急晨昏春不止。溪女鬢插花紅。列坐白旁如課功。從容揜袖簸揚畢。勞逸不與吾鄉同。我來如聽一部之水樂。輪音爲商杵音角。
細寫難狀之情。正於瑣屑處見筆力。此古文敘事手也。然精左史者能之。

登報恩寺塔絕頂

到眼無埃壒。蒼茫入素秋。萬家斜照外。千古大江流。金碧翔霄表。虬龍壓石頭。長安稱雁塔。此亦舊皇州。
三四語登塔時所見略同。而於長千寺塔尤切。以帝王之州。長江環抱也。十字垂之有聲。

漂母祠

少年欺帶劍。老母念垂竿。恩怨一時有。波濤千古寒。封侯金自易。乞食飯應難。最是窮途感。英雄淚不乾。

武昌懷古

碧眼孫郎此建都。憑陵中國控全吳。危磯冒堞猶黃鶴。長鎖連江豈赤烏。霸業久隨流水去。客愁唯對楚山孤。太平城郭周遭在。戰壘荒荒隱綠蕪。
長鎖連江。乃太康元年事。計無所出。聊以禦晉。若赤烏時將相有人。必不爲此下策也。孫皓之失。言下顯然。

題李草亭畫寒江送別圖

長江風定水無波。歲晚天寒客又過。一度送行傳一畫。人生那厭別離多。
從黯然銷魂中。傳出異樣風趣。熟處生新。不落習徑。

儲大文

字六雅。江南宜興人。康熙辛丑會元。官翰林院庶吉士。著有存研樓詩。

秋江詞

瑤草涓。瓊樹杪。海客居。何縹緲。泛長江。楚天曉。木蘭舟外煙波繞。江上景。山嵯峨。仙人樓。迥輕雲過。美人簾卷秋色多。鴛鴦隊。隊忽驚散。西風遙送采蓮歌。采蓮歌。怨遲暮。芙蓉花。墜江露。
意言無盡。下不能更添一語。

謝道承

字又紹。福建晉安人。康熙辛丑進士。官至內閣學士。著有小蘭陔詩集。○閣學高行。屢聞於家。光祿敬亭。後於令似。敬處得其遺集。讀之。仁孝之思。時時流溢。洵爲德人之言也。敬係予

戊辰所取士官
比部亦敦本行

冬筍

蒼巖鬱寒姿。先雷蓄孤勁。砢崖凍壑中。氣盛萌欲迸。譬諸君子心。虛直含至性。胚胎何堅貞。節目自苞孕。長鑱雪外攜。剽取雪沒脛。清幽蘭比德。潔白玉同瑩。品格遠膏腴。烹飪戒餽釘。莫嫌滋味薄。能使襟懷淨。試看山林人。蕭然祛俗病。不須故實。自然雅切。從物性中傳出。君子德性。理足於中。隨所感觸。所云惟其有之。是以似之者也。

承晨昏省侍太夫人必詰問史事或對稍延訶責隨之今不復聞矣

兒來前。自堯經。今凡幾年。兒彊記。自堯經。今凡幾帝。兒時應對稍逡巡。母顏變色。旋悲噴。陳篋孫志學人責。稽古胡不如婦人。吁嗟乎。母言在耳。兒顏猶泚。安得我母常噴兒常泚。於今勸學無聞矣。

歸山後家園蕭颯甘旨缺供太夫人見憐每食減齋乙卯十月爲二子璈璈析箸愴然几筵永志

餘痛

切肉作羹。母呼進菜。侍側勸餐。母匕不再。懶能報本。烏返哺。夕膳晨羞。闕供具。母曰汝貧。毋以我故。加豆盈觴。匪行我素。俄焉空庭。感風樹。爲豐爲嗇。總不御。吁嗟乎。兒無母哺。哺於兒。撫茲梧捲雙淚垂。上章憶勤學。此章憶母氏之慈愛。字字從至性流出。去三百篇未遠。每一披讀。令人欲泣。所感同也。

一枝山房見新月

牆角光仍隱。檐牙淡欲流。葛衣涼似水。板屋靜于秋。山鬼弔鐙暝。林鴉繞樹幽。關河同一照。招恨此淹留。

送友南歸口占

親老偏爲客。家貧卻在官。百端俄頃集。豈獨別離難。

陸奎勳字聚侯浙江平湖人康熙辛丑進士官翰林院檢討著有陸堂詩學○陸堂穿穴五經皆有述作今人中井大春也詩獨風流明麗廣平賦梅花不礙心似鐵洵然

江南曲擬梁昭明

江南草長鶯亂飛。柳花如雪黏人衣。龍頭畫舫送將歸。送將歸。兩持楫。妹桃根。姊桃葉。詩至梁陳已開詞人小令之漸不始

於李太白溫飛卿也此故得其神似

移居

地偏仍在市。具少不須車。將隱文焉用。雖貧樂有餘。故交三徑月。歷劫半牀書。錯擬臨江宅。空教庾信居。

不須車。比少於車更貧矣。古人語須如此活用。

湖上念金心齋

鈿車輾轆碾芳塵。湖上重遊隔幾旬。柳絮忽黏空外雨。犁雲不斷夢中春。渚藏冶綠渾迷路。佩結幽香別

贈人。寧料湘潭憔悴客。仍逢瓊女冒申申。

柯

煜字南陵浙江嘉善人康熙辛丑進士官宜都知縣著有石菴樵唱○石庵困頓場屋老而始遇一官顛顛以病乞身至薦舉鴻博而石菴則已沒矣詩私淑牧齋親炙鈍翁論者謂得兩

家之長子謂不襲兩家之貌斯爲善學兩家者

古詩

小智欲求道得失常相因如鏡不瑩背如燭不耀晨鏡燭豈不朗操舍還由人蕩蕩至人出羲陽徹八坤浮雲絕蔽虧萬古光華新小智自用不能燭理所見者偏也惟性體虛明不矜私知則物無不照矣說理詩以比興出之遂不流入於腐

總總六合間萬物各有我臆見苟未除名理動相左譬彼迎嘉賓重門反深鎖宕胸生虛明灼然勝觀火我見未除何由入道萬物一體唯聖者能之

述懷

仕宦已三世我豈石隱流高堂漸斑白誠懷捧檄謀三釜計不就五畝端歸休長跪謝阿母阿母屢點頭折腰非爾願飲水非吾憂是母是子

屋上三重茅已爲風捲去天教屋漏痕供我學書具肯同桀黠奴三窟竄狡兔煙塵罨琴樽荒穢塞畦圃一笑姑置之拂拭書中蠹先祖有風雨絕句下二語云天公助我臨池與牆角新添屋漏痕心思所到先後印合古人往往有之必以漠漠水田飛白鷺二語謂王摩詰襲李嘉祐句殊

輕薄也況王在李前豈前人反襲後人語耶

勸農

兩足秧針滿翠色迎衣裾牛背一鴉立夕陽人力鋤萬物自閒暇三農日勤渠豐樂今伊始勉旃事菑畬

往見石田翁畫鴉立牛背。今爲石菴詩寫出。詩中有畫。畫中有詩。豈獨摩詰然耶。

題潯陽送客圖爲宋蘭揮檢討賦

梁園才子瀛洲仙。幕府讀書方少年。潯陽樓高試騁望。雕闌一曲橫江天。登臨懷古意繚邈。生綃染出琵琶篇。當時白傅佐江郡。曠懷日習東林禪。無端送客成邂逅。京都音樂聞江邊。青衫紅袖兩悽惻。千秋歌曲爭流傳。只今丹粉絢本事。水雲彷彿鳴香絃。貞元朝士感淪落。善才弟子餘嬋娟。霓裳六么疑可識。檀槽手撫神宛然。古來悲歡事何限。豈必同病纔相憐。高歌妙繪恣揮洒。動盪胸臆開心田。乃知賢豪襟韻各有託。非同非異非言詮。奇章贊皇兼將相。豈若香山佳句爭流連。還君此畫情悄悄。幽齋燈地耿不眠。疎簾剩有玲瓏月。曾照西江詩酒筵。

贈沈魯瞻

男兒蹤跡誤浮沉。把臂相於快入林。客館因依同雁序。霜天酬唱作龍吟。一燈分照還家夢。千里誰明抱璞心。請念退之論駑驥。莫將高價索黃金。

蔣恭棐 字維御。江南長洲人。康熙辛丑進士。官翰林院編修。

景州董子故里

嫂秦廢學校。坑儒并焚書。師吏辜誦說。六經歸榛蕪。漢興雖天授。創業由征誅。典禮命叔孫。縣最誠區區。

百年生董子。私淑洙泗徒。下帷絕窺園。精心究典謨。從容對三策。致君期唐虞。武皇內多欲。遇之以虛拘。詎能崇正學。詔令相江都。後復相膠西。驕主重詔諛。誠正能感通。兩地無齟齬。邪臣懷妬嫉。主父偃。公孫弘。謫計何從據。春秋詳災異。衆口訾其迂。弟子昧師說。呂步舒。妄謂論大愚。獲臯得免死。誠口全其軀。所幸聖道明。邪正分殊途。以待後來者。迭起胥匡扶。有宋五子興。直溯姬孔初。日月懸中天。夢翳消雲衢。何人啓禽徑。廣川實先驅。而胡昌黎伯。吐辭取敷腴。屈原司馬遷。子雲與相如。論道遺董子。所見猶偏隅。我過景州里。祠宇叢粉榆。稽拜瞻儀容。和粹緬真儒。王道復誰陳。攬轡空踟蹰。暴秦以後。至董子始昌言聖道。後文中昌黎遞匡扶之。至濂洛關閩而聖道大明。則董子實有守先待後功也。後半透發此旨。有聲有光。

馬維翰 字墨麟。浙江海鹽人。康熙辛丑進士。官至四川東道。著有墨麟詩卷。○意不肯庸。語不肯弱。莽莽蒼蒼。縱筆揮霍。雖未神來。已梯陷險。墨麟學杜。可云循牆而走矣。

蚤發俯浦

寒威凜冬季。木落風淒緊。束裝適京國。夜漏短無準。父母送臨河。肫復辭難罄。首言慎起居。次言遠馳騁。得既勿滿盈。失亦戒孤憤。努力崇正軌。緇塵發深警。長年動蘭橈。瞻顧兩未忍。俯首別淚滋。回汀更引領。細雨權橫塘。廬舍去隱隱。銘心寶訓言。守身日三省。初出門時。矢志便已正大。後時出政。自能不辱其親。

九折坂 自注。用杜詩。木皮嶺韻。

盤盤出鳥道。杳杳行人村。斗起邛峽山。仄隘逾劍門。天險遡開鑿。未可常理論。陰陽分向背。旦夕殊寒暄。

連山走雲氣，倏忽同追奔。一峯獨秀出，頗似嶽勢尊。其下九折坂，劔絕割厚坤。況復急雨薄，萬壑當晝昏。回輿與叱馭，北轍視南轅。所志各有託，忠孝惟其根。踟躕兩不決，心緒蠶絲繁。峭壁落井底，一髮青天痕。人生鮮百歲，只有名常存。勒銘匪易事，或用酬驚魂。奇險句似得力老杜發秦州詩以下諸咏皆然

瀘定橋自注用杜詩石櫃閣韻

落日嵐氣陰，斜照峯頭赤。瀘河捲雪來，激盪河邊石。底定定何時，盤馬對絕壁。鐵索繫兩岸，縛橋渡行客。人影漾驚波，行空無轍跡。前灘勢未平，後浪聽轉迫。孽龍蟠深淵，長虵赴大澤。驚魂定無時，王事敢求適。

梅花

疎枝雀啁轉，春溫正試東。風第一番，每自凝神當遠驛。爲誰孤立向荒村，晴雲曳宕春無限。午夜分明月有痕，索解此中渾未易。目成脈脈在忘言。已能脫俗

沈懋華字芝岡浙江歸安人康熙辛丑進士官由翰林改侍御○侍御詩意主蘊含不欲說盡唐宋之分斷斷如也晚歸佛氏教不復作詩

秦和道中

行子易時序，但嗟江路難。孤帆轉天際，遙出青林端。山影落空翠，濤聲生夜寒。鄉書猶未達，雲海正漫漫。

渡江

路盡鳥飛外，微茫一葉舟。月斜江岸曉，潮落海門秋。山色兩朝寺，鐘聲北固樓。寄奴城外草，隱隱入邊愁。

此詩吾友許武平極稱道之。謂其調高意遠，直接唐人。

秋夜東湖玩月

洞庭木脫渺愁余，倚櫂寒流挹望舒。笛裏關山清夜怨，鏡中樓閣美人居。天高風轉依枝鵲，川靜波騰縱壑魚。直是乘槎度銀漢，都看白露下前除。字字清遠妙，在意言之餘。

魯曾煜 字啓人，浙江會稽人。康熙辛丑進士，官翰林院庶吉士。

商婦篇記汝陽事

問妾何人婦，商家執巾緹。枯楊生其稊，亦自稱連理。前年賑洞庭，今歲糶吳市。妾嘗處空閨，獨宿鮮娣姒。妾貌若之榮，妾心水之止。東鄰何少年，自矜冠玉美。妮詞致黃金，新聲挑綠綺。爲妾謝少年，越禮禽行耳。庭前雪皚皚，江上石齒齒。石堅不可泐，雪淨不可滓。付命朱絲繩，妄念君休矣。男兒愛後婦，女子重前夫。使君自有婦，羅敷自有夫。

以拒狂且，何辭婉而意嚴也。此云越禮禽行，死志已決矣。詩亦從漢人中出，而立言各有體裁，扶持名教，賴有此種。

李 鍼 字含奇，直隸盧龍籍。江南吳縣人。康熙辛丑進士，官翰林院庶吉士。○太史館選，未幾旋卒。彼山澤之士，沉淪而不章者，可勝歎哉。

雜感

爛漫年華爛漫愁，春光春水兩悠悠。卷施有葉心先斷，杜宇無聲血已流。歎逝陸機同閱世，思家王粲獨

登樓此鄉信美非吾土。冷落胥江一釣舟。此章自歎下章傷逝斷腸人遠傷心事多年之不一已兆於此

生別吞聲已不禁。頻為死別更摧心。圍棋寂寞虛山墅。清宴依稀憶竹林。自注叔季兩叔相繼早世季子遠攜留墓劍。

自注密友繆馨聞墓草已宿女嬃空冷搗衣砧。自注同懷姊喪三年伏枕雙垂淚。腸斷清猿向曉吟。

送友歸鑑湖即赴辰陽幕

易別還如商與參。醉歌燕市恨分襟。旅遊舊雨聯今雨。歸客越吟還楚吟。潮落嚴灘殘雪盡。春生湘浦紫

蘭深。相思一夜江花發。千里月明同此心。越吟楚吟謂鑑湖辰陽也。此句虛領下又分承格法極細。

甘曰懋。字實夫。四川大邑人。康熙辛丑進士。

華頂道院見三十六峯老農吳青霞題詩壁間寄贈

袖拂剛風倚天闕。忽見龍蛇氣蓬勃。君從三十六峯來。獨上蓮花攬明月。自是君身有仙骨。放歌長向煙

霞窟。回頭卻笑韓退之。痛哭蒼龍嶺上時。

王恕。字中安。四川安居人。康熙辛丑進士。官至福建巡撫。著有樓山集鈔。

牧牛詞

童兒長成何所求。農家職守惟牧牛。春風著物百草長。驅牛嚙草來沙洲。童知牛性不擇草。遇丰茸處俱堪留。乘間好弄三孔笛。綠楊影裏聲悠悠。天上日車休輾轉。少待吾牛飽其腹。牛得飽兮安吾心。牛不飽

兮媿吾牧。不施鞭扑牛。馴擾順牛之性。無機巧。牛蹄彳亍牛尾搖。背上閒閒立。春鳥高下陂。隨任所之。牛日肥兮牛不知。嗚呼司牧盡如此。人間那受飢寒死。○通體說牧牛。牧民之道。已曲折詳盡。正意一點自足。象氣。

過十八灘

補天剩塊截江流。今古驚濤咽暮秋。萬石稜稜爭出水。千崖疊疊曲行舟。猿啼頻下孤臣淚。日落重增旅客愁。惶恐灘頭征雁斷。幾人回首望神州。

邵

秦字峙東。直隸大興籍。江南吳縣人。
康熙辛丑進士。官翰林院編修。

壬子正月重赴金陵志館。偶誦陶詩遙遙從羈役。一心處兩端。句憮然有感。

春風從何來。所過不留跡。人與物同春。欣欣各自得。而我獨何爲。當春轉蕭瑟。親老不能待。飢驅此行役。縱非出山泉。仰媿入林翮。一心信兩端。釋思有餘戚。緬昔負米賢。歡焉供子職。太史以母氏年高。居官未暫赴志館。戚然於中。仁孝之思。可風矣。

儲雄文

字汜雲。江南宜興人。康熙辛丑進士。

有訪

未遇幽人又獨還。貪看落日立溪灣。隔溪幾處炊煙動。遮斷寒林數疊山。

訪朝陽道院

竹逕陰磬韻流。行來便覺此生浮。道人所得惟貪懶。滿地松花散不收。兩斷句氣韻欲流。如讀有聲之畫。

蔣

深字樹存。江南長洲人。官山西朔州知州。著有繡谷詩鈔。○繡谷以纂修書畫譜得官。居官有政聲。詩亦時露警句。名場中交重之。

蠅

趨熱性能慣。貪饕死亦輕。未容隨驥尾。先欲亂雞鳴。把劍何堪逐。無屏護點成。秋風蕭颯後。憐爾竟何營。
嘲趣熱客也。語語典切。得少陵詠螢火遺意。

過落花村寄姚水部梓嵐

蒲邨西十里。隔水澹斜陽。花落何處。人行覺路香。雞栖烟箬密。鴉曳暮雲長。想見湄潭老。探幽覓句忙。
村名韻極矣。三四語傳出村行者之韻。而水部之韻亦於言外見之。

軍旅

書生事軍旅。奉檄楚江遊。人度危灘月。猿啼獨夜舟。遙聞刁斗靜。猶喜甲兵收。不作從征詠。登樓客已愁。

曉行

聞雞莫歎客途窮。拂曙星河倚劍雄。馬上續完鄉國夢。笛中吹起戍樓風。雲開泰岱天門白。人渡津關海日紅。湛露未晞秋信到。蘆煙深處數聲鴻。舊語一經點換。頓覺鮮新。

麻陽船口號

逆流好用船頭力。下水偏將船尾行。一葉不妨危地過。此心平處水皆平。此心不平。坦道皆危地也。以平

自得矣。此作者閱歷有得之言。

魏荔彤字念庭。直隸柏鄉人。官觀察使。著有懷舫集。○觀察為文毅公子。嗜古學。勤著述。詩歌雜文。不下數千章。今鐫板俱散軼矣。祇存平時記憶二章。見鱗爪。可想像雲中龍也。

題沈歸愚萬峯獨立圖

峯峯卓立斷躋攀。筇屐逍遙鳥道間。試問此翁登眺後。何人更上萬重山。向更有七律贈言。未云。他年旌

余奉使之楚。適經其地。而觀察下世久矣。為之慨然。

馬陵道

戰壘千秋沙草平。更無殘戟礙春耕。荒城夜半喧雷雨。還似當年萬弩聲。天然映合。

王濤字衡山。江南含山人。拔貢生。官兗州府同知。著有青霓閣集。

贈唐魏公

轅駒苦局促。寒蠅多羞縮。市兒眼如豆。羣疑偏滿腹。欲吐還復茹。囁嚅私相屬。多君挺英姿。天馬脫羈束。雄辯驚四筵。高談折五鹿。聞者舌盡撿。言出人人服。豈惟言服人。石畫如劔竹。一官聊攝間。舌敵穎亦禿。願垂竹帛名。志不在食肉。會當攜巨觴。對君洗塵俗。同登光嶽樓。齊魯歸洞矚。岱峯雲盪胸。東海日初浴。

俯仰天地觀。好縱千秋目。讀此詩。知衡山志在濟時。不隨刀筆。筐篋徒也。屈於下僚。有願未遂。惜哉。

李蓮字少峯。湖廣荊門人。

石城

晉代衣冠空薜蘿。石城埤堥尙峨峨。鎮雄江漢山增險。藩撤孫吳水不波。混一方知臣力瘁。憂危孰料女戎多。廢興堪下千秋淚。若問浮名心已磨。晉平吳後。賈后之禍旋起。羊祜所謂平吳之後。當勞聖慮者也。鄙陵之役。晉已勝楚。范文子謂外寧必有內憂。卽是此意。

計默字希深。江南吳江人。○此甫草先生子也。遊遊四方。名滿日下。晚歲余曾評定其詩。今令子維殿物故。無從徵索矣。於汪堯峯集中錄此。附存二章。可以想見其餘。

和汪鈍翁姑蘇楊柳枝詞

紅橋綺陌柳陰濃。歷亂飛花類轉蓬。怪殺前山女貞樹。能禁二十四番風。見柔靡不如堅貞也。然以神韻行之。與罵題者迥別。

去年折牘復依依。贏得江頭紫燕飛。委屬東風與將護。一枝留待藁砧歸。神韻行之。與罵題者迥別。

湯

準字穉平。河南睢州人。○穉平爲文正公季子。幼承家學。以樂天守道自期。詩不求工。而陶冶性靈。自足天趣。詩以人重。人重不以詩重也。作序者以孟山人林處士擬之。恐非其倫。

詠史

臨瀛園
唐伐羌成盛冉駘。韓公謀略信無雙。年來西域勞兵革。願築三城署受降。樂受降城。自是禦戎長策。卽先王守在四夷之意。

閒園隨意采芳蓀。興到常攜酒一尊。卻笑平泉太多事。苦將木石戒兒孫。達人之言。

桃源

柴桑便是羲皇世。智慧相忘息衆喧。能使此心無魏晉。寰中處處是桃源。靖節含意未申。此申言之。

徐善建字孝標。浙江嘉善人。○此陸清獻公高弟也。究心周易及宋五子著述。教人讀小學。字義諸書。謂先識體段。方可入精微處。學者多師事之。

觀鳥哺兒有感

抱兒嬉樹下。新綠遮庭戶。忽聞啁啾聲。仰見春鳥乳。不辨誰雌雄。四翼共辛苦。一出掠春蟲。一居禦鷹虎。出憂居力單。居憂出遭罟。瘁羽豈暇梳。嬌音不遑吐。黃口快得食。那知翁與姆。感此撫童雛。何如此禽羽。上念父母恩。淚下如注雨。性情淺者。只感觸己之哺兒。今上念父母哺己之恩。慨然靄然。可以教孝。

王汝驥字雲衢。江南金壇人。由選貢生官通江知縣。○雲衢丈制義宗工。中歲爲詩。不落宋元氣習。古體尤上。外人不知爲詩人。以文名掩也。有嗜痂癖。每來吳中。酒後背誦余詩。至數十章。人多笑而怪之。詩稿未鐫。葺詩時屢訪不得。祇存其舊詩鈔。贈二章。比之吉光片羽焉。

雞頭關

征馬鳴蕭蕭。澗水流潺潺。水鳴何嗚咽。馬鳴多哀酸。借問客何之。言上雞頭關。關門開一線。羊腸裊青天。上有千仞壁。下有百丈淵。驚風吹落石。洪流盪奔湍。危途無返轡。微生寄征鞍。靡靡遵木末。遙遙造雲端。故鄉杳何許。天路安可攀。側聽隴頭吟。感我涕洟瀾。

黃牛峽

三峽天下奇。黃牛險尤絕。奔騰萬里流。礫豎兩崖裂。舟從罅隙行。身在古石穴。驚濤般怒雷。觸石激晴雪。纜牽如蟻進。橈退只一瞥。舟師喚奈何。長篙屢撐折。哀猿數聲叫。客子雙袖血。到此英雄人。自顧同蠓蟻。生涯抵投荒。輕身計何拙。載詠小旻詩。撫心媿前哲。連上章能造險語。彷彿老杜入蜀諸詩。

陳奕禧

字謙六。浙江海寧人。官石阡太守。○石阡以字學鳴詩亦清穆。王新城尙書嘗稱賞之。

望中條山有懷吳天章玉溪隱居

雪晴初日照。歷歷中條岑。下有幽人宅。長鄰洞壑深。松門閒倚杖。潭水坐清心。靜聽風泉落。冷然彈玉琴。

虞帝陵

陵寢古鳴條。平岡入望遙。自注。陵在鳴條岡之盡處。殿庭二女侍。冠珮五臣朝。府事開神禹。文思協帝堯。饗堂合樂處。

彷彿奏箏韶。

郭元鈞

字于宮。江南江都人。官中書舍人。○于宮亦江左十五子中之一。嘗輯金源詩。無挂漏者。可補元遺山之缺略。

答邵子湘

芙蓉湖上邵髯翁。高行鴻文眼界空。京雒聲華懷漫刺。江湖蹤跡趁歸鴻。南豐不讓劉中壘。杜甫平交嚴

鄭公。老卻少微星。下客夢魂肯踏軟塵紅。五語高子湘之文。六語高子湘之品。

顧文淵

字文寧。江南常熟人。著有海粟集。○蔣文肅題其集中云。不作廊廟歌。云是騷人詞。寫出肝膽語。願得知己知。不得知己知。甘受他人嗤。觀此贈言。其詩可知矣。其人亦可知矣。

余錦泉席上聽衆姬琵琶

有酒易傾不夜之圓月。有金難鑄不謝之名花。秦川公子發大笑。偏與花月爭豪奢。左秦箏。右琵琶。九枝蠟燭光如霞。青蛾皓齒兩行列。袖拂紅牙低按節。初調絙朱絲。峽口春冰裂。再彈捍撥齊。鈴聲雨淋咽。江妃漢女玦環鳴。相和箏琶同撇振。俄驚雙鳳凰。飛上梧桐岡。啁啾屏盡百鳥喧。離離和鳴向朝陽。遂巡換宮商。倏忽移角徵。朔風應手捲驚沙。百草茫茫雁聲死。飲恨羈臣擊劍歌。裹創戰士聞笳起。淒斷故園心。擾破離人耳。停絃兩兩寂無聲。纖纖憐殺春葱指。天孫織錦作纏頭。五色綵雲遺彼美。花殘月落不忍歸。捲下珠簾隔千里。起結神似太白中間移宮換羽頓挫激昂使讀者目眩神移幾於應接不暇

十八灘

荒荒異縣經萬安。毒霧散影分林巒。暮愁雨宿朝風餐。前途遙數十八灘。一灘一險俱心寒。青螺層層如抱擁。石插旋渦各森聳。寒流百道噴石孔。七千里外宋孤臣。落日灘頭說惶恐。宋孤臣指東坡

暮帆齊落喧鳴鏡。村人堵立林塘均。利箭在箛弦在梢。不知何山逐獐鹿。巨天野火燒黃茅。危磯千文蔽天宇。長年日晚忽停櫓。月逆行雲吞復吐。虎俚啼過斷人聲。叢莽中間伏強弩。

煙中捩舵水倒衝。千篙爭力怖殺儂。森森石齒排劍鋒。人言險灘最天柱。水底白日蟠蛟龍。五章又似少陵短章

嚴啓煜字玖林浙江歸安人官永康訓導○玖林嘗言昌黎昌谷雖非詩之極至然針砭庸俗廓清之功真乃比於武事又言二昌乃吾死友今披其集皆和平中正無詰屈奇詭之習豈善學

者不求
形似耶

留別吳門諸子

夕陽衰柳繫歸橈。離思孤隨鴈影飄。豈類穆生忘設醴。自傷伍相久吹簫。遊雲變滅元無定。盤谷寬閒實見招。祇惜舊時諸伴侶。春燈花下隔吟瓢。
背花寧待管絃終。歸臥雲林半畝宮。世外漁樵有真趣。山間雞犬盡淳風。采松袖染秋嵐碧。擣藥窗留夜火紅。他日臯橋明月裏。故人應共念梁鴻。

汪文桂字周士江
南新安人

秋日曹秋嶽先生過飲桐溪草堂別後有作

謝公履齒款雙扉。點筆翻書對夕暉。徑仄秋花迎客座。夜深涼月戀人衣。驚心蕉鹿追宵夢。款語滄桑坐石磯。曉柝更催歸棹發。望中帆影思依依。寫得涼
月有情

秋日同季弟歸里和韻

秋深才得返鄉閭。弱弟偕行賦遂初。衣上辛勤慈母線。篋中珍重故人書。白雲紅樹堪移棹。萬壑千峯擬結廬。到日松楸親拜掃。山田猶待把犁鋤。

汪文柏字季青浙江桐鄉人官指揮使著有柯庭餘習○竹培朱先生序其詩謂匪僅開宋元之竅與直造唐人之室而嘖其馘不無溢美然謂時有佳句比之孟山人之微雲淡河漢疎雨滴

梧桐斯
爲得之

盛湖

矮屋環湫市。泗流界疊塍。夜燈千足練。秋雨半湖菱。擊榜吳娃捷。評珠賈客能。辛勤終歲力。猶未足催徵。
夜燈十字非親詣其地不知其妙即景成詩光無故實應得於有意無意中

登煙雨樓

十度憑欄九度晴。今朝煙雨一舟橫。雁飛難辨空中字。櫓過惟聞暗裏聲。軟浪成花侵寺壁。冷雲如墨擁軒楹。舉觴放眼唵長句。始信高樓不負名。
櫓過惟聞暗裏聲自是佳句然施之此題彌見其佳

費錫琮字厚蕃四川新繁人著有白雀樓詩○厚蕃爲高人此度長子克傳家學五言亦有大江流漢水孤艇接殘春之概新城王尙書惜未見其詩

黃河

靈脈來天上。渾流晝夜奔。縱橫穿套口。屈折下龍門。地入滎陰斷。山臨華嶽尊。何須逢漢使。便擬溯崑崙。
一氣鼓盪力透氣雄

登北固山

絕嶺橫江岸。登樓望渺然。潮來徐福島。山出寄奴泉。境界分吳楚。波濤混海天。千秋征戰地。今喜靖烽煙。
費錫璜字滋衡四川新繁人○此此度次子熱古樂府詩中蒼蒼莽莽時有古音然亦不無粗率處洶汰之取其古而近雅者迥異時流

兒語

鷓鷹搏雞。雞有母護。離親出門。心寒行路。連下章。竟

食魚去乙。食李去核。治國去賊。

送劉得柔入秦

紫駟卸玉羈。故人來齊安。昂藏河朔氣。兩鬢蕭蕭寒。爲言三載別。岐路各漫漫。燕秦二千里。浮雲會江干。雪堂寂寞秋。傾蓋暫盤桓。片言瀉黃河。隨風生波瀾。虵虺橫江湖。噬螫太無端。湛盧不在握。徒手空長歎。明日東西別。征車不可攀。

湖山

碧澄千頃豁。青立一峯孤。月似懸秋鏡。人如坐玉壺。煙光隨地盡。水色到天無。肯與漁翁醉。鄰舟近可呼。水色到天無。言遠水接天。合而爲一。不見水也。此工於鍊句。

海村雜詩

海樓秋易夕。水寺晝長昏。穀貴難成市。時荒早閉門。蛇龍各自媚。禮樂不言尊。寄問西邨叟。方飢劇草根。難成市。不言尊。寫荒年景象如見。

少年行

臂上角弓強。腰間劍似霜。舊從李都尉。新拜漢中郎。愛馬黃金埒。調鷹白玉牀。平原秋草淺。射獵出長楊。

汴城晚望

落木蕭蕭汴水清。雲沙何處雁飛聲。河蟠雍豫千支合。地拓中原萬里平。累代廢興難屈指。百年禾黍獨關情。夢華空有遺民記。不是宣和舊帝京。

變歌

東門楊柳枝。早晚遭攀折。今日是相逢。明日是離別。

六朝小詩。

相逢

岐路不相識。一言傾寸心。贈君腰下劍。不在直千金。

以千金直重。則義氣減矣。此善翻前人句意。

吳姬勸酒

吳姬十五髮鬢鬢。玉腕蒲桃勸客酣。但過黃河風色冷。更無春酒似江南。

如聞勸酒之聲。而渡河以北之風塵。言外可想。

陳玉齊

字在之。江南常熟人。著有情味集。

秦皇

離宮環極起。周廬萬里滄波候。大魚入海雲迷徐福島。封山雨濕李斯書。華陰道上逢沉璧。陽武沙中失副車。王翦用兵真老諍。尙留三戶未驅除。

徐

字芬若，江南常熟人。流寓北通州以終。著有出塞詩。○芬若亦字芝仙，長白。搖人物詩無一語不奇。吾友徐龍友見之，譏於下拜。奇人見奇詩，尤契合云。

雨阻黑河

天地有此河，墨流獨澗澗。黃河曾爲聖人清，濁浪咆哮獨不改。迢遙西上勢蜿蜒，兩旗疆界相鈎連。自注：土默

統分地。受降城頭坐飛將，牧馬不敢爭河邊。上有共工觸破未補之漏天，下有鮫人痛哭不測之深淵。陽

春有腳走不到，那得兩岸生人煙。但見奇花塞洲渚，色如人面形如拳。花裏見魚不見水，一網可以盈一

船。飢兒阻雨不須哭，朝魚暮魚食尙足。雷電光中住過春，腳底莓苔黯然綠。天晴曝衣上古原，白骨堆邊

檢金鏃。境奇詩亦與之俱奇。芬若又有大松山詩起云：一峯飛入雲，雲故推之。出一峯飛出雲，雲故攬之入。奇警前人未道。因通體用韻夾雜，故去之。

燐火

土雨空濛著衣濕，燐火如螢飛熠熠。須臾散作星滿天，空際如聞衆聲泣。有火獨明必鬼雄，衆鬼吐燄無其紅。約束羣燐共明滅，無乃昔日爲元戎。別有火光黑比漆，埋伏山坳語啾唧。鬼馬一嘶風亂旋，千百燈從暗中出。電光閃閃兩軍接，狐兔草中皆震懾。一派刀聲不見刀，燭髀墮地輕於葉。血過千年色尙新，那知白骨化煙塵。新鬼日添故鬼冷，無復寒衣送遠人。寫燐火之忽聚忽散，鬼雄鬼馬之光怪離奇，紙上灘於有形聲矣。後又寫羣鬼之接戰，更幻更奇矣。道子

善畫鬼，亦未到此。

歸化城雜詠

祁連呼吸與天通。不與人間節候同。後騎解衣風柳下。前軍墮指雪花中。髮離漢地根先白。淚過秦山色
變紅。騶伍漫勞歌況瘁。侯王猶自佩瑠弓。奇人總無凡語。

塞下曲

萬騎從天下。邊人拭目看。長城無限窟。飲馬一時乾。

關山月

城頭一片秦時月。每到更深照黑河。馬上萬人齊仰首。不知鄉思是誰多。

出關

憑山俯海古邊州。旆影風翻見戍樓。馬後桃花馬前雪。出關爭得不回頭。眼前語便是奇絕語。幾於萬口
者。流傳此唐人邊塞詩未曾寫到

